

TENTAMEN

HISTORICO-MEDICUM.




TENTAMEN
HISTORICO-MEDICUM,
 EXHIBENS
COLLECTANEA GYNAECOLOGICA,

QUAE EX
TALMUDE BABYLONICO

DEPROMSIT;

A. H. ISRAËLS, *Med. Doct.*



Groningae apud P. VAN ZWEEDEN.

Leerae apud PRÄTORIUS und SEYDE.

MDCCGXLV.

Nec pudebit, sicubi erro, discere; proinde quisquis haec
leget, ubi punitus certus est, pergat mecum; ubi pariter haesitat,
quaerat mecum, ubi errorem suum cognoscet redeat ad me, ubi
meum revocet me. Sic enim debent agere omnes, qui rei ob-
scurae veritatem investigant.

BIOLANUS: *De circulat. sang. Monit. ad lect.*

P A R E N T I B U S
O P T I M I S C A R I S S I M I S ,

N E G N O N

· V I R O D O C T I S S I M O

L. A L I C O H E N ,

*Medicinae Doctori, Groningae praxin exercenti; Societatum
medicarum et naturalium quae Hamburgi, Bruxellis, Brugis,
Antverpiae, Groningae florent, Socio literario et hono-
rario cet.,*

A M I C O I N T E G E R R I M O ,

S A C R U M .

VIRO DOCTISSIMO

L^o. ALI COHEN

S. P. D.

A. H. ISRAËLS.

Prorsus ineptus viderer tibi, si utilitatem et delicia Historiae Medicinae longo sermone tibi demonstrare conarer. Neque meum est, ad te hanc Dissertationem mittentis, meoque libello tuum nomen adjungentis, emolumenta enumerare omnia quae Historiae Medicinae cultores nostris praecipue temporibus arti huic salutiferae jamjam attulerint. Probe enim scio, mi COHENI! studium historicum semper tibi fuisse oblectamentum iis diebus ac horis, quibus Naturae ipsius indagacionibus operam non navasti; et studiis laboribusque tuis multifariis interesse nemini certe magis quam mihi contigit. Scio itaque etiam illud, quod ab eo inde tempore, quo fata perscrutari inceperis quae Medicinae variis regionibus variisque temporibus contigerint, saepissime doluisti tot tantaque adhuc desiderari, et latere, scitu dignissima si Medicae artis inter gentes antiquissimas et antiquiores statum cognitum nobis habere velimus. Quanta enim, — ut inter populos Orientales modo Hebraeos afferam, — quanta adhuc sunt manentque indaganda, colligenda, comparanda, antequam nobis clara absolutaque Medicinae Hebraïcae

exhibeatur imago? Scio equidem multos, et jam ante longum temporis spatium, Medicinae conditionem inter gentem Hebraicam exposuisse ope catalogi amplissimae librorum: sed haec Medicinam *biblicam* solummodo spectant. Maximi certe sunt faciendae istae indagationes, quas nos quoque debitis gratiis accipimus, verum limites sunt remotiores; labor et opus nondum his inquisitionis principiis ad finem est perductum. Gens Israelitica enim quandoquidem, uti notum, post aeram Biblicam per secula nonnulla libera suique juris adhuc exstiterit, desiderio capimur fata indagandi conditionemque ignorare nolumus Artis medicae qualis apud Hebraeos fuerit, juniore aetate quam biblico aevo: — cupimus nos edoctos fieri praesertim ea quae ad Medicinam Talmudicam pertinent. Medicinae Historiae cultores jam dudum sane hanc scientiae partem excoli quam maxime exoptaverunt, quippe qui compertum sibi habuerint in Talmude divitias cujuscunque generis latere quoque pro Historia Medicinae, quae in lucem collocari merentur studioque historico Artis nostrae perutiles erunt. Mirum tamen quod, quamvis omni tempore exstiterint et Talmudis et simul Medicinae multi viri peritissimi, perpauca tantum, ne dicam nulla omnino parabantur subsidia, quorum ope Medici Talmudis idiomatis imperiti, edoceri posent ea quae ad Medicinam Talmudicam pertinent.

Anno tamen 1743 in Academia Göttingensi doct. G. GINZBÜRGER dissertationem inauguralem defendit quae inscripta est: *Diss. exhibens Medicinam ex Talmudicis illustratam* (22 pagg. in 4^{to}); hoc tamen opusculum auctoris peritiam satis demonstrans, nimia

eum festinatione tamen est conscriptum. Nemo itaque ex eo justam atque claram imaginem Medicinae Talmudicae acquirere posset: loca ipsa Talmudis recentiore lingua non sunt versa, sed potius excerpta: quibus accedit incredibilis quaedam ἀναξίσια et multarum rerum ommissio aliarumque momentosarum plana oblivio; — sic v. g. Artis Obstetriciae Talmudicae plane immemor est auctor. Dolendum ergo auctorem argumentum adeo amplum tam raptim tractavisse, ut nil fere inde redundaverit in historiae nostrae scientiae emolumentum. Sed pergam! Inter auctores anonymos WOLFF in sua *Bibliotheca Hebraea* enumerat opus quoddam מאה דפין (*Centum folia*), quo, uti ajunt, omnia quae in Talmude ad Medicinam spectant collecta sunt: — auctor libri *Seder Haddoroth* (fol. 170 a. col. l.) eundem quoque citat librum. Doleo autem vehementer quod librum illum inspicere mihi non contigerit, licet multa hunc in finem tentaverim, tam in nostra patria quam in Germania. — Notulas obstetricicas quasdam, quae tamen anachronismis scatent, habet Cl. F. B. OSIANDER, in sua *Litterarische und pragmatische Geschichte der Entbindungskunst*. Göttingen 1799. p. 77. Auctor ille sine dubio ipsum Talmud non consuluit; et magnam historiae gentis Hebraeae cognitionem ei non fuisse, facile patet, cuique ejus verba legenti: »Von den gelehrten Muhamedanischen Arabern borgten ihre medicinische Weisheit die Juden der damaligen Zeit, welche zu Sora in Asien eine Schule für die Heilkunde hatten (!!). Aber aus den nachgelassenen schriften jüdischer Aerzte jenes Zeitalters, wie des MOSES MAIMONIDES, ABEN EZRA u. d. g. ist

„von der Entbindungskunst unter ihnen nichts unterhalten. Indessen kann man den Talmud, als das Archiv der jüdischen Weisheit ansehen, welches auch verschiedene, auf Geburten und Geburtshülfe Bezug habende, physiologische Lehren enthält, die jedoch, wie z. B. die Behauptung des Auseinanderweichens der Beckenknochen in der Geburt (!) keine (?) sonderlichen Kenntnissen errathen.“ Vides iterum, amice! quantopere magni quoque viri errare possint si ex fontibus impuris hauriant, et quam necesse sit Historiographo, ut ipsos fontes adeat! — Relata partem peculiarem Artis nostrae, Artem obstetriciam spectant: sed vir Doct. et Rev. CARMOLY in diario suo *Revue Orientale*, T. I. et sqq., sub titulo *Histoire des Médecins Juifs*, Medicinam Talmudicam magis universaliter quoque tractavit. Verum non solum nil inde haurire possumus, quo certiores fieremus de Arte obstetricia Talmudica, sed insuper de Medicis Talmudicis vel de Medicina Talmudica tam succincte egit, ut ille quoque spem fallat, si quis ab eo multum boni et certi expectet! — ne dicam doct. CARMOLY non semper satis accurate argumentum tractavisse, eique fidem pluribus locis prorsus esse denegandam.

Atque haec fere sunt praecipua, quae ad nostrum usque diem de Medicina Talmudica in lucem produsse videntur. Quanti autem hi fontes habendi sint, tuo iudicio submitto!

Anni tres jam praeterlapsi sunt, quum, te adhortante, una tecum nonnullisque aliis Litteraturae Hebraicae cultoribus, fundaverimus Sodalitium *Pro*

Excolendis Litteris Hebraicis Haudquaquam hujus loci est in mentem tuam revocare quantum in deliciis nostris fuerit haec societas; neque memoriae tuae renovare opus est, quantae voluptates, quantumque emolumentum ad diem hodiernum usque haec societas omnibus suis sociis praebuerit! Meministi certe horum nostrorum studiorum, suaviumque nostrarum *Horarum Hebraicarum*. Et uti tibi, sic mihi quoque persuasum erat studiis meis medicis Hebraicarum litterarum studia prodesse posse. Dictum, factum. Te suadente, animo tum concepi vires eo intendere ut exponerem, quantum fieri posset, fata Medicinae inter Hebraeos, et indagarem modum quo Hebraei Medicinae profuerint eamque coluerint. Hisce studiis occupatus, brevi autem mirabar ingentem copiam opusculorum a Medicis aliisque viris eruditis scriptorum, quae vel totam Medicinam *biblicam* vel versus nonnullos S^{ae}. S^{ae}. modo qui ad Medicinam spectant, pertractaverunt. Studiis meis autem trans aeram biblicam sese extendentibus, Talmudisque aetatem imprimis spectantibus, terram inveni incognitam fere atque incultam, nullumque fere reperi ducem *fidelem* qui viam mihi monstraret quam tutus ingrederer. Dubius tunc diu haesi, num viam inchoatam persequerer, vires meas nimis teneras sentiens ut talem laborem in me susciperem. Te autem imprimis adhortante, manum ad operam admovi et ipsum Talmud pervolvi; sed quoniam, pro conscribenda Dissertatione, tunc quoque nimius foret laboris ambitus, si solius Talmudis Medicinam totam peragerem, nil supererat quam ut amicorum voto responderem, solamque *Gynae-*

cologiam Talmudicam edere. Non opus est tibi varias enumerare difficultates etiam istius laboris: cognitum enim est tibi, Amice! quantae molis fuerit totum Talmud perscrutari, ut omnia colligerem, quae ad rem meam facerent. Consului, — uti comperies, — solummodo Talmudis recensionem Babylo-
nicam, magis completam extensio-
nemque alterâ re-
censione Hierosolymitanâ. Usus sum editione Talmu-
dis Babylonici Amstelædamensi, XII Tomis, folio
edita a Fratibus PROOPS, a^o. 1750-1765. Loca ipsa,
quantum fieri potui, *verbotenus* reddidi, elegan-
tiam styli Latini veritati sensuique textûs lubenter
sacrificans. Omni sensui verborum, ex Talmudicorum
scribendi dicendique modo succincto et conciso, obs-
curiori notulas adjeci, quibus difficiliora in clariorem
lucem collocarem. Quodad explicationes meas, ego
etiam explicavi „non certo ut sint et definita omnia,
sed ut unus ex homunculis probabilis conjectura se-
quutus.” Addidi simul annotationes quasdam quibus
textus melius intelligeretur a lectore Hebraeorum
historiae minus perito. Si autem expectes, me
simul ex Medicina illustrasse praecepta varia diver-
sasque consuetudines religiosas a Talmudistis imposita
feminis Jisraëliticis, falleris: — illud argumentum
nimirum variis ex rationibus tangere nolui. Et id
quoque insuper tibi persuasum esse velim, me Talmud
perlegisse et consideravisse eodem modo quo alios *Me-
dicos* veteres perlegerem et considerarem.

Verum haec nondum sufficiebant. Critices enim
momentum et dignitatem maximi quum habeamus,
omnia fere quae collegi, comparavi cum scriptis

aliorum Medicorum veterum, praesertim Graecorum et Romanorum. Quibus indagationibus imprimis id mihi volui, ut exinde pateret, utrum Talmudistae autodidaeti fuerint, an vero omnia quae nostrae memoriae prodierunt circa rem gynaecologicam, flosculi essent peregrini, sed propria cultura mutati vel alienati? Sed quum nil prorsus novi sit sub sole, et quum multa ut nova et antea plane incognita proclamentur, quae tamen ante saecula multa jam fuerant proposita et descripta, simul in meo opusculo levi saltem penicillo adumbrare conatus sum, quanti aestimanda sint varia Talmudicorum placita, ex mente hodiernae scientiae. In Capite denique ultimo, ob materiae tractandae dignitatem prolixior me fuisse, certe aequo feres animo!

Atque haec sunt, quae ortum et naturam hujusce opusculi explicant. Equidem optime scio atque persentio multa in illo desiderari, aliaque forsitan a me non bene fuisse intellecta, aut male tradita: — sed res ardua est” — ut PLINIUS ait — »velustis novitatem dare, obsoletis nitorem.” Si itaque has pagellas perleges, a te rogo atque iterum rogo, ut cogites opus illud modo conscriptum esse ad excitandos alios peritiores, qui suo ingenio suaque doctrina in lucem elariorem collocarent, quae ego tractavi, et praesertim ea quae a me non sunt tractata, — et quanta haec sint, non opus est quod tibi dicam. Neque denique tanta Litteraturae orientalis cognitione me instructum esse glorior, ut omnia a me bene intellecta esse crederem aut confiderem.

Atque haec de opusculo ipso tibi praemonere volui, reliqua ipsum opus docebit; cui praeterea adjunxi quasdam Emendationes necessarias, quas ne praetereas quaeso!

Antequam vero finiam, tibi profiteri gratus animus me jubet, quot quantaquae in hoc opusculo elaborando fuerint consilia, quamque utiles admonitiones, quibus exoptatissimus et meritissimus praeceptor cl. DE LA FAILLE sibi me devinxerit. Quantum insuper ei debeo, qui semper mihi exstitit studiorum dux certus, laborum fautor benevolus et praeceptor amicus! Optimus praeceptor id sibi persuasum habeat velim, numquam me futurum esse immemorem talis erga me humanitatis talisque liberalitatis, non solum per totum vitae meae Academicæ decursum, sed praesertim quoque in conscribendis et edendis hisce pagellis.

Devinctum autem etiam me persentio Viro Clarissimo JUYNBOLL, peritissimo litterarum orientalium in nostra Academia professori, pro auxiliis et consiliis egregiis, quibus me honoravit, quum eum adirem rogatum ut praeclaro ejus ingenio res obscuras mihi illustraret. Neque eum plane rejiciendas habiturum esse meas qualescunque perquisitiones, spero atque consido, quemadmodum Literaturae universali pro quadam saltem parte, quoque non plane inutilia sint quae concipsi!

Quantum vero tibi debeam, mi COHENI! pro tot tantisque integerrimae amicitiae testimoniis, verbis ex-

primere prorsus nequeo : — gaudeo autem inter amicos verbis opus non esse ut amicitiam illibatam, constantem et indefinitam inter se profiteantur. Quantopere tu me colueris veramque Medicinae tractandae viam mihi ostenderis, quantopere ego te invenerim amicum certissimum in re certa et incerta, quisque meorum studiorum dies, ab initio vitae academicae inde, testari potest! Amore scientiae et Artis salutiferae quotidie me imbuisti, teque duce viam mihi parare studui ut investigarem Naturam sanam morbosamque : — nullus fere praeteriit dies, quo tecum non instituerim observationes sive experimenta in largissimo Medicinae campo... Sed taceam! Id autem tibi valedicens pronuntio: Quoquoersus fata unquam me ducent, tecum semper mihi eadem amicitia eademque consuetudo intercedant, precor! Quidquid autem anni ferant, sint tibi fausti et fortunati! Vale et fruire!

Scripsi *Groningae* Idibus mensis Martii MDCCCXLV.

CONSPECTUS.

PROLEGOMENA.

- I. *De Medicina biblica in universum
et de arte Obstetricia V^{is} Tⁱ in
specie* pag. 1.
- II. *De Talmude ejusque confectione . . .* „ 15.

INTRODUCTIO.

*Talmudicorum scientiae medicae et
obstetriciae brevis conspectus gene-
ralis* „ 27.

CAPUT I. *De utero et foetu.*

- A. *Anatomia partium genitalium mu-
liebrum* „ 37.
- B. *Embryologia* „ 44.
- C. *De monstris et molis* „ 70.

CAPUT II. *De graviditatis negotio.*

- A. *De pubertate et sterilitate . . .* „ 81.
- B. *De menstruatione* „ 91.
- C. *De conceptione et graviditate . .* „ 102.
- D. *De abortu* „ 111.

CAPUT III. *De partu normali et abnormi.*

- A. *De partu normali* „ 119.
- B. *De partu abnormi* „ 142.

CAPUT IV. *De infante ex matris ventre exciso.* „ 160.

EPILOGUS. „ 185.

PROLEGOMENA.



I.

DE MEDICINA BIBLICA IN UNIVERSUM, ET DE ARTE OBSTETRICA VIS T^h. IN SPECIE.

§ I.

Quisnam initia rerum cognoscit? Quis valet in tenebras penetrare quae omnium artium scientiarumque originem ambeunt? Hominis id non est! Neque magis Medicinae! Ratio nos docet, hominem qui suo intellectu bonum a malo distinguit, suâ sponte, oborto morbo, Medicum esse factum; quia omnibus innata est facultas mala avertendi, igitur morbos, — bonaque appetendi, quorum sanitas summum est: ita ut morbis infesti omnes intenderint vires ad illos debellandos. Atque hic Medicinae ortus: quivis ex semet ipso, ex sua natura erat Medicus. Sic summus Cous: »magnum," inquit, »est artis existentis argumentum, et quod inter praeclara habendum »sit, quando qui ne eam quidem esse existiment, ejus »ope servati conspiciuntur. Qui enim, etiam non adhibitis

*Medicinae
biblicae
origo.*

»medicis, ex morbo convaluerant, ut intelligant omnino
 »necesse est se quod aliquod vel fecerint vel non fece-
 »rint idcirco sanitatem esse consecutos" 1). Medica ars
 igitur una fere cum gente humana videtur orta.

Causas omnium malorum homines Deo, ut boni
 malique auctori, tribuebant, et ita quoque morbos populi
 antiquissimi Diis iratis adscribebant. Hinc magna illa
 necessitudo apud omnes populos antiquos inter religio-
 nem et Medicinam; hinc in Aegypto sacerdotes agebant
 vices medicorum, hinc in Graecia Deorum templa erant
 vera nosocomia, in quibus Aesculapius invocabatur
 et aegroti undique congregabantur.

§ 2.

*De medicina
 ex Vetere
 Testamento.*

Quum omnes antiquissimi populi illam morborum
 originem opinarentur, non mirum, in Sacro Codice, nempe
 Vetere Foedere, Deum ipsum haberi auctorem omnium
 morborum, quibus Jisraëlitae infestarentur. Praecepta
 Dei pie et religiose insequentes, ab omni morbo immunes
 manerent 2); Deo autem non obediētes cujuscunque
 generis calamitatibus affligerentur 3).

Id non solum de populo in universum valebat, verum
 etiam de singulis et nonnullis; quemadmodum illud de
 Ijobo 4), de Mirjamo, Mo sis sorore (Numeri XII. 10.)

1) *De arte, Hipp. opp. omnia. Edit. Foessii. 1595.*
Sect. I. p. 4).

2) *Exod. XV. 26.*

3) *Levitic. XXVI, 14-17. Deuteron. XXVIII, 20, 21, 27, et*
alibi passim.

4) Saltem ex mente amicorum, non autem ex opinione
 ipsius aegrotantis.

de rege S a ŭ l o (I Samuel. XVI. 14), aliisque multis relatum legimus: imo propter peccata unius hominis, imprimis qui auctoritate excellebat, Epidemias toti populo Deus infligebat. (II Samuel. XXIV. 12-16).

Non solum autem morbos misit Deus, eos etiam curavit. Curabantur tamen ab Eo non immediate, sed mediate, et quidem intercedentibus iis¹, quibus major erat cum Deo consuetudo, nempe sacerdotibus et postea nonnunquam etiam prophetis. Quamdiu inter Hebraeos pura exstitit Theocratia, omne medendi officium penes sacerdotes, vel prophetas remansit: — quum autem hanc puram Theocratiam, electis regibus, populus infregerat, non solum sacerdotes, vel alii homines in religionis officia incumbentes, aegrotis consuluisse, verum etiam alii vulgares rem medicam facitasse videntur.

Medicos autem jam ante exitum ex Aegypto inter Hebraeos exstitisse, non nisi conjecturis assequi possumus. Sic agit S. S. de medicis (סְפָרִים), qui perunxerunt corpus mortuum J a c o b i patriarchae, et I j o b (XIII. 4.) suos amicos nominat medicos imperitos. Ex posterioribus tamen temporibus narratur, regem A s a m non sacerdotibus sed medicis usum fuisse; (II Chron. XVI. 12.), etiam J e r e m j a (VIII. 22) et Sirachides (XXXVIII. v. 1-13.) de medicis loquuntur. Nonnulli sunt qui perhibeant, pharmacopolas inter Hebraeos exstitisse, unguentis et emplastris parandis operantes; quam tamen sententiam vix meam facerem, voce קָרָן potius intelligens conditores et venditores aromatum, pro suffitu in templo, et usu mulierum. Nullibi tamen medicorum munus, remedia vel instrumenta perspicue

descripta legimus : neque mirum ; S. S. enim non quidem certiores nos facere intendit de morbis populorum, quorum fata narrat, sed tantummodo exponere modos, quibus Deus hominibus provideat eosque curet.

Quae in V. T. Epidemiae descriptae sunt, in universum valde succincte traduntur. Fusc tamen memorantur Lepra variaeque ejus species (*Levitic. C. XIII et XIV*). Alii morbi, de quibus ibi sermo est, reges vel alios homines illustres affecerunt, et tunc historicae rationis magis, quam scopi cujusdam medici gratia descripti sunt. Moses ipse tamen artem medicam sui temporis prae aliis cognovit; eumque a sacerdotibus Aegyptiacis hanc didicisse, non opus est ut moneam, dum ipsa vitae historia et legislatio abunde id probant. Horrendae Leprae descriptionem Mosaicam imo multis in partibus hodierna etiam experientia probat et confirmat; curandi tamen methodus, quae ibi significatur, mere fuit diaetetica; idque ideo, ne malum per totum populum latius se extenderet. Ceterum Moses multas tulit alias leges et praecepta diaetetica; v. g. legem abstinentiae ab usu nonnullorum mammalium, avium et piscium, legem lotionis illorum qui morbo genitalium fuissent correpti, cet. Neque alius fuit curandi modus ceterorum morborum, qui hic et illic in V. T. memorantur : interna remedia fere non propinabantur, externa saepius 5); plerumque sacrificia et preces id debebant efficere quod humana mens perficere non posset. Medicinae politicae et forensis vestigia in V. T. non

5) Rarissime tantum mentio fit de quodam remedio. Inter remedia autem Balsamum Gileadense maxime salutare aestimabatur in vulneribus sanandis (*Jerem. XLVI. v. 11*). Alia remedia nonnulla hic illic citata invenies: v. g. *II Reg. XX. 7. Proverb. XVI. 24. Tobias XI. 6. 10. cet.*

desiderantur. Ad haec referrem praecepta de signis virginitatis, de stupro, de incestu, de prostitutis, de variis corporis laesionibus, de sepultura suspensorum, cet 6).

§. 3.

Haec sufficiant de Medicina Biblica. Videamus *De arte obstetricia ca I^a, T^a.* nunc quid in S. S. scriptum sit de arte Obstetricia. Ab initio rerum inde auxilium afferebatur feminae parturienti, quia partus ipse normalis et facilis auxilio non plane orbatus esse potest, nec sibi soli in omni casu parturiens potest curare. Insuper partus difficiles humani generis sunt; ex corporis fabrica et vivendi more prae animalibus: ipsamque hanc difficultatem exortam fuisse, quod Adam et Havva (Eva) Dei mandato obtemperare et obedire noluerint, auctor libri Geneseos ex illius temporis cogitandi ratione refert his verbis, (*Genes. III. 16*). „Deinde ad mulierem: ego te multis doloribus (inquit) „aerumnisque adficiam: tu natos cum dolore paries, et „pendebis a viro tuo, tibi que ipse imperabit” 7). Nonnulli hanc ob rem Adamum vocarunt: „obstetricatorem et umbilici sectorem primum, et statuunt illum primogenito funiculum umbilicalem lapide acuto cecidisse, filo plan-

6) Fusius de medicina biblica cf. Schmidt: *Bijbelsche Medicus*; Mead: *Medica sacra* cet. Amstel 1749. N. D. Sybrandi: *Diss: de necessitudine quae fuit apud veteres inter religionem et Medicinam*, Amstel. 1841. J. P. Trusen: *Biblische Krankheiten*, Posen 1843. etc.

7) Exceptis versibus Gen. XXXVIII. v. 27-30, pro omnibus allatis locis biblicis usus sum interpretatione Sebastiani Castellionis ex Ed. Lipsiensi 1778.

tari subligasse, abstraxisse vel demordisse (J. Z. P l a t n e r: *de arte obstetrit. veterum. Lipsiae 1735. p. 3.*) Quae conjectura si vera foret, unicus esset in Sacro Codice locus, quo virum inveniamus parturientibus adstantem; dum ubicunque feminis feminas adstitisse in eo videmus. Abrahami v. c. familia nomadicam vitam agens, habebat obstetrices: sic in partu difficili R a c h e l i, patriarchae J a c o b i uxori, (*Genes. XXXV 17.*) et T h a m a r i (*Genes. XXXVIII. 28*) femina adstitit „quae parere facit” quae „adjuvat in pariendo” (פִּלְרֶת). Dein quoque rex Aegyptiorum P h a r a o *obstetrices Hebraeas* advocavit, easque jussit masculos inter pariendum necare; (*Exod. I. vs. 15. sqq.*) cet.

Porro solebant infantibus umbilicum abscindere; lavabantur recens nati ut fortiores fierent, sale conspergebantur, et linteaminibus involvebantur. (*Ezech. XVI. 4.*)

§. 4.

Casus par-
tus difficili-
in V. T.

Occurrunt in V. T. ipso jam tempore simplicissimae vitam agendi rationis, casus nonnulli partus difficilis, inter quos partus, quo R a c h e l obiit; partus porro T h a m a r i s, et partus uxoris P h i n c h a s i, filii Elii pontificis.

Casus R a c h e l i s ita describitur (*Gen. XXXV. 16, 17, 18.*): „Quum autem Bethel profecti ab „Ephrata una statione abessent, peperit R a c h e l, „et quidem difficulter. In quo partu quum aegre enten- „tem obstetrix sine metu esse juberet, quod is quoque „mas esset: illa animam agens (nam in eo nixu mortua

„est) natum Benonim vocavit;” id est *filium dolorum*, hoc nomine significans quaecunque filii gratiâ pati debnerit. Nos docet hicce casus, quam parum illo tempore exulta fuerit ars obstetricia: illi Rachelis partui certe comitabantur plura praeter consuetudinem: Rachel enim antea sterilis, et ideo invidiosa erga sororem Leah, (*Gen. XXX. 1.*), forsam jam provectionis fuit aetatis, primogenitum Josephum partu edens. Secundi partûs tempore, (ex computatione Bonfrerii quinquaginta annos jam nata¹), multis etiam ex itinere difficultatibus praegressis, viribusque post diu protractos dolores exhaustis, atoniâ uteri, forsam quidem haemorrhagiâ, in pariendo mortua est; quibus mederi ignorabat obstetrix, parturientem modo spe partûs instantis, consolans „ad egredientem usque ejus animam;” — quia illo tempore obstetrices doctrinam perduxerant ad solam confidentiam viribus naturae, consolationem et patientiam (Conf. quoque Osiander; *Pragmatische Geschichte pag. 44* et von Siebold: *Geschichte der Geburtshülfe I. p. 34 et 35*).

Alter casus Thamaris, qui occurrit in eodem libro *Geneseos Cap. XXXVIII. v. 27-30*, ita describitur: „Et quo tempore pariebat, et ecce! gemini (erant) „in ventre ejus. Quum autem pariebat, et porrexit (dedit) „manum. Hanc igitur obstetrix corripuit, eique alligavit „(filum) coccineum, dicens: „iste egressus est primus.” „Et fuit cum retraxerat manum suam, et ecce! egres- „sus est frater ejus et dixit (obstetrix): „quid rupisti! „super te ruptura!8) et vocavit nomen ejus Pharez

1) Alt. haben: „ignare propter te rupisti talem rupturam” quod

«(ruptura,). Et postea egressus est frater ejus, «in cujus manu erat (filum) coccineum, et vocavit «nomen ejus Zarach.» Est probabiliter casus versionis spontaneae, ante nostram aetatem vix bene cognitae: prioris enim infantis prolapsa est manus, ad quam obstetrix adnexuit filum rubrum, quo dein pateret illum infantem primum exiisse, igitur esse primogenitum; hic autem postea sponte manum retraxit, et alius infans venit. Cl. S l e v o g t 9) ex ultima parte versûs 29 putat, illo partu perinaeum fuisse ruptum, et quidem talem adfuisse rupturam, quae nomine *rupturae perinaei centralis* venire solet, adeoque infantem fuisse natum trans perinaeum. Hujus quoque abnormis partus speciei nostra aetate nonnullos casus varii autores publici fecerunt juris 10). Verum huic sententiae Cl. v o n S i e b o l d (l. c. p. 36) assentiri nequit, opinans rupturam, cujus ibi fit mentio, fuisse rupturam velamentorum, et infantem alterum facile nasci potuisse, quia prior infans, manum porrigens, nondum descenderat in pelvis cavitatem.

tamen vero sensu minus convenire puto: — verti uti D a u z, Doctores Anglici, M e n d e l s s o h n ' alique, idque etiam melius accommodatum esse sensui videtur. — Scusus igitur est: «Quare te ita festinas! tibi incumbit ruptura!»

9) *Profusio inaugur^{is} de partu Thamaris difficili; et perinaco inde rupto.* ad. Chr. G. Koch: *diss: exhibens foeminam molâ laborantem.* Jenae 1703.

10) Cf. Busch und Moser: *Handbuch der Geburtskunde in alphabetischer Ordnung.* Berlin. 3810-42. Bd. II. p. 7. sqq. ubi plures tales casus memorantur.

quae ceterum fuisset satis ampla, quia gemelli vulgo corpore sunt minores. Haec omnia licet vera sint, attamen cum cl. von Siebold facere vix possum. Rupturam enim velamentorum cognoverit sane obstetrix: res nempe perquam vulgaris et est notissima. Si animadvertimus, verbum Hebraicum פָּרָה, fere semper significare; *aliquid impetu, vi rumpere*, (cf. *Nehem.* III. 35. *Jesaj.* V. 5 *Eccles.* X. 9.), et perpendimus *Tha'mare'm* tunc primiparam fuisse, neque amplius in flore aetatis (uxor enim jam fuerat duorum fratrum *Onani* et *Eri*) tunc mihi non videor longe a vero discedere, si aliqua ex parte cl. *Slevogt* assentior; non vero ei concedo rupturam *centralem* perinaei. Hicce erim casus agit de fenina primipara, ut videtur aetate jam quodammodo provecta, de infaute cum vi et impetu exeunte, sustentatione perinaei procul dubio neglecta: novimus nimirum, feminarum primipararum *ejus* aetatis perinaeum saepe esse rigidum, et sic facile ad rupturam esse dispositum, imprimis si non bene sustentetur. Accedit altera causa satis frequens rupti perinaei, si infans celerius exit nec debitas situs mutationes perficiens. (Vid. *Busch und Moser. l. c, Bd. II. p. 13.*) Ex quibus omnibus concludo casum *Thamaris* pertinere ad versiones spontaneas cum ruptura perinaei, a frenulo pudendorum incipiente.

Partum gemellorum, aliquo sensu etiam abnormem, narratum reperimus *Gen.* XXV. 24. sqq. Agitur nempe de *Rebekka*, patriarchae *Isaaci* uxore, quae gemellos enixa fuit, cujus prior rufus et omnino pilosus

erat, et alter situm habuerat perversum, manu nempe praevia calcem fratris tenente.

In libro I. Samuel, cap. IV. 19 *sqq.* memoratur partus, quo obiit uxor Phincha e; quemque auctor hujus libri ita descripsit: »Ejus quoque nurus, Phinchasi uxor, »gravida, et jam vicina partui, postquam captae arcae »Dei mortuique soceri sui atque viri famam accepit, »doloribus correpta subsedit 11) atque peperit. Quam »moribundam quum hortarentur quae adstant, »ut bono esset animo, filium enim peperisse: illa »nihil respondit, neque animadvertit." E sensu verborum, »convertebantur in eam dolores ejus" nonnulli, vocem צירם Talmudico sensu accipientes, et *orficium uteri* vertentes, contendunt, feminam retentione placentae fuisse mortuam (Abarbanel). Siquidem vero sequens versus mortem feminae memorat, ea verba modo hic adducta censerem, ut causa pateret subiti illius partûs: accedit, semper in V. T. צירם tali in casu significare *dolores ad partum*, et nihil aliud. (*Jes. XXI. 3. XIII. 8 Dan. X. 16. etc.*) Magis ergo haec mihi placeret explicatio: dolores subito fuisse abortos et quidem magnâ vehementiâ, cujus causa fuit animi pathema; hic igitur locum habuisse Hyperdynamiam uteri, quam vulgo sequitur adynamia, paralysis uteri, haemorrhagia atonica, et moris ex virium exhaustionem. Hicce casus iterum probat, quam parum auxiliî feminae adstantes vel obstetrices attulerint, praeter solam consolationem!

11) Proprie: «nam convertebantur in eam dolores ejus»

§. 5.

Inter varias *Moses* institutiones, nonnullae quoque *Mosis in-*
occurrunt quae feminas ipsas spectant. Ad has referen- *stitutiones de*
dae imprimis diaeteticae illae leges, quas *Moses* tulit *feminis men-*
de feminis menstruantibus et puerperis. Illis *struantibus,*
sequentia posuit legislator: (*Levitic. XV. 20. sqq.*): *fluentibus, et*
puerperis.
»Mulier, quae patietur menstrua, fluente ex ejus corpore
»cruore, septem dies seorsum degito: eam quisquis teti-
»gerit, pollutus esto ad vesperam. Quaecumque in re
»decubuerit, donec in menstruis erit, ea res polluta
»esto: cuicumque rei insederit, ea res polluta esto.
»Quisquis ejus lectum tetigerit, vestimenta sua lavato,
»aquaque perluitor: et ad vesperam pollutus esto." *Vs. 25*
»Si vir cum menstruali cubuerit, et ejus menstruis con-
»tactus fuerit, septem dies pollutus erit: omnisque lectus,
»in quo is cubuerit, pollutus erit. Mulier, cui cruor de-
»fluet complures dies alieno a menstruis tempore, aut
»cui ultra menstrua defluet, toto illius immunda fluxus
spatio, perinde ac menstruorum tempore, polluta esto.
»Omne cubile, super quo decubuerit, quamdiu fluxum
»patietur, eadem conditione habetor, ac cubile mensium.
»Omne utensile, super quo sederit, pollutum esto, perinde
»atque in mensibus. Quisquis ea attigerit, polluetur,
»vestimenta lavato, aquaque perfunditor, et ad vesperam
»pollutus esto. Quod si fluxu purgata fuerit, agat dies
»numero septem, et ita denum pura esto." Mulier tali
haemorrhagiâ inquinata, sacrum quid facere debebat,
forsan quia auctor horum praeceptorum talem haemor-
rhagiam habuit morbum genitalium. Similem opinionem

veteres fere omnes fovebant 12); quin hodieque disputatur, num quidem coïtus cum femina menstruante sine omni periculo sit nec ne. Iis autem legibus non solum videtur inesse utilitas quaedam physica, sed etiam moralis: horrore enim immunditiae, et timore eorum quibus homines ad bruta accedant, Moses, legislator sapientissimus, populi sui cupiditates et libidines quantumpotè coercere voluit vinculisque restringere. Israelitae „filii Dei” sacri debebant esse coram Deo, qui Ipse sacer est. (L. Philippson. *Die Israëlitische Bibel etc. I. Leipzig 1844. S. 626.*) Posteriore tempore Rabbini, exemplum Mosis sequentes, illa praecepta latius extenderunt 13).

12) Plinius. *Histor. Natural. Lib. VII. c. 35*: „Nihil inquit” facile reperiatur mulieris profluvio magis monstrificum. »Aescunt superventu musta, sterilescent tactae fruges, moriuntur vinsita, exuruntur hortorum gemina, et fructus arborum, quibus vinsidère, decidunt; speculorum fulgor aspectu ipso hebetatur, »acies ferri perstringitur eborisque nitor, alvei apium emoriuntur, »aesc etiam ac ferrum rubigo protinus corripit, odorque dirus aera” cet. — Etiam Aethiopes, multique alii populi inculti mulieres in tali conditione versantes, separant et impuras habent. Nunc imo in plurimis Europae regionibus, in nostra quoque patria, vulgus menstruantes feminas ad saliendam carnem vel condenda legumina, aliaque, non admittunt; quia sanguis ea ratione excretus creditur impurus, dissolutus, venenatus, a qua nociva materia corpus per illam *depurationem* (uti quoque vocatur) liberatur, quum feminarum illarum praesentia fermentationi et incremento nocere deberet. Est profecto opinio praejudicata, nullis nitens factis, cui nimiae patriae munditiae tamen condonari potest, quippe non nocenti.

13) Vide *Talmud Babylonicum*, passim, et praesertim *Tractatus Nidda* (de menstruantibus feminis et menstruatione) et *Sawin*

Eaedem fere rationes legislatorem compulisse videntur, ad sequentes ferendas leges de feminis parturientibus (*Levit. XII. 2. sqq.*). »Mulier, quae concepto semine marem pepererit, polluta esto septem dies, videlicet pro ratione spatii, quo in menstruis esse solent. »Octavo die circumcidatur fetus membri praeputium. »Ipsa triginta tres dies in cruore purificationis suae esto, neu quid sacrum tangito, neu in sacrarium intrato, nisi confecto ejus purificationis spatio. Sin autem feminam ediderit, bis septem dies polluta esto: hoc est, bis tamdiu, quamdiu durant menstrua, ac sex et sexaginta dies in cruore suae purificationis esto.”

Profecto suspicor, hasce leges ferentem legislatorem iisdem rationibus fuisse ductum, quas secutus est in legibus de feminis menstruantibus et fluentibus. Singularis tamen videtur differentia inter dies purificationis post partum puellae vel pueri, in priore casu nempe 66, in posteriore 33 dierum. 14). Idem consilium ad

(de fluentibus). Cf. Maimonides in *Jad Hachasaka: Hilchoth Issure Biath. Joreh Diah: Hulchoth Nidda*, aliosque multos.

14) Auctor libri *de natura pueri* fere idem statuit, dicens: »cujus rei fidem faciunt partus purgamenta, quae quidem si suscepta puella fuerit, duobus et quadraginta diebus contingunt, si vero masculus editus fuerit, quam longissime triginta diebus” (*Hippocratis. Opp. omn. Ed. Foes. 3595. Sect. III. p. 39*) Arete quidem cohaeret, uti videtur, doctrina haec cum illaquam veteres de discrimine incrementi puellae et pueri somniarunt; et forte quoque in illo climate calidiore lochiorum fluxus diutius protrahitur quam apud nos. Talmudici rationem peculiarem citant, quare puerpera pisculum ferre debebat (*Nidda, fol. 31. b.*) »Rogarunt discipuli רב ר. Schimeon filio Joehai: quamo-

has leges ferendas habuisse videtur *Moses*, uti ad illos de menstruantibus, sed magis explicite; sacrificia quae, diebus purificationis absolutis, ferre debebant, id satis probant 15).

§. 6.

Ej tlogus.

Haec sunt quae exordii adinstar, de arte obstetricia e V. T. dicenda habui. Parum quidem ad artis obstetriciae historiam literariam faciunt; id tamen ex iis colligere possumus, obstetricantes feminas semper adstis-
tisse parturientibus, virorumque auxilium fuisse dam-
natum. Ad quod efficiendum, multum sane contulerunt
etiam praecepta de purificatione parturientium, uti et
feminarum menstruantium. In illis regionibus calidis,
Aegypto, Palaestina et Arabia, mundities corporis
non satis umquam curari potest; et hoc praesertim
modo *Moses*, de hac re adeo sollicitus, optime
cavere potuit, ne isti propagarentur morbi contagiosi,
qui saepissime hasce fertiles regiones devastant et
depopulantur.

*»rem dixit lex, a puerpera sacrificium esse ferendum? Dixit us:
»hora illa qua inclinet ad pariendum concludit et jurat: se marito
»non iterum aggressuram» et quum post partum mulierem juris
jurandi illius poenitet — hanc ob causam dixit Lex, afferat sa-
crificium. . . »Et quare dixit lex: mas ad septim et puella ad qua-
»tuordecim (Respondet) Mas: de quo omnes lactantur, foeminam
»jam poenitet die septimo (juris jurandi); puella, ob quam omnes
»moesti redduntur, foeminam poenitet ad quatuordecim!»*

15) Fusius de praeceptis illis agit doct. Sybbrandi: Diss
laud. p. 53 - 67.

II.

DE TALMUDE EJUSQUE CONFECTIONE 1).

§ 7.

Post innumeras fatorum vicissitudines, secundas et ad- *Traditionis origo.*
versas, post fertilissimae regionis possessionem decem
fere saeculorum, gens Hebraea e patria sua est ex-
pulsa, templo Dei in cinerem verso, Hierosolymis devas-
tatis, ipseque demum populus inter alias gentes dis-
persus. Annis fere ducentis ante, magna pars gentis
Hebraeae in Assyricam captivitatem fuit ducta, et tandem
Judaea ipsa hostibus fuit demolita, incolaeque permulti
in Babyloniam in exsilium fuerunt ejecti.

1) Ratio, qua incitatus sum ad sequentia hic inserenda, haec
est, ne quis lector de argumento et origine Talmudis esset incertus.
Lectoribus igitur, quibus non vacat, neque animus est, operam dare
historiae literariae gentis Israeliticae, haec paragraphus notitiam
praebet necessariam ipsius Talmudis, quod fons est hujus dissertatio-
nis: — Literarum Hebraicarum periti hanc, nihil novi quippe exhi-
bentem, omittant. Fontes et duces mihi fuerunt praesertim: Flavii
Josephii opera; — ipsum Talmud Babylonicum; — R Jechiel
ben Salomo, Rabbinus urbis Minsk: *Seder Maddoroth* (ordo
generationum, familiarum.) Carlsruhe 529. 1769. J. M. Jost:
Geschichte der Israeliten nach den Quellen bearbeitet. IX Thl.
Berlin 1820-29, cet.

Praeterlapsis autem, uti dicitur, septuaginta annis, ipso imperio Assyrico a Persis everso, jussu regis Cyri ad aras et focos redierunt Jisraëlitae; qua vero concessione non omnes hujus gentis exsules fuerunt fructi; multi enim Jisraëlitae in Babylonia remanserunt, et minima tantum pars, ducibus Ezra et Nehemia, in Palaestinam rediit. Prima in cura fuit Ezrae et Nehemiae, templum Hierosolymis rursus exstruere et condere, populumque Dei verbo iterum instruere: — idque! perneccesarium fuit!

Jam dudum enim in oblivionem fere abierat Lex Mosaïca. Itaque ut antea Rex Josyah eam legem, ut novam, populum docuerat, ita Ezra eandem restituere studuit; solus autem id exsequi non potuit: elegit ideo ex populo viros peritissimos, uti fertur numero CXX, qui sibi auxilium praestarent. Hoc virorum doctorum collegium, nomine *Synagogae magnae* celebratum fuit. Multa exemplaria S. S. inter populum distribuebantur, et ipse Ezra plura eorum scripsisse dicitur; quamobrem et *Scriba* cognominatur. Sed non solum ipsum contextum Sic Sic populum de novo doceri oportebat, verum simul variae illae traditiones, quae a patre ad filium per saecula transmissae fuerant, resuscitandae et colligendae erant. Secundum Talmudicos enim, duae formae sunt legis Mosaïcae; prior quam ipse Moses scripserat, *lex conscripta*, תורה שכתב, et altera quae a Mose Jehosuae, et sic a prophetis aliis prophetis, a patre filio tradebatur, *lex oralis*, תורה שבעל פה.

§ 8.

Interea variae inter populum Judaicum oriebantur *Scholarum origo et fala.* sectae religiosae; qui traditiones foverunt, Pharisei et Essaei; et denum Samaritani et Sadducaei, qui explicationem simplicem S. S. nullis immixtis traditionibus sequebantur. Sectae illae quatuor snos quoque assecclas habebant inter membra collegii supremi vel *Synhedrii magni*. Illud *Synhedrium*, tempore, uti videtur, Chasmoneorum institutum. Senatus supremus vel cura judicialis suprema fuit: constabat 71 membris, quibus praeerant praeses (*Nasi*) et vice-Praeses (*Ab Beth-din, pater curiae judicialis*). Membra e populo eligebantur, et omnium fere scientiarum periti debebant esse, neque minus in multis linguis versati. Judicabant de pace et bello, de rebus poenalibus et civilibus, et etiam legislationis praeerant. A. circiter 56 a. Ch. N. Gabinius, dux Romanus, dissolvit *Synhedrium*.

Imminuente auctoritate illius collegii, inter populum increvit doctrinae desiderium; et doctorem auditoria juvenes innumeri implebant, cupidi audiendi varias et antea nunquam auditas explicationes S. S., et desiderio capti se immiscendi discussionibus, quae semper movebantur si de explicanda aut amplificanda quadam lege fuerit sermo. Sic factum est, ut brevi tempore insurgerent variae Scholae, inter quas Schola Rabbini Hillelis illaque Rabbini Schammai principes fuerunt. Aetate horum Rabbiorum Schammai et Hillelis, numerus traditionum ita accreverat, ut in sexcentos ordines jam dividerentur, alii quidem dicunt septingentos. (*Talmud Babylonicum, Tractatus Chagiga, fol. 14 a.*) Hillel

hasce traditiones ad sex ordines primus restrinxisse videtur 2).

Captis Hierosolymis (A^o. 70. p. Ch.), multi doctores in illa clade interierunt; sed multi aufugerunt, Jamniamque (Jabne) adierunt, urbem non procul ab Hierosolymis sitam. Huc jam ante bellum Titi adversus Judaeos, R. Gamaliël, nepos Hillelis, se contulerat Scholamque ibi condiderat. Haec Schola, postquam advenerant fugitivi Rabbini, inter quos imprimis memoratur R. Jochanan, filius Saccai, brevi temporis spatio auctoritate adeo increverat, ut Jamnia fieret locus, versus quem omnes viri docti adierunt. R. Gamaliël sua auctoritate mox Synhedrium restauravit, et titulum assumpsit *Principis (Nasi)*. Schola illa, vitis quoque *Jamnensis* vocata, post cladem magnam, regnante Imperatore Adriano (135 p. Chr.) iterum restaurabatur. Sed nondum satis erat persecutionum: post varia fata Schola quoque Jamnensis interiit; Rabbini migraverunt in Tiberiadem, urbem in Galilaeae gratissima regione sitam; novamque ibi Academiam fundaverunt, praeside R. Schimeone, filio R. Gamaliëlis II. (circa 180 p. Ch.). Mortuo R. Schimeone, praesidium Academiae Tiberiensis transiit ad filium suum R. Jehudam, cognomine *Sancti (Hakkadosch)*, *Principis (Nasi)* insignitum, vel etiam κατ' ἐξοχὴν Rabbi nominatum.

§ 9.

*Mischnae
confectio.*

Summa cura R. Jehudae fuit, ut Jisraëlitae leges suas accuratius cognoscerent; et hinc omnes intendit vires

2) Patent haec ex dictis Jonathanis Ben Uziel, interpretis Chaldaei nonnullarum partium V. T. et discipuli Hillelis, ad Exodum XXVI. 9 et Cant. Cant. I. 2.

ad creandos quam plurimos Verbi Divini magistros, ut hoc facto finem imponeret tot litibus et dubiis, quae inter Hebraeos de religione, vel de vita privata, vel etiam de rebus civilibus, secundum jus Judaicum, possent suscitari. Quod ut fieret, collegit R. J e h u d a h omnes traditiones et decisiones Rabbiorum, qui antea vixerant et docuerant omnia, quae ad jurisprudentiam, vitanque civilem et religiosam pertinerent. Ante eum R. E l e a z a r, H y r k a n i filius, R. A k i b a aliique fere idem tentaverant, et magister *roŭ* Rabbi, R. M e i ě r, jam multa collegerat. Hoc modo Rabbi finem imposuit Scholis legislatoriis, quarum decisiones varii argumenti collegit et ordine digessit jam dudum sancito. Opus R. J e h u d a e nomine *Mischnae* venit, quod significat *Δευτερόνομον*, *legem iteratam*.

De aetate, qua R. J e h u d a scripserit Mischnam, diversam auctores fovent opinionem. O t t o (*Hist. Doct. Misnicorum, recus. in Wolff Biblioth. Hebraea, T. IV, p. 424*) putat anno 120° post vastatum Templum secundum, igitur 190° p. Ch., — J o s t (*l. c. T. IV, p. 96 sqq.*) statuit anno 250°; alii iterum A° 220° p. Chr., et M o r r i n u s (*Wolff, Bibl. Hebr. T. II, p. 674. sqq.*) imo contendit, Mischnam seculo sexto fuisse elaboratam. Horum autem illi veritati videntur proximi, qui tempus confectae Mischnae determinent inter annos 200 et 250 p. Ch. Referuntur in illo opere dogmata sententiaeque Rabbiorum, quorum plurimi non ante regnum H e r o d i s vixerunt, nonnullis tamen exceptis qui vetustiores sunt. (J o s t *l. c. IV. 105. — H e r o d e s vixit circiter ab anno 50 ante Chr. N. ad annum 3 post Chr. N.*) Attamen in ipsam Mischnam etiam recepta sunt dogmata nonnulla aequalium dicti Rabbi, imo eorum qui post eum vixerunt.

Fontes, e quibus hausit *R. Jehudab*, nobis omnino fere latent. Ipsa traditio ita confusa erat, ut vel ignorarent qui antea, imprimis ante *Herodem*, Praeses vel vice-Praeses Synhedrii fuerint 3). Legimus quidem, uti jam dixi, *R. Eleazarem*, *Hyrkani* filium, atque *R. Akibam* (100 p. Chr.) commentationes nonnullas scripsisse, — etiam ajunt, *R. Jehudam*, filium *Ilai*, commentarium in librum *Leviticum* composuisse, cet; quidquid autem sit, id certum est, *R. Jehudam* labore suo immortalem sibi comparasse famam.

Ab hoc inde tempore in omnibus Scholis Rabbini occupati erant in amplificandis et explicandis dogmatibus, in *Mischna* reservatis; commentariis haec illustrabant, et demum inquirebant in rationes et causas variarum sententiarum in *Mischna* a Rabbiniis prolatarum. Haec commentaria nomine veniunt *Gemarae*, h. e. *perfectionis, clausionis*.

Talmud Hierosolymitanum in lucem editur.

Scholis Palaestinae sensim sensimque decreascentibus, auctor anonymus compilavit et collegit omnes sententias horum doctorum *Gemaricorum*, et opus illud in lucem edidit, quod nomine *Talmudis Hierosolymitani* celebratur (circiter A° 370 390 p. Chr.). Auctor hujus operis non est cognitus; putant tamen, eum esse *R. Jochanan*, qui ea aetate vixit. *Talmud* illud *Hierosolymitanum* non integrum ad nos pervenit, cujus quippe operis remansit tantummodo fragmentum.

§ 10.

Talmudis Babylonicus origo.

Majorem explicationem *Mischnah* acquisivit in Scholis *Babylonicis*. Jam dixi, tempore *Ezrae* non omnes

3) Hujus rei testimonium affert *Mischnah* in Tractatu *Chagiga*, fol. 16 a et *Gemara* hujus *Mischnae*, ib. fol. 16 b.

exsules Palaestinam rediisse, sed multos in nova sua patriâ mansisse. Condiderunt illi multas colonias, imprimis ad littora fluminum Euphratis et Tigridis Praefectus eorum nomen gessit *Resch Gelutha* (*Caput, dux, princeps exsilii*) atque omnibus rebus civilibus praeerat: res religiosae tamen e Palaestina gubernabantur. Primo tempore cives erant Persici; postea vero in Parthorum venerunt potestate. Multi juvenes Scholas tunc frequentabant Rabbinorum Tiberiensium, et ita semper fuit commercium inter Babylonicos Judaeos et Palaestinenses. Confectam Mischnam ad has quoque colonias mox transtulerunt duo discipuli ipsius R. Jehudae, Abba Aricha sc. et Schemuël, ambo amicitia et doctrinâ conjunctissimi. Quo magis decreverunt Scholae Palaestinenses, eo magis inclaruerunt Scholae Babylonicae. Schemuël Academiam condidit in urbe Nehardea, ad Euphratem flumen, — sodalis suus Abba Aricha in Sura vel Matha-Mechasja, etiam prope Euphratem flumen; dum tertia Academia in urbe Pumbeditha, inter Tigridem et Euphratem, fuit condita (A° 250—260 p. Chr.). In iis Scholis quam maxime colebatur Mischnah: et tandem Academia Surensis prae aliis claritate innotuit, imprimis praeside R. Asche.

Tempore enim, quo R. Asche praefectus hujus Academiae fuerat designatus (circiter A° 350 p. Chr.), tota doctrina Mischnica in summa versabatur confusione. Mischnae quidem exstabant exemplaria, quae autem variis lectionibus a textu originali discedebant. Insuper ex singulorum doctorum diversa opinione, multifariae prodibant explicationes, quibus summa oriri debebat confusio. Talmud Hierosolymitanum non sufficebat, nec debitum conspectum, nec ordinem ullum sequendum praebebat;

et denique omnia, quae in scholis Babylonicis docta fuerant, in illo opere deērant. Haec quum expertus esset R. A s c h e, eundem laborem de novo perficere suscepit; omnia, quae ab antecessoribus erant divulgata, colligere et in unum redigere animo concepit. Quod ut melius et accuratius fieret, totum corpus juris Judaeorum in sexaginta divisit partes, quarum duas singulis annis perfecit:— et quidem ita: quocumque dimidio anno concilium convocavit discipulorum, ex omnibus scholis totius regionis: — in illo concilio, adjuvantibus decem interpretibus, disseruit de partibus alicujus divisionis (*Tractatus, Masichtoth*), et simul suis auditoribus mandavit omnia colligere, quae de illo argumento vel tradita erant vel in scholis acta. In sequente concilio, de eadem re iterum agebatur, variaeque sententiae argumenti audiebantur; et ex omnibus illis fragmentis unum opus constituit. Textus erat Mischuah, cui addebantur explanationes, quae notatae erant, comparatio variorum dogmatum oppugnantium, res de illis actae, immixtis simul multis narratiunculis, sententiis moralibus, annotationibus, cet. Triginta annis praeterlapsis, opus erat perfectum: sed nondum sufficebat. Vixit R. A s c h e adhuc annos triginta post perfectum opus; et adjuvante discipulo suo A b i n a, totum opus, eodem modo ac prima vice, recensebatur, multaque in eo mutabantur; ita ut ad finem vitae R. A s c h e s ut novum fere opus Talmud exstaret anno 350—430 p. Chr. 4).

Haec est origo Encyclopaediae illius magnae, quam

4) Sententias eorum, qui Talmud declarent serioris temporis opus, attamen immerito, vid. apud Wolff, *Bibl. Isrl.* T II, p. 613. sqq.

nomine *Talmudis Babylonici* novimus, quae vero non ante initium Seculi VI. videtur divulgata.

§ 11.

Constat Talmud Babylonicum duabus partibus, *Mischnâ* et *Gemârâ*. *Mischnah* ipsa est textus, continens legis Mosaïcae repetitionem et latiore explicationem, cui accedunt multa, temporibus et regionibus accommodata pro variis vitae temporibus et regionibus ipsorum auctorum. Altera pars est *Gemara*, quasi supplementum vel complementum textus *Mischnici*: continet nempe latiore explicationem et decisiones Rabbiorum cum rebus de iis actis in *Mischnam*. Denique est *Talmudis Babylonici* argumentum, explicatio *Sae Sae*, continet praecepta vitae religiosae et politicae, omnium fere quae exstent jurum, tam civilium quam poenaliū expositionem, jurisdictionem civilem et criminalem, variasque discussiones de his argumentis in scholis vel aliis locis habitas, dum singuli doctores opiniones suas rationibus illustrant. His immiscentur anecdota, narratiunculae, sententiae morales, notitiae historicae vel Rabbiorum in *Talmude* obvenientium, vel totius gentis *Judaïcae*.

*Talmud.
Babylonici
recensio.*

Nemo ergo mirabitur, in tali farragine multa occurrere, quae ad historiam aetatis *Talmudicae* pertinent, multa quoque, quae ad *Medicinam*, *Physicam*, *Astronomiam* cet. referenda sunt. »Sunt in eo,» inquit *Buxtorff*, »multa *Juridica*, multa *Medica*, *Physica*, *Ethica*, »*Politica*, *Astronomica*, et aliarum scientiarum praeclara »documenta, quae istius gentis et temporis historiam »mirifice commendant. Sunt in eo illustria ex antiquitate »proverbia, insignes sententiae, acuta apothegmata, scite

«prudenterque dicta innumera, quae lectorem vel meliorem vel sapientiorem reddere possunt, et ceu rutilantes «gemmae non minus Hebraeam linguam exornant, quam «omnes Latii et Graeciae flosculi suas linguas condecorant» (Buxtorff junior, in *Epistola dedicatoria Lexici Talmudici patris*). Neque nos aliud iudicium de Talmude ferre valemus; et omnia, quae bona Buxtorff, iudex certe peritissimus, dixerit, nostra facere non dubitamus. Attamen Talmud quoque criteriis suae aetatis abundat: valet de auctoribus et de omnibus Rabbiniis qui in illo opere occurrunt, illud Terentianum: «homo sum, et nihil humani a me alienum puto.» Mirum etenim in modum aliquando distortent legis Mosaicae verba et rationem, et ad singularem confugiunt exegesis, ostendentes omnia instituta, imprimis religiosa, lege illâ niti; ex ea hauriunt praecepta, quae suo tempore nec Moses, nec successores ejus somniaverunt. Non autem mirandum, cum plurimis bonis, quibus certe maxima pars Talmudis constat, multa mala esse commixta, — si rationem habemus aetatis qua vixerunt, et regionis in qua habitaverunt, omnium fere daemonum et fabularum patriâ!

§ 12.

*Ordinem
Talmudis
Babylonici
enumeratio.*

Talmud Babylonicum divisum est in VI Ordines, quorum singuli nonnullos continent Tractatus, *Massich-toth*, vel subdivisiones. Ordo I^{us}, *Seraïm*, de seminibus, agricultura et de precationibus, continet Tractatus XI; — Ordo II^{us}, *Moëd*, de diebus festis, habet tractatus XII; — Ordo III^{us}, *Naschim*, de feminis, matrimoniis, divorciis cet., dividitur in VII Tractatus; — Ordo IV^{us},

Nesikin, *de damnis*, praecipua jurisdictionis civilis et criminalis continet, et est flos jurisprudentiae Judaicae; habet Tractatus X; — Ordo Vus, Kodaschim, *de sacris*, continet Tractatus XI; — et Ordo Vlus, Tchoroth, *de purificationibus, de rebus mundis et immun- dis*, divisus est in Tractatus XII 5).

§. 13.

Uti opera omnia veterum, sic quoque Talmud Babylonicum suos habuit commentatores; neque pauci sane fuerunt, qui Talmud vel totum vel ejus partem explicaverint notisque illustraverint. Inter viros, qui toti Talmudi commentarium adjecerunt, eminet praeclarus R. Salomo ben Jzak, vulgo Raschi vel Jarchi dictus. Natus fuit ille A° 1040, Angustomanae (Troyes) in Campania Gallica, vir eruditionis summae, permultarum scientiarum peritissimus; commentator eximius. Diem obiit supremum aetate annorum 64, anno 1104. Alter commentator totius Talmudis fuit R. Jakob, filius Meïrî, vulgo Rabbenu Tam, nepos Raschiî; ejus commentationes, una cum Collegarum opere, nomine Tosephoth (*Additamenta*) celebrantur.

Inter eos qui Talmudis partem, Mischnam nempe solam, explicaverunt, maxime eminet summus Maimonides 6). Alius exstat commentarius totius Mischnae

5) Uberrimam recensionem horum tractatuum invenies in Wolf, *Biblioth. Hebraea*, P. II, p. 744-754. — Omnes illi Tractatus LXIII. in editione Amstelredamensi, qui usus sum, continentur XII tamis in folio, qui simul sumti efficiunt plus quam sex millia paginarum; nempe 6140.

6) R. Moses filius Maimouni, vel Maimonides,

*De commen-
tatoribus
Talmudis
Ba'ylaurer.*

cujusdam R. Obadiae ex Bartenora, urbe Italiae, qui in fine seculi XVI et initio seculi XVII floruit, et de cujus fatis id solummodo innotuit, quod in Palaestina degit et per totam vitam studiis Theologicis incubuit. Tertiū commentarii in Mischnam auctor fuit R. Jom Tow Lipman, Rabbinus Pragensis, qui seculo XVII^o ineunte vixit.

natus Ao 1137 Corduae in Andalusia, eo tempore sub Arabum imperio, fuit discipulus Averroës, a quo Astronomiam, Philosophiam et Artem Medicam didicerat. Per omnia secula Maimonides summis ornatus est laudibus, et primus fuit, qui religionem Jisraëliticam philosophiae luce illustraverit, praecipue in opere suo nunquam satis laudando, *Doctor Perplexorum* (*More Nebuchim*). In totam Mischnam commentarium scripsit, et in alio opere, cognomine *Jad Hachasakah* (*Manus fortis*), omnia praecepta et decisiones totius Talmudis collegit et ordinavit. Sed non solum studiis philosophicis et theologicis praeclarus vir incubuit, verum etiam in Medica arte multum praesitit. Errat Illustriss. Hallerus (*Bibl. Medicin. Pract.*), dicens Maimonidem praxin medicam non exercuisse: testibus enim suis epistolis, Saladdini, Aegypti regis, fuit Archiater, et in epistola quadam ad suorum operum interpretem Samuel Ebn Tibbon, queritur, sibi propter ingentem praxin medicam de die plane nullum esse otium. [*Epistolae, quaestiones et responsiones R. Mosi Maimuni, Amstel. 1732, p. 33. (Hebraice)*] Inter opera sua medica laudantur *Commentarii in Aphorismos Hippocratis secundum doctrinam Galeni*, et *Tractatus de regimine sanitatis*, nuperrime de novo editus. Obiit vir ille praeclarus anno 1207, aetatem agens annorum LXX. — De aliis operibus medicis Maimonidis, editis et non editis, vid. Carmoly: *Histoire des Médecins Juifs*, in diario *Revue Orientale*, T. I, p. 397. sqq. Vir ille doct. citat opera XIX medica Maimonidis. Cf. quoque L. Choulant: *Handbuch der Bücherkunde für die Aeltere Medicin, Zweite Auflage* (Leipzig 1841), p. 378 sq.

INTRODUCTIO.

TALMUDICORUM SCIENTIAE MEDICAE ET OBSTETRICIAE BREVIS CONSPECTUS GENERALIS.

§ 1.

«*In quo illa (scientia universalis) est, in eo omnia sunt, in quo non est, quidnam in eo est? Qui illam acquisiverit, quibusnam eget? qui illam non acquisiverit, quidnam acquisivit?*» (*Nedarim*, 41 a.) Ita cogitabant Talmudici de addiscendis scientiis; et profecto, Talmud pervolventibus multa nobis obvenient exempla, quanti iis fuerit doctrina. Quae cum ita sint, non mirandum, multa bona e variis scientiis ab iis tradita esse: nec omnino ignorabant doctrinas ab aliis gentibus cultas. Legimus enim, R. Schimeonem, filium Jochai, Romae fuisse, et R. Jehudam Sanctum intimam coluisse amicitiam cum Imperatore quodam Antonio; viri illi certe Romanorum literas scientiasque non plane ignorare potuerunt. Magis tamen excoluerunt linguam Graecam (*Megillah*, f. 9a. *Sanhedrin*, f. 100b.); et quod nonnulli e Rabbinis vetaverint lectionem librorum externorum (*Sanhedrin*, 90a.), inter quos referunt quoque Graecos, illud ex eo maxime explicandum, quod ante Templi devastationem a Tito, Sadducaei philosophiam Graecam

Rabbini peregrinae eruditionis non expertes fuerunt.

coluerunt, hique vario modo res Rabbini sacras profanabant (*Baba Kama*, fol. 82 a.). Abunde patet multos Rabbinos Graecis literis indulsisse, uti id de R. Schimeone ben Gamaliël, R. Jehuda Sancto, Schemuele alisque traditur; quibus addendum, multa verba Graeca Talmudico Chaldaïsimo esse intermixta, imprimis in Talmudis parte juridica strictiore sensu: imo linguam Graecam prae omnibus commendant, illiusque pulchritudinem et divitias summis laudibus celebrant. § (*Megillah*, fol. 9 a. b.)

§. 2.

*De arte
Medica et
Talmudic
Babylonico.*

Patet e variis medicis et obstetriciis annotationibus, Rabbinos Graecae eruditionis non solum non fuisse expertes, verum etiam Graecorum Medicorum doctrinam illis fuisse familiarem.

De conditione artis Medicae in regionibus illis, ubi Rabbini degerunt, nil scriptum reperi. Inter Talmudicos quidem fuerunt, uti Schemuël, R. Chanina, Abba Umma, alii, qui certe etiam Medici doctores fuerint creati; in quam autem regione et apud quosnam artem didicerint, non constat. Ex loco quodam (*Nidda*, 30 b) suspicarer, nonnullos Judaeos etiam Alexandriae fuisse assecclas Herophili (circa annos 180—45, a. Ch.); id quod confirmare videtur magnus Judaeorum numerus, in Alexandria habitans. Multos Rabbinos Medicinae fuisse peritos, nec non ipsius Artis Obstetriciae valde fuisse expertos, non mirum videri potest, siquidem in explicandis variis legibus, quae ad rem medicam vel obstetriciam pertinent, Rabbini magna opus esset doctrinae medicae copia: et quanam haec fuerit, dein tradam. —

Videtur immo nonnullis in regionibus ubi Talmudici degerunt, collegium quoddam medicorum exstitisse: legimus enim (*Nazir*, 52. a.) quum de ossibus, in templo fabrarum aerariarum repertis, quaestio quaedam mota fuerit, advenisse Tudum (*Theodorum*) Medicum, „cum omnibus Medicis,” ut pronuntiarent num illa ossa unius, vel plurium cadaverum essent 1). Immo videntur Rabbini de quaestione propositâ difficili Medicos consuluisse (*Nidda*, fol. 26 b.); fuit nempe casus abortus, qui curam Rabbini ferebatur, hique consilium petierunt a Medicis. Ex quibus possumus intelligere, quanti Medicos et Medicinam Rabbini habuerint: et mirum itaque mihi videbatur sententia illa in *Kidduschin* (fol. 82 a.) שׂכ שׂכרופאים לְגִיהֶנָּם „*optimus inter Medicos ad Gehinnom.*” (i. e. *ad inferos abit*). Commentator Jarchi adjicit: „quia aegrotum non aestimant medici, et ei porrigunt cibos pingues, et non vertunt animum ad Deum, et nonnumquam occidunt animos, et est in potestate eorum pauperibus mederi, eosque tamen non curant.” Credo tamen, rationem aliunde esse quaerendam: Medici aetatis Talmudicae addicti erant Philosophiae Graecae, adeoque omnibus nugis religiosis Rabbiniticis non obtemperabant; — tunc forsam jam uti dein dicebant Theologi: „Tres medici, duo Athei.” Non omnes tamen Rabbini ita cogitaverunt; et plurimi ipsi Medicae scientiae nec non Medicis valdequam indulerunt. Nam in Tractatu *Sanhedrin* (fol. 17 b.) dicunt: „omnis eruditus non debet habitare in urbe aliqua, ubi inter alia etiam deficit medicus.”

1) Tudum illum alio loco iterum offendimus. *Bechoroth*, fol. 8 b. in *Mischnâ*.

§ 3.

Continuatio.

Quodad scientiam medicam ipsam: hic et illic in disceptationibus Talmudicis circa leges et casus multae res medicae pertractantur. Anatomicam et physiologicam cognitionem praesertim quidem e brutis depromserant; verumtamen indagationes cadaverum humanorum non desiderantur. Legimus enim in *Bechoroth* (fol. 45 a.): »Dixit R. Jehuda: dixit Schemuël: Accidit discipulis R. Jismaëlis, ut concoquerint (עִשְׂלָקִי) meretricem aliquam, quae ex jussu regis ad ignem erat damnata; scrutarunt et invenerunt ducenta quinquaginta et duo (membra) 2).»

Multa anatomica reperies in Cap. III. Tractatus *Chulin*, ubi agunt de morbis et defectis, qui bestias ineptas reddunt ut edantur. — Quodad Physiologiam, inprimis agebant de generatione, graviditate et embryologia, — physiologiae partibus apud veteres omnes in tantis deliciis! — Eorum Pathologia vere humoralis

2) Sic et in *Nidda*, fol. 30 b. cadaverum humanorum sectiones memorantur, quae regnante regina Cleopatra fuerunt institutae (vid. inferius sub *Embryologia*); quamvis tamen regione sectio supra memorata fuerit instituta, nescio. Nec tam certum est, quisnam fuerit ille R. Jismaël; quoniam duo fuerunt ejus nominis: unus fuit R. Jismaël, filius Elischae, pontifex, qui vixit initio Seculi II.; alter R. Jismaël (nepos alterius) vixit Seculo Io. p. Chr. ad finem vergente, fuit R. Akiba aequalis et socius, adultus jam fuit A. 75, p. Chr. et illum censerem doctorem, cujus discipuli meretricem illam dissecaverunt. Est idem, qui etiam in *Nidda* (L. c.) cadaverum sectiones memorat, et videtur revera Medicinam exercuisse. (*Midrasch Schemuel*, C. IV. apud Carmoly: *Revue Orientale*, I, p. 298.) Cf. ulterius: *Seder Haddoroth*, fol. 325 b., 326 a.

fuit; perhibent enim plerorumque morborum causam in sanguine haerere (*Baba Bathra, fol. 28 b.*). Sternutatio, sudor, solutio ventris, seminis nocturnus fluxus vel polutio, somnus et somnia in morbis si obveniant, bouam admittunt prognosin (*Berachoth, fol. 57 b.*).

Symptomata morborum si traduntur, plerumque paucissima enumerantur et valde obscura. In eorum Therapia vinum, oleum olivarum et aromata primas tenent partes. Venaesectiones magnis celebrabant laudibus; immo suadent, corpore quantumvis sano, omnibus triginta diebus venam secare (*Sabbath, fol. 129 b.*); et nonnunquam quidem una vice totius quantitatis sanguinis qua corpus gaudet, partem quadrantem!! (*Ibid. fol. 129 a.*). Multa vero remedia absurda sunt, uti satis patet ex Tractatu *Gittin, fol. 68 sqq.* agente de variis remediis multis in morbis. Attamen qui talia remedia in usum vocabant Rabbini, recentioris praecipue erant aetatis; sic v. g. *Abaje*, qui floruit medio seculo IV, auctor fuit rerum quam maxime absurdarum, neque minus laudator curationum per incantationem, licet Doctores Mischnici omnes incantationes scopo medico factae vehementissime abhorrent (*Sanhedrin, fol. 90 a.*).

Neque Chirurgiae fuerunt imperiti; quemadmodum hic et illic operationes occurrunt; v. g. in *Sabbath, fol. 134 a.*, *Jevammoth, 76 a*, *83^{b.}*, *Sanhedrin, 33 a*, cet. In Tractatu *Bechoroth* Capite VI^o offendes descriptos nonnullos morbos oculorum; et totus fere Tractatus *Negaim* agit de dignoscendis variis leprae speciebus.

Quam maxime Medicinae Veterinariae operam dedebunt; ita Caput III Tractatus *Chulin* scatet observationibus morborum in omnibus fere partibus corporis animalis.

Atque haec de Medicina sufficiant 3). Transeamus nunc ad nonnulla generaliora quae de arte Obstetricia in Talmude occurrunt.

§ 4.

De Obstetricibus.

Ut apud omnes gentes priscas, sic etiam in Talmude, ubicunque agitur de auxilio in partu ferendo, Feminae Obstetricantes citantur. Obstetrices illae nomine veniunt *feminarum sapientium* (*sage femme* Gallorum) חכמה 4), (uti nostratibus *Vroedvrouw*): porro *feminarum vividarum* חיה 5), quia vivere faciunt, «dum infantem ex utero in vitam ducunt.» (Buxtorff, *Lexicon Talmudicum in voce*). Illo nomine חיה etiam nonnullis in locis occurrit *puerpera ipsa*, uti in *Joma*, fol. 73 b, *Kelim*, Cap. XXIII. Misch. 4. Obstetrices illae aliqua auctoritate valebant, siquidem earum testimonium magni aestimabatur, v. g. in judicando num neonatus esset legitimus, nec ne: (*Kidduschin*, fol. 73 b.). Obstetrix quoque iudicium ferebat, quisnam infans esset primogenitus (*Ibid.* 74 a). Attamen occurrunt quoque nonnulli loci, e quibus concludere possemus, aliquando ipsos viros praestitisse auxilium; ita legimus in *Kidduschin* (fol. 24 b.) ad quaestionem: num dominus accusandus esset,

3) De medicinâ ipsâ Talmudica cf. Ginzburger, *De medicina ex Talmudicis illustrata. Diss. inaug. Göttingae 1743.*

4) *Sabbath*, fol. 328 b. «et vocant ei obstetrix (חכמה) ex loco in locum.» *Erubhin*, fol. 45a. «obstetrici (חכמה) est licitum extra terminum Sabbathi exire, quum veniat adstare partui.» Sic et *Rosch Haschanah*, fol. 23b.

5) *Kidduschin*, fol. 74 a., 24b. *Chulin*, 7 a et alibi passim.

qui, versione infantis in utero servae suae, illum infantem coecaverit 6).

§ 5.

Exploratio partium genitalium saepius instituebatur, *De exploratione partium genitalium,* ad dijudicandum num virgo nubilis esset nec ne? num haemorrhagia uteri ad menstruationis negotium pertineret, an ex alia causa oriretur, v. g. ex vulbere vel morbo? Requirebatur exploratio, si scire vellent, num femina fuerit gravis: — et sic saepissime exploraverunt, ut variae quaestiones dijudicaretur ad vitam religiosam pertinentes vel ad medicinam legalem. Has explorationes saepius feminae instituebant, quod imprimis patet ex *Nidda, fol. 48 b.* ubi ita loquuntur Rabbini: »*Docuerunt Rabbini: omnes quae explorantur, explorantur a feminis; et sic fecit R. Eliezer, qui eas uxori (suae) tradidit (ut ab hac explorarentur), et R. Jismaël (eas) tradidit matri suae (eundem in scopum). R. Jehuda dicit: ante terminum (ante menstrua oborta) et post terminum (aetate protracta) feminae explorent eas, intra terminum feminae non explorent eas, quia non judicant de dubiis ex ore feminarum.*” Dissentiunt tamen dicuntque alii: feminarum iudicium

6) De his plura vide infra ad art. de *Partu abnormi*. Sequentia, quae de explorationibus instituendis dicuntur, affirmare quoque possunt, viros nonnunquam praeuisse auxilium in partu: si enim exploraverunt, quare partui non adstitissent? Ad haec omnia per conjecturas debemus concludere, quia in toto Talmude haec res de industria non pertractatur.

quidem esse admittendum si aggravet; sin contra, non audiendum. Ex hoc loco Talmudico constat, plerumque ad explorationes instituendas feminas fuisse vocatas; sed in casibus dubiis viros explorasse, et forte eam ob causam, quia hujus rei peritiores fuerunt. Causa, quare non *semper* exploraverunt doctores, in pudicitia videtur quaerenda, de qua saepe nimis erant solliciti.

Mulieres a viris nonnumquam fuisse exploratas, ex loco sequente etiam patere videtur: (*Jevammoth, fol. 42 a.*): „*Dixit R. Siphra, non explorantur nuptae (mulieres gravidae) ne illas vituperent mariti* (שלא יחננו על בעליהן) *et explorantur ex incestu.*” Addit commentator Jarehi ad hunc locum: „solent gravidarum explorare mammas ad graviditatem dignoscendam.” Explorationem ex incestu, idem ita explicat: „percurrit talis femina spatium aliquod terrae mollis, in qua gressus melius conspici possunt; si mulier est gravida, gressus profundiores sunt illis aliarum mulierum, quia femina gravida gravior est aliis.” Singularis profecto explorandi methodus! Attamen mirarer, Rabbinus qui ad res minimas quoque attendebant, talem admisisse. — Porro ex dictis R. Siphrae quoque elucere mihi videtur, nonnumquam mulieres a viris exploratas fuisse; quare enim ignominium fuisset exploratio maritis, si a solis tieret feminis?

Modum quo exploraverint sequentia aliquomodo illustrant, quae in *Nidda, fol. 10 b.* leguntur:

„*Quando filiae Jisraëliticae pervenerunt ad suum tempus* 1), *sunt in suspicionem pollutionis, et feminae explorant eas.* R. Jehuda dixit: *non explorant eas manu, quia inique cum*

1) Tempus menstruationis.

2) Laedunt vaginam unguibus.

3) Illiniunt vaginam oleo, quia

«illis agunt 2), sed illiniunt eas oleo oleum pellit men-
 «interne 3) et lavant eas externe, et ses, quando tempus
 «(ita) explorantur ab ipsis.» in conspectu est quo
 veniant, (Raschi).

Videmus ergo ex his, illos genitalia ipsa interne explorasse et quidem manibus, profecto non tota manu sed uno digito. Explorationem tamen non semper prudentissimo modo fuisse factam, nos docet admonitio, ne explorent manu, quia manus laedere posset vaginam, et ita sanguinem vagina fundere posset qui immerito aestimaretur sanguis menstruus.

§ 6.

Ex iis quae supra citavimus de arte obstetricia Vis. patuit, Moſen feminam menstruantem et fluentem per aliquod tempus pollutam declarasse, — feminis, quae vel masculum vel puellam pepererant, varium fuisse purificationis tempus; — et haec praecepta Rabbini magis etiam extenderunt. Hujus loci non est, omnia communicare quae Rabbini hac de re praecipiunt 7); modo nonnulla eorum afferam. Feminae, quae abortum passae fuerant, per varium tempus pollutae erant, et pro sexu foetus abortivi, per longius breviusve tempus pollutae manebant; idem valebat de parturientibus. Femina, cui menses solito et eodem tempore veniebant, ab initio inde quo vidisset sanguinem, deberet quinque dies numerare pro ipsis catameniis; quibus diebus praeterlapsis,

*Præcepta
 nonnulla
 Rabbinica
 de feminis
 menstruan-
 tibus cct.*

7) Præcepta omnia illa collegerunt Maimonides in opere suo: *Jad Hachasakah* sub titulo *Hilchoth Issure Biah* (præcepta de prohibito congressu) quae conf. R. Joseph Caro: *Beth Joseph*, *Hilchoth Nidda*, et brevius in *Schulchan Aruch*: *Joreh Deah*, *Hilchoth Nidda*.

numeraret septem dies puritatis; deinde balneo se deberet lavare; et tum demum iterum marito licitum erat cum ea concumbere: durante tempore menstruationis enim, uxorem ne tangere quidem marito licuit, nec aliquid de ejus manu in sua manu accipere; et sic multa alia sunt quae religionem magis spectant, nec quoddam fundamentum medicum habent. Spatium vulgo statuunt undecim dierum inter singulos mensium accessus; et femina, cui sanguis his quoque undecim diebus e genitalibus fluxerit, *fluens* vocabatur; polluta erat toto tempore fluxus, et si desiit, uti femina menstruata, septem dies puritatis debebat numerare, balneo se lavare, et tamdiu quod Templum exstitit, piaculum debebat ferre. Haec quia mulieres Judaicae accurate et summâ diligentia observaverunt, non sane mirandum, Rabbinos sponte magnam eorum acquisivisse experientiam: cognitae enim iis fuerunt innumerae abnormalitates mensium, quae durante graviditate, vel partu aut puerperio ipso aliquando occurrunt; et haec omnia ex causis religiosis saepissime a Rabbinis erant dijudicanda.

Studia morborum mulierum in genere magni aestimaverunt Talmudistae, cujus rei fidem illa sententia testetur R. Eliezaris filii Chismae: *«Oblationes avinim et praecepta de feminis menstruantes sunt »paneta praecipua decisionum; Astronomia et Geometria »sunt peripheriae (deliciae s. a.) 'sapientiae!' (Aboth. III. 18.).*

Expositis hisce generalioribus, argumentum ipsum aggredi possumus, et videre quid Talmudistis constiterit de variis argumentis, quae ad Gynaecologiam spectant.

CAPUT I.

DE UTERO ET FOETU.

A.

ANATOMIA PARTIUM GENITALIUM MULIEBRIUM.

§. 1.

¶ ^{על}er pauca sunt quae de Anatomia partium genitalium femininarum in Talmude occurrunt; quod ideo mirandum, quoniam prolixè agunt illius Auctores de harum partium contentis et functionibus; quibus accedit, quod cadaverum sectiones, quas Talmudistae memorant, omnes in feminas factae sunt. *Uc utero.*

Rudem et incompletam modo imaginem uteri proferunt, et quidem parabolice in Tractatu *Nidda*, fol. 17b (*Mischna*): «*Parabolice locuti sunt sapientes de femina: cubiculum, vestibulum et coenaculum* (חֲבֵרָה) «*פרחור עלייה*» quae verba in *Gemara* ita explicantur, «*cubiculum est interne, et coenaculum constructum est supra illa ambo, et foramen* (לִּחְלֵה) «*apertum est inter coenacu-*

»lum et vestibulum 1).“ Cum Maimonide (*Hilchoth Issure Biah Cap. V. Hal. 3. 4*) illam parabolam ita explicandam crederem: cubiculum est uterus ipse, vestibulum est collum uteri, et coenaculum quod supra uterum constructum est, denotat »vias, in quibus concoquitur semen muliebree,“ vasa ergo spermatica muliebria, quae foramine aperto hiant in utero, vel, uti ex verbis ipsis Talmudicorum (*Ib. fol. 18 a.*) patet, inter tectum vestibuli et ipsum uterum; dividunt nempe illud vestibulum iterum in tectum et fundum vestibuli. Neque in his ab omnibus veteribus discrepant 2).

1) Auctor lexicæ Talmudicæ A r u c h verbum עלייה ita explicat quod sit: »locus ubi urina mingitur,“ (Urethra? orificium urethrae in vagina?) dum פרוורר, vestibulum feminae, (est) in loco pudendorum, inter labia pudendorum, בשפתות עורה: A r u c h, fol. 345 b, col. 3. Quae tamen explicatio mihi non arridet. Obveniunt hic et illic loca, ubi פרוורר nihil aliud esse potest quam collum uteri: sed עלייה illo sensu numquam reperitur. Vulgo est coenaculum quod in superiore parte domi erat. Plura de hac parabola addere adhuc possem, si omnia ex nostra scientia illustrare vellem, et longius disserere quid quidem intelligerent per illas denominationes: — sic v. g. עלייה verbotenus sumtum ascensus (vagina) interpretari posset, dum לול esset orificium internum uteri. Sed quum Talmud nil amplius de his memoret, eaque levi penicillo tantum adumbret, solas hic conjecturas crearem, quae nullomodo ad certum et non fallax iudicium ducerent.

2) Quod attinet ad illa vasa spermatica, quae recentioribus sunt Tubae Fallopianae, Aristoteles et Galenus illis ductibus nomen dederunt vasorum spermaticorum. Foramen quod commercium inter uterum et vasa illa spermatica sistit, Aristoteles non memorat; et Galenus, qui putat se illud primum descripsisse, Herophilum vituperat, quod illud foramen non annotaverit, (Vide Galenum, de uteri dissectione, — ejus Opera omnia, edit. Kühnii, II. p. 894). Verum jam ante Galenum,

§ 2.

Vaginam nominarunt *domum externam* (*Nidda*, 40 a. בַּת הַחֵיצוֹן); est nempe locus uti dicunt „ubi *mi-* De vagina et
de alius par-
tibus in va-
gina obveni-
entibus. nister conculcat,” ubi penis in coitu immittitur et se movet, „est locus, qui conspicitur in puellis si se-
„dent” (*Nidda*, 41 b.). Talmudici ergo vaginam ab utero disjungunt; et hac re ab omnibus antecessoribus multisque Auctoribus qui postea floruerunt, discrepant; sed cum Sorano Ephesio 3) conveniunt.

Moschion videtur de illo foramine mentionem fecisse, his verbis: „et a poro excretorio, unde mulieres semina emittunt, protensi” (testes muliebres) [*καὶ ἐκτεταμένοι ἐκ τοῦ κριτικού πόρου, ἐξ οὗ αἱ γυναῖκες τὸ σπέρμα ἐκπέμπουσι*]. Vid. Moschion, *De mulierum passionibus Liber*, edidit F. O. Dewez. *Viennae* 1793. p. 6. 37. Nequaquam hoc loco cornua uteri invenimus memorata, quae ceterum in tota antiquitate tantas egerunt partes: — attamen non adeo mirarer, Rabbinos de his non fuisse locutos, quia eorum tempore et imprimis aetate Mischnae confectae, quum Soranus Ephesius in libro *de morb. mulier.* et discipulus suus Moschion satis accurate uterum jam descripserant, de cornubus non amplius erat sermo.

3) Ubicunque in hoc opusculo Soranum Ephesium commemoro, illum puto Soranum, qui librum *de passionibus mulierum* scripsit quem nuper Cl. Dietz in lucem edidit. Cum viris Cl. Choulant (*Handb. d. alt. Bücherk. Ed. cit. p. 92*). Haeser (*Progr. de Sorano Ephesio, Jenae* 1810), et Ernierius (*Hipp. lib. de vict. rat. in morb. acut. accedunt ejusdem, observ. crit. in Soran. Ephes. cet. L. B. 1813.*) unicum Soranum Ephesium existisse crederem, quique ante Galenum, tempore imperatorum Trajani et Hadriani vixit. Opus ipsum Sorani conferre mihi non contigit, sed consului J. Pinoff: *Artis obstetriciae Sorani Ephesii doctrina ad ejus librum*

Loquuntur porro (*Nidda*, fol. 41b.) de השנים (*Schinaim*) in vagina; quo verbo Raschi intellectas vult elevationes carnis in utero, (confundit Raschi vaginam et uterum). Opinarer autem, *Schinaim* esse Nymphas, quaequidem aliquid referunt dentatum; שנים nempe repperem a ש, *deus* 4).

De *Hymene* membrana (בִּלְיָ *virginitates*) nonnullas notas offendimus in *Nidda*, 44b et 45a, ubi de ejus regeneratione agitur; sed ibi citatur modo nomen, neque ulterius describitur. Apud nullum, quantum scio, scriptorem medicum ante Rabbinos aliqua exstat mentio hujus membranae. Nec aequales Rabbiorum, Galenus, et ante eum Soranus et Moschion, qui ceterum mulierum genitalia majore diligentia quam Mischnici describunt, de hymene membrana loquuntur.

De Rugis vaginae ita disseritur: (*Bechoroth*, 22 a):
 » *Quid sunt Toffijoth* (טפיות *rugae*)? *Dixit R.*
 » *Jehuda*, *dixit Schemuël*, *ex nomine R. Ele-*
 » *azaris filii R. Zadokis*: *Sic explicabant illud in*
 » *Hierosolymis*: *est sicut mula, inclinans in genna ad*
 » *emitteudam urinam; et conspicitur orbiculus ex medio*
 » *orbiculi* (plica in plica)."

»περι γυναικείων παθών" nuper repertum exposita. Diss.
 Inaug. Vratislaviae 1810.

4) Baal Aruch hoc verbum non habet. Nonioe Baal Aruch cognitus est R. Nathan ben Jehiel, auctor lexici vetustissimi Talmudici, quod *Aruch* inscribitur: — obiit ille Ao. 1106. Benjamin Mussaphia, medicus Hamburgensis, lexicon illud, Hebraico idiomate conscriptum, multo auctius et emendatius edidit Amstelædani, 1655, folio. Illa editio celebrata est nomine *Additamenta ad Aruch* (מוסף הערוך).

Quum citant Rabbini sectionem cadaveris a discipulis R. Jismaëlis institutam (vid. pag. 30), dicunt, illos 252 membra invenisse; dum Rabbini semper statuunt hominibus esse 248 membra 5). Haec contradictio ita explicant: «quia explorarunt feminam, cui duo sunt *cardines* (צירים) et duae *januae* (דלתות) numeraverunt 252.” R. Akiba addit aliud membrum, *clavem* (מפתח), quod vocat, quae clavis tam exilis est, ut forsitan coquendo dissoluta fuerit; quare discipuli R. Jismaëlis eam non annumeraverunt. (*Bechoroth*, fol. 45a). Quasnam autem partes Rabbini volunt hisce nominibus? Ginzburger (*Diss. laud. p. 11.*) *cardines* habet *labia*, *Januas prolabia* (Nymphas), et *clavem musculum clitoridis*. Ph. Philippson (*Die Jisraëlitische Bibel von L. Philippson, II. p. 267*) nomine *cardinum* intelligit *orificium uteri*, nescio tamen quam auctoritate. Profecto si delineationem uteri, quam Moschion (*Cap. VI*) dedit, in censum adscribimus, pars illa, quam orificium vocat, aliquomodo quidem *cardinem* aemulatur; sed Talmud loquitur de *duabus cardinibus*, de *duabus januis*; haecque animadvertens, — nisi velis orificium internum et externum, quod valde probabile non est, — explicationem Docti Ginzburger non rejicerem. Verum loco musculi clitoridis 6), ipsam clitoridem sumerem, quae

5) *Membra* אברים vocant Rabbini varias partes corporis humani, constantes ossibus, carne et tendinibus, uti digiti cet. vel etiam tales quae ossibus carent, uti linguam, liencm, cet. vid. Maimon. in *Jad Hachazak. Hulchoth Mancholoth assuroth. (de cabis velitis)* V. 2.

6) Videtur Ginzburger hanc ob causam, *clavem* illam *musculum clitoridis* designasse, quia verbum מפתח, participium פתח Hiphil verbi פתח verbotenus sumpsit, ergo qui *aperire facit*,

revera clavem aliquomodo aemulatur. Fateor tamen hanc etiam explicationem omnis difficultatis non esse immunem.

§ 3.

A brutorum corporis fabrica non concludendum ad fabricam corporis humani Nolunt Rabbini, semper concludi a brutorum corporis fabrica ad hominis formationem, et praesertim non, quod attinet ad partes genitales. Dicunt enim, (*Chulin*, 68 a) *»a bestia ad hominem non est concludendum; nam »bestiis non est vestibulum; et ab homine ad bestiam »non est concludendum, quia vultui (hominis) inest quid »honorabile.*” Sensus est: corporis humani fabrica longe alia est quam fabrica brutorum; et hanc obrem ea quae sectionibus brutorum inveniantur, non omnino ad humanum corpus possunt applicari. Non vero ita omnes veteres cogitaverunt; nec ipse *Galenus* dubitat, omnia quae in brutis repererit ad humanum corpus accomodare, licet ex nonnullis locis suorum scriptorum uberrimorum pateat, eum aliquando quoque hominum cadavera dissecasse⁷⁾: — statuit autem, simiarum partes a partibus humanis non admodum discrepare; et hinc saepe ex repertis in simiarum cadaveribus ad corporis humani fabricam concludit. (Cf. e. g. ejus librum: *de uteri dissectione* K. II. p. 887). Si *Galenus* semper cogitaverat uti Rabbini, multos errores non commisisset, neque serviles *Galenii* asseclae medi aevi egissent de *uteris*, de *cornibus uteri*, de *cotyledonibus* aliisque multis, quae sectiones brutorum eos docuerant.

7) Cf. de *Anatom. administrat.* Lib. IV. C. V. et *Isensee*: *Geschiedenis der Geneeskunde en hare hulpiwetenschappen etc.* door L. Ali Cohen, p. 218, ibique annotat. doct. Cohen.

§. 4.

Uterus si deficit, nullas molestias inde oriri, patere videtur e sequenti loco: (*Bechoroth*, 28 b.) „*Et Tudus Medicus dixit: nulla vacca nec sus ex Alexandria in Aegypto proficiscitur, cui non excidant uterum, ne pariet* 8).” Volunt ergo his verbis, animalia, licet iis uterus extirpatus sit, tamen superesse posse, illamque operationem iis non esse lethalem.

*De utero
caecisignis.*

Credebant quoque Talmudici feminas praeditas esse semine, idque putabant rubri coloris. (v. g. *Nidda*, 31 a), Non mirandum Rabbinos tali doctrinae de seminarum semine fuisse addictos, quum Hippocrates, Aristoteles, Galenus pluresque alii, imo multo recentiore aetate, credebant feminis esse semen; licet Zeno et omnes Stoici feminis semen abnegaverint. (*Dictionn. des Scienc. médicales. Tom. XVIII. p. 41*). Illa theoria diutissime vixit, omnesque medici Galenum insequentes semper de semine seminarum scripserunt; donec Harveijus Stoicorum doctrinam restauravit, et demonstrare conatus est, mulieres semine carere. (Conf. ejus *Exercitat. de generat. animal. Lond. 1651, p. 95*). Ovaria illis temporibus veniebant nomine *testium muliebrium*; verum anno 1667 hanc theoriam aliquomodo infregit Stenon (*Element. myolog. Specimen. p. 117.*) et praesertim nostras Regnerus de Graaf, (*de*

*De semine
muliebri.*

8) Licet quidem suum intestina humanis aequiparent, non tamen cum Doct. Fulda facerem, adscribente Rabbini hanc ob causam opinionem, feminae humanae uterum posse extirpari sine vitae periculo. Per analogiam id quidem deducere possemus; sed explicite nullibi talia Rabbini protulerunt. Vid. Fulda in *Siebold's Journal für Geburtshülfe. Bd. VI. st. I. p. 32*

mul. organ. generat. inservient. In ejus opp. omn. Cap. XII. p. 292. L. B. 1677).

Mulieris corpus, ajunt Talmudici, ad infantes concipiendos est aptissimum, idque cum cella comparant in qua cibi servantur. Dicunt enim, (*Erubin, fol. 18 b.*) »*Ex hisce discimus, Deum Hevram aedificasse ad cellae formam. Sicut illa cella inferne est lata et superne angusta, ad recipiendos fructus; sic et femina lata est inferne et angusta superne, ad recipiendum infantem.*» 9)

B.

EMBRYOLOGIA.

§ 5.

De formatione Embryonis prioribus stadiis evolutionis

Multifaria Rabbiniis fuit occasio, embryones humanos perscrutandi et investigandi; adeoque non mirandum, in Talmude non pauca ad Embryologiam pertinentia obvenire. In Tractatu *Nidda* (*fol. 25 a. b.*) agitur de femina, quae abortit *molam acupictam* (שפיר מרוקם) i. e. abortus embryonis adhuc tenerrimi (Maimon. *Hilchoth. Issur. Biah. X. Hal. 2.*). Hac occasione, Rabbi Abba Schaul de formatione embryonis humani ulterius ita disserit:

9) »Der Weibliche Rumpf hat daher die Form eines Kegels »mit breiter Basis und schmaler Spitze,« dicit Busch: *Lehrbuch der Geburtskunde*, §. 40.

«Abba Schaul dicit: initium for-
 mationis (foetus) est a capite ejus, et
 duo oculi ejus uti duo oculi muscae,
 — R. Chija docuit: et distant a se
 iuricem, — duae uares uti duo oculi
 muscae, — R. Chija docuit; et
 appropinquant se invicem, — et os
 ejus est expansum pili adinstar, et
 ejus corpus 1) uti leus; et si puella
 fuerit, vagina ejus uti granum hor-
 dei in longitudine 2), et incisio 3)
 manuum et pedum non est ei.
 et non explorent eum 4) in
 aqua, quia aquae sunt durae. et
 efficiant ut pereat; sed explorent
 eum in oleo, nam oleum molle est et
 nitidum eum reddit, et non videant
 eum nisi sole 5). Quomodo explo-
 rant eam? Quomodo explorant eum!
 Uti diximus. Sed quam re explo-
 rant, ut sciant atrum mas sit an
 puella? Abba Schaul Bar Nas,
 quem dixerunt etiam Abbam Schaul
 Bar Remesch, dixit: afferatur ra-
 mentum liqui cujus apex glaber est, et
 moveatur in eam locum 6): si fricat 7)
 certe mas est, sique non, certe femella
 est. — Dixit Rab Nachman, dixit
 Rabba Bar Abuha: id modo
 dictum est (de casu), quo versus supe-
 riorem 8); sed si a lateribus 9), dicere
 possum parietes uteri esse. Dixit

1) Membrum vi-
 rile. Maimoni-
 des rem confudit,
 et putavit corpus
 hic significare cor-
 pus universum. Cf.
 tamen Raschi ad
 nostrum locum.

2) Fissa.

3) Forma.

4) Embryonem.

5) Luce solari, ut
 singulae partes me-
 lius dignoscantur.

6) Sc. in locum
 pudendorum.

7) Si impedimen-
 tum aliquod perci-
 piatur.

8) partem foetus
 movetur ramentum

9) moves ramen-
 tum, tunc obsta-
 culum possent esse
 uteri parietes.

10) Uti granum
 hordei longitudina-
 liter est fissum, sic
 quoque embryo de-
 bet investigari in
 directione longi-
 tudinali. R. A-
 da ergo corrigit
 et emendat quae
 supra sunt dicta:
 ut si puella fuerit,
 vagina ejus uti gra-

»R. Ada Bar Ahaba: *Didicimus, si puella sit, vagina ejus (est) ut granum hordei fissum* 10). *Et rogavit R. Nachman: nonne forsam funiculus testium* 11) *potuisset esse?* »*Dixit Abaj e: nunc* 12) *quum testes ipsi nondum sunt perceptibiles, jam perciperent funiculum testium!* »R. Amram dixit: *femora duo ejus sunt uti duo fila rubra; et R. Amram de iis dixit* 13), *uti subtegmis; — et duo ejus braccia sunt uti duo fila rubra, et dixit R. Amram de iis* 14), *uti fila staminis. Dixit Sche-muël R. Jehudae: Vir docte! ne facias id* 15). *nisi jam habeat pilos.*»

Priorem sententiam Abbae Schaul mutata aliquomodo legimus in *Sotah*, fol. 45 b, ubi sequentia occurrunt:

»*Aqnonam (loco) foetus formatur? a capite ejus. Abba Schaul dicit: ab umbilico ejus, et emittit radices suos hic et illic. Sed illa* 1) *non est opposita Abbae Schaul; quia Abba Schaul opinionem suam modo dixit, quod attinet ad illud formationis; nam infans quum formetur, ex medio suo* 2) *formatur, sed quod attinet vitam ejus, secundum omnes in mare est, uti scriptum est: (Gen. VII. 22) »Omnia quae spiritum vitae in mare habent.*»

num hordei in longitudine;» et sic alterum Rabbinum refutat, addendo verbum, »fissum»

11) Sc. funiculus spermaticus.

12) Eo tempore.

13) Sunt crassitudinis filii subtegmis.

14) Crassa sunt.

15) Sc. si vis declarare num certe sit infans, ita ut mater polluta esset ob partum

1) Illa opinio, foetus a capite inde formari; nam qui ea statuunt, loquuntur modo de vitae sede.

2) Ex umbilico.

Videtur tamen in ipso textu quaedam corruptio ex-
stare. In loco nempe illo Tractatus *Nidda* Abbam
Schaul dicentem audivimus „foetum a capite inde
formari,” dum alio loco (*Sotah*, 45 b) refertur: Abbam
Schaul censisse, infantem *ab umbilico* formari. Haec
difficultas vero solvitur, si cum Baal Aruch (175 b.)
et Rabbenu Tam, (in *Thosphath ad h. l.*) loco
חלת ברייתו מראשו (*Nidda*), — h. e. *initium formationis*
a capite ejus est — legamus חלת ברייתו כרשון, — h. e.
initium formationis est uti locusta 1); — priore ergo
in loco sermo tantum erit de habitu et forma totius em-
bryonis, dum altero loco, in Tractatu *Sotah*, ortus em-
bryonis memoratur.

Dolendum, Rabbinos non accuratius determinasse
tempus evolutionis, quo viderit Abba Schaul illum
embryonem. Ea autem dubia per Mischnam anteceden-
tem auferuntur (*fol.* 24 b.), siquidem ibi statuatur:
»feminis, quae abortiunt molam talem acupictam, dies
computandos esse purificationis *et propter marem et*
propter puellam; eaque hanc ob causam statuunt, quia
nondum potest dijudicari utrum mas sit an puella.” Alio
loco censent, infantem esse formatum die 41° (*Nidda*,
fol. 30 a.), et quae femina hoc die abortit, est polluta
et ob marem et ob puellam; ergo nostro loco sermo
esse videtur de foetu circiter VI hebdomadam.

1) Cf. Aristoteles *Historia animal. Lib. VII. c. 3.* (Editio
Schneideri). »Masculus si quadragesimo exeat die, atque in
»aliud quippiam indatur, diluitur atque aboletur. Sin in aquam
»frigidam, consistit ibi tanquam in membrana. Ea deinde di-
»scalpta, apparet foetus quantitate formicae grandioris, partesque
»ipsae conspicuae sunt, tum ceterae omnes tum genitale ipsum
»atque oculi sicut in aliis animalibus maximi”

§ 6.

*Comparatio
eorum qua
dicta sunt §5
cum iis quae
ab aliis Me-
dicis prae-
scripta sunt
eodem de ar-
gumento.*

Videamus nunc paullo accuratius quae Rabbini nos doceant, et comparemus dogmata Talmudicorum cum iis, quae ab aliis veteribus Medicis de eodem argumento scripta sunt. Ordiamur ergo ab illis quae de umbilico dicuntur.

Magna exstat confusio circa evolutionem embryonis in scriptis, quae immerito nomine Hippocratis veniunt; dum in genuinis Hippocratis scriptis de nostro argumento nil fere tradatur. Umbilicum, vel potius locum abdominis quo funiculus umbilicalis corpus foetus intrat, auctor libri *de natura pueri* (in initio) jam primo tempore vidit formatum, ubi loquitur de ovo abortivo, secundum suam computationem, 6 dierum. Rudis tamen omnino est imago hujus embryonis; sermonem tantummodo facit Auctor de membranis et umbilico, et nihil amplius habet. Galenus (*de foetus formatione*, K. T. IV. p. 660 sqq.) simul magnas partes in evolutione venis umbilicalibus tribuit, eodem fere modo ac Abba Schaul 2).

Licet itaque apud nonnullos legamus, uti diximus, foetum *locustae* instar formari, — alii tamen, uti *noster* textus habet, foetum *a capite inde* formatum credebant 3). Et haec aliquomodo conveniunt cum Galeno,

2) Abba Schaul aequalis fuit R. Jochananis Ben Saccai; floruit ergo ultimis annis seculi I. p. Chr. (*Seder Had-doroth*, 149b. Maimonides in praef. ad *Seder Seraim*).

3) Licet equidem crederem, in *Nidda*, fol. 25 a. legendum esse initium formationis ejus est uti *locusta*, aliam tamen lectionem in ipso textu retinui, cum in omnibus nostris hodiernis editionibus haec lectio exstet. Quenam tamen lectio genuina sit

qui dicit: »quando vero primum apparere incipiunt, maxima sunt tria haec ex vicino inter se sita, et se mutuo »contingentia. Principium quidem nervorum futurum, quod »cerebrum appellamus, in altiore sede locatum; subjacent »autem ipsi cor et hepar mutuo se contingentia." (*De Semine liber A. K. IV. 541*). Caput ipsum tamen ultimo formatur: »Postea igitur tandem tertio temporis ordine, »cerebrum et omnes faciei partes formatae sunt, quando »jam et artus distinguuntur, et omnis, si quae prius dicta »est pars, ad structurae suae absolutionem venit." (*Gal. de foet. format. K. IV. p. 672.*). Monere certe opus non est nostrâ aetate, nullum dubium amplius superesse, quin foetus ab umbilico inde formetur; id quod sponte elucet, si animadvertamus quantas partes agant vitellum et vesicula umbilicalis primo tempore evolutionis.

Idem illud nostra aetas docet, quod ad formam oculorum, narium et oris. Hebdomade enim sexta (die 35^o—42^o) oculi adhuc valde parvi longe a se distant, dum primordia narium sibi propiora sunt. Os veri nominis tale quidem nondum exstat, sed jam adest apertura vel aditus ad intestinum initiale, quae valde lata est, attamen non multo amplior quam Talmudici statuunt: »et os ejus expansum est pili adinstar" 4).

et antiquior, certo pronunciare non auderem. Videtur quidem prior lectio (*locusta cet.*) genuina esse et dein a juniore quodam Rabbinio fuisse correctâ. Rabbinos nonnullos quoque »in capite inde formari embryonem" defendisse, patet ex verbis in *Solah*, fol. 45 b.

4) Cf. de his S. Th. van Sömmerring: *vom Baue des Menschlichen Körpers: neue umgearbeitete original Ausgabe.* Th. VII: Th. L. W. Bischoff: *Entwicklungsgeschichte der Säugethiere*

Continuatio.

Apud nullum auctorem antiquitatis, haec quae attulimus ita descripta reperies, nec illa quae sequuntur, quaeque pertinent ad descriptionem partium genitalium, excepto Galeno, qui jam observavit partes genitales sero efformari. Dicit nimirum Galenus: (*de usu part. corp. hum. Lib. XIV. K. IV. p. 168.*) «Ut enim anatomici ipsi nos docent, ab uno hoc principio motus ut semen in uterum est conjectum, et certe diutissime post, neutrum pudendorum adhuc formatur, ignorabisque, sit ne mas an foemina quod conceptum est, postea vero tandem deprehenduntur, sitque perspicuum.»

Patet simul ex modo, quò inquirebant Talmudici utrum puella esset embryo an mas, illos naturam quidem rite perscrutasse, inventa tamen eas non bene dijudicasse. Nam si descriptionem foetus, quae loco allato datur, unius ejusdemque temporis esse ponamus, atque cum ea conferamus, quid nostra aetas doceat de partium genitalium efformatione, tunc elucet, Talmudicos ea quae in utroque sexu plane sunt aequalia, diversa habuisse: tempus enim, quo rite dignosci possit inter sexum masculinum et femininum, est in foetu humano hebdomade circiter XIV: primordia genitalium autem jam oriuntur ineunte hebdomade VI (die 35^o—42^o); tunc tamen nondum aliquod exstat discrimen inter utrumque sexum; adest canalis uro genitalis, et corpus aliquod eminet, quod eodem jure penis ac clitoris haberi potest. (*Bischoff. l. c. p. 377 sqq.*). Rabbini itaque rite

und des Menschen. Leipzig 3842. p. 207 sqq. 234, 300:— et Busch und Moser. l. c. Thl. I Art. Aetas.

observaverunt, sed similitudine in errorem ducti, corpus illud neutrum masculinum declarabant; testimonio satis perspicuo, Talmudicos bene observasse sed observata non bene dijudicasse. Quibus accedit, omnes foetus abortivos priorum mensium, etiam femineos ob prominentem clitoridem, adspectum praebere [masculini sexûs, ita tamen ut cuique rem accuratius inquirenti brevi pateat error. (*Vid. Busch und Moser l. c. I. 29.*)

Eodem fere tempore (hebdomade V.) extremitates superiores et inferiores magis magisque prodire incipiunt et cum filo magnam habent similitudinem, aemulantur nempe petiolos, quibus nec manus nec pedes separatim dignosci queunt, uti noster Rabbi ait: *«nec forma pedum, nec manuum est ei.»* Inter hebdomadem VI—VII petioli illi magis accrescunt, manus pedesque separatim evolvuntur et digiti in conspectum veniunt. (*Bischoff l. c. p. 428.*) Simul monendum est, extremitates superiores paululum magis esse evolutas quam inferiores. (*Bischoff: l. mox c.*), quod R. Amram quoque notasse videtur his verbis: *«et femora ejus sunt uti duo fila rubra, — et R. Amram de iis dixit: sunt crassa uti fila subtegminis; — et duo ejus brachia sunt uti duo fila rubra, — et dixit R. Amram de iis, et crassa sunt uti fila staminis;»* — ergo extremitatibus inferioribus crassiora.

Quod ad sententiam Schemuëlis dicentis: *«R. Jehuda matrem non immundam debere declarare propter partum, nisi jam orti fuerint pili,»* ita certe ratiocinatus est Schemuël: Tantum tempore, quo pilî primi erumpunt distingui potest sexus foetus, et eo tempore itaque sine omni dubio declarare possumus, num embryo qui abortu prodierat, mas sit an puella. Haec

saltem ex verbis Schemuëlis diducerem. Et res vere ita se habet: nam secundum Cl. Valentin (*Entwickelungs Geschichte des Menschen. p. 275.*) primi pili jam ad finem mensis tertii vel circa medium mensem quartum erumpunt, ergo hebdomade XIV^a—XV^a; eodem itaque tempore, quo secundum Cl. Bischoff (*l. c. 378.*) vere dignoscere possumus inter marem et femellam 5).

5) Inter tot viros praeclaros, qui in Talmude recensentur, ille Schemuël certe non ultimum tenebit locum. Natus fuit ex familia nobili sacerdotum, vixit tempore R. Jehudae Sancti, cujus medicus et discipulus fuit. Obiit Ao. mundi 4010 = 250 p. Chr. N. (*Seder Haddoroth. Zemach David*); secundum alios (Jost) Ao. 270 p. Chr. Multa ad Medicinam pertinentia et ab illo doctore prolata in Talmude hic et illic dispersa obveniunt, et omnium quarumvis Medicinae partium nonnullae sententiae ejus exstant; dicitur quoque ad Medicinam de industria seapplicasse. Inter sua remedia valde celebratur collyrium (*Sabbath 108 b*). Id certe verum est, Schemuëlem multo puriore doctrina medica fuisse inibutum quam omnes alios Rabbinos Talmudicos; qui cum his etiam ipsi consentiunt, dum in doctrinis embryologicis, et in doctrina de morbis mulierum ejus auctoritatem maximam semper habebant. Sic enim narratur: (*Nidda, fol. 25 b*): »Et fuit abortus, qui venit coram Schemuële. Dixit Schemuël: »is est filius dierum 43; numeravit a die quo (femina) se lavavit usque ad illum diem, et non fuerunt nisi dies 40. Et dixit: illa femina durantibus ejus mensibus viro est aggressa. Ligârunt eam et confessa est (se durante menstruatione cum marito concubuisse). Hinc (constat) Schemuëlem esse magnum (peritissimum) virum (Embryologiae).» Licet ex hac narratione non aperte pateat, Schemuëlem Embryologiae peritissimum fuisse, id vero hyperbolicum censereim, quod definiret ad unum diem aetatem embryonis. Modus, quo exploravit aliquomodo illustratur in *Nidda, fol. 25 a*. In sequentibus, multiplex erit occasio doctrinam ejus obstetriciam exponendi. — Non minus in Astronomia

Quae dein loco allato memorantur, de modo quo tractari debeat embryo explorandus, haec nos docent Rabbiorum experientiam et consuetudinem. Aqua enim macerat omnes partes, eas emollit et dissolvit; oleum autem non ita agit; et lux solaris clara ad embryologicas observationes instituendas, certe valde idonea est. Rabbiorum consilia itaque optima sunt, et ex illis videmus Talmudistas magna gavisos esse experiëntiâ hac in re. De ceteris quae l. c. obveniunt, pauca modo dici possunt: sunt mala mixta bonis!

§ 8.

Totus locus allatus nos aperte docet, Rabbinos *Continuatio* quam maxime in disquisitionibus embryologicis humanis fuisse versatos; plurima profecto, quae dixerunt, nostro adhuc tempore valent. Nullum dubium superesse potest, quin saepissime embriones humanos perscrutaverint Rabbini, variis stadiis evolutionis. Et quantam differentiam sane observamus inter doctrinam sanam veramque Talmudistarum, et eam quae leguntur v. g. in libro, false Hippocrati adscripto *de carnibus* (Hippocr. *Opp. omn. Ed. Foës, Sect IV p. 34.*): «Ac primum quidem,

versatus fuit, ita ut *Jarchinaeus*, *astronomicus*, *lunaticus*, cognominaretur; et tradunt *Schemuëlem* dixisse: «*lucidae mihi sunt viae coeli ac viae Nehardeae*," urbis nempe quam inhabitavit (*Berachoth*, 58 b.). Amicissimus fuit Rabbæe *Arichæ*, vulgo *Raf* dicti, eruditionis illi aemuli, et fere semper conjunctos eos invenies, ubi sententiam aliquam vel ex religione vel ex jure civili cet. proferunt. (Uterius de *Schemuële*. Cf. *Bikkure Hattim ad annum 1827. p. 34 sqq. Seder Haddoroth p. 353 a. sqq. et alios*).

«ubi genitura ad uteros pervenerit, habet intra *septem*
 «*dies*, quaecunque, ex corpore ei accedere necesse est.
 «Id vere quomodo noverim fortasse quis mirabitur, verum
 «multa ad hunc modum vidi. Meretrices publicae, quae
 «in se ipsis saepius id expertae sunt, ubi cum viro con-
 «gressae sunt, noscunt quando conceperint, moxque
 «conceptum intra se perdunt, quo postea jam perduto,
 «veluti caro excidit. *Eam in aquam conjectam* si accu-
 «ratius inspexeris, membra omnia habere deprehendas,
 «et oculorum regiones et aures et brachia. Quin et
 «manuum digiti et crura et pedes et pedum digiti et
 «pudendum et reliquum totum corpus in conspicuo est.”

Omnia, quae explicavimus, satis superque demon-
 strare videntur, foetum, quem describunt Talmudici,
 aetatem VI hebdomadam non superare.

§ 9.

*De vario
 conformati-
 onis tempore
 pro vario in-
 fantis aetate.*

Magni momenti porro est Rabbiorum discussio de
 tempore quo foetus sit conformatus, quo itaque constet
 utrum mas sit an puella, hoc est tempus, quo secundum
 veteres foetus omnia jam possideat membra, idcirca
 formatus sit. Ab eo inde tempore, circa quod tamen
 varias protulerunt sententias, partes foetus in diem in-
 crescunt, dum formam suam jam acquisiverunt. Non
 mirum itaque, Rabbinos huic quoque doctrinae fuisse
 addictos. Legimus sequentia, in Tractatu *Nidda*, fol. 30
 a. a doctoribus Mischnicis statuta: «*quae abortit die 40°*
 «*non suspicatur de foetu, die 41° sedeat pro mare, pro*
 «*puella et pro menstruis. R. Jismaël dicit: die 41°*
 «*sedeat pro mare et mensibus, die 81° sedeat pro mare,*
 «*puellae et mensibus, quia mas perficitur die 41° et*

»puella die 81^o. Et sapientes dicunt: eadem est creatio
 »maris et eadem creatio puellae, ambo die 41^o (perfi-
 »ciuntur).» In commentario (Gemara) hujus Mischnae,
 sapientes sententiam ita stabilire conantur: *Dixerunt*
 »R. Jismaëli: *Factum est sub Cleopatra regina*
 »*Alexandriae, ut condemnauerint capitis ancillas ejus*
 »*ab imperio, et exploraverunt et invenerunt utrumque*
 »*die 41^o,*» nempe marem et puellam. Contra hanc ob-
 jectionem doctrinae suae contendit R. Jismaël, »pro-
 »batum non esse, servas illas jam 40 diebus ante grä-
 »vidas non fuisse factas Respondent ei Rabbini:
 »שקינוהו כמא דנפשא אשקינוהו »dederunt illis venenum bibendum, quo
 »abortus efficeretur:» quibus R. Jismaël iterum respon-
 dit: »אם נופא ולא מקבל כמא »sunt corpora in quae venena
 »non agunt (non accipiuntur),» His tamen nondum
 contentus, R. Jismaël pro sua thesi cadaverum sectiones
 refert, narrans sc. »*Factum est sub Cleopatra*
 »*regina Graeca, ut servae ejus capitis damnatae fue-*
 »*rint ab imperio, et exploraverunt et invenerunt marem*
 »*die 41^o et puellam die 81^o.*» Hoc etiam argumentum
 refutant Rabbini dicentes: durantibus 40 illis diebus,
 per quos illa serva diutius in vita fuit servata quam illa
 in qua repertus fuit mas, illam praegnantem fuisse factam,
 et, cadaveris sectione institutâ, foetum non 81, sed 41
 dierum, repertum. Sed R. Jismaël: »custodi eam
 »tradiderunt.» Cui Rabbini: »non datur tutor libidinis,
 »et forsán ipse custos cum ea coïvit, et tunc modo
 »grávida fuit reddita.» Sed pergunt: ויילמא אי קרעוה »et forsán si secta fuis-
 »set, illa (serva) in qua reperta est puella, die 41^o (eodem
 die ac altera), tunc eam forsán invenissent uti (servam
 quae) masculum (gestabat, tunc puellae formatio ita

fuisset progressa ac formatio maris). *Dixit Abaje: »signa eorum erant aequalia.»*

Prioribus illis Rabbiorum verbis, commentator *Raschi* adjungit; ancillas illas gravidas fuisse factas, priusquam occiderentur, experimenti causâ. Expressis quidem verbis ea in textu non dicuntur, ex sequentibus vero omni dubio majora videntur; — quae opinio magis etiam comprobatur, si rationem habemus temporis atque regionis, quibus illa experimenta sunt capta. Fuit sub *Cleopatra*, regina Aegypti, vel uti Rabbini dicunt, *Alexandriae*, nepote *Ptolemaeorum*, Anatomiae quam maxime fautorum; qui, ut huic scientiae et Physiologiae prodesse, *Herophilo* et *Erasistrato* medicis, concessisse dicuntur, viventes maleficos, capitis damnatos, persequere et in eos experimenta capere: cujus historiae fidem *Celsus* 6) et *Galenus* 7) testantur. His accedunt quae in *Talmude* reperiuntur, optime illustrantia modum quo iis temporibus experimenta in homines vivos facta sint; et hoc loco aliquam lucem spargentia in magnam obscuritatem, qua omnia involuta sunt quae de *Herophilo* ejusque assedis ad nos pervenerunt. Ratio vero qua errârunt,

6) »Longeque optime fecisse *Herophilum* et *Erasistratum*, qui nocentes homines, a regibus ex carcere acceptos, vivos incidere considerarintque.” (*Celsus: De medicina Lib. VIII. Ex recens. Leon. Targae. Argentorati 1806. Liber I. praefat.*)

7) »Qui (*Herophilus*) cum in aliis omnibus, quae ad artem spectant eruditus satis fuit, tum vero ad dissectionis exquisitissimam cognitionem pervenit, ac majori ea parte non in brutis, aut plerique solent, sed in hominibus ipsis periculum fecit.” (*Galen. de uteri dissectione. K. II. 895*). — In Dissertationis introductione retuli, discipulos *R. Jism aëlis* secasse meretricem; sed locus et tempus quibus id factum fuerit, non memorantur.

licet Naturam rite inquisiverint, haec mihi videtur, quod die circiter 35°—42° omnis foetus masculum simulet, per corpusculum illud eminens, quod Rabbini *penem* habebant: die autem 80°—90° genitalia externa iudicium minus fallax de sexu foetus admittunt. Auctor libri *de natura pueri* 8), Aristoteles 9), Galenus 10), omnesque veteres medici eandem fere opinionem quidem fovent, — mares sc. prius conformari — ut cum his loquar —

8) »Haec eo loco a me adducti sunt, quo demonstrarem, membrorum distinctionem in pueris fieri, foemina quidem intra duos et quadraginta dies ut longissime, masculo vero intra dies triginta. Cujus rei fidem faciunt partus purgamenta, quae quidem si suscepta puella fuerit, duobus et quadraginta diebus constingunt, si vero masculus editus fuerit, quam longissime triginta diebus.” (Hippocrat. *Opp. omn. Ed. Foës, Sect. III, p. 59*). Cf. *de carnibus* librum, *Ib. Sect. III, p. 34*, ubi narratur, foetum septimo die jam omnia habere.

9) Aristotelis: *Histor. animal. Liber VII. c. 4*. »Foeminens foetus, qui intra tres menses corruptus fuerit, fere indiseretus videtur: qui vero de quarto mense assumserit, et linditur et celeriter adipiscitur aliam dearticulationem. Hucusque universam membrorum perfectionem serius accipit femina quam mas, et mense decimo frequentius quam mas oritur.”

10) Licet Galenus (*de formatione foetus, K. T. IV. p. 653*) dicat: »Non enim foetibus neque manifestae conformationis, neque motionis neque editionis in lucem uetus definitus est terminus,” tamen in alio libro aliter statuit: »Foeminam quidem primam concretionem quadragesimo secundo die ut longissime suscipit, masculus vero trigesimo die ut longissime;” et porro: »qua ratione necesse est foeminam masculo posteriorem conformari.” (Galen. *Comm. III, in Hipp. Epidem. lib. B. K. XVII. A. p. 446*.): »Mas enim calidior est foemina” dicit! — Aliorum sententiae obveniunt in libro spurio Galeni: *de historia philosophica. K. XIX. p. 337 q. Cf.*

quam femellas, — sed dies conformationis alios statuunt quam Rabbini, illudque hanc ob causam, quoniam embryones humanos hunc in finem non solum non exploraverunt, — verum quoniam insuper plerumque mere theoretice his de rebus disserunt. Posterioribus tamen temporibus de hac doctrina sermo amplius non fuit; Oribasius saltem, Aëtius et Paulus Aegineta de ea non loquuntur.

Quae autem Rabbini de vario evolutionis tempore proferunt, haec modo sexûs differentiam respicere videntur, nempe partium genitalium perfectionem; dum formationem infantis utriusque sexûs intra dies 40 fieri statuunt. Nam (*Bechoroth*, 21 b): »dixit Rab Chisda »dixerunt enim, formationem (יצירה) infantis in muliere »(absolvi) per dies quadraginta 11).» Differunt igitur Talmudistae quoque in eo ab Hippocrate, dicente: »Quidam igitur foetus tribus ac quadraginta diebus conformationem habent, quidam quatuor mensibus.» (*De victus ratione in acutis*. F. Sect. IV. p. 4).

De formatione citis

Eodem tempore foetum cute investiri tradunt Talmudici; quae sententia aliquomodo etiam nostra aetate valet, statuente epidermidem et corium jam initio mensis secundi formari: — epidermis vero serius a corio se separat, hebdomade nempe octava (*Bischoff. l. c. p. 453*).

§ 10.

De seminis vi, in variis partibus efformandis,

Statuunt porro Rabbini, ad foetûs formationem non opus esse tota seminis quantitate; dicentes: (*Nidda*,

11) Cf. *Sanhedrin*, fol. 95 b.

31 a.) «homo non formatur ex tota gutta (seminis) sed ex puriori in ea.» (Aura seminali!).

Variae partes corporis vel e semine virili, vel muliebri formantur: ajunt nempe in Tractatu Nidda (fol. 31 a.): »Docuerunt Rabbini: tres socii sunt in homine: Deus, et pater suus, et mater sua. Pater, suus ejaculat albidum (לָבֵן) (semen), ex quo (oriuntur), ossa, tendines et encephalon in capite ejus, et album in oculo. Mater sua ejaculat rubrum (אָרֶם) (semen rubrum, sanguinem), ex quo formantur cutis, caro, pili et nigrum in oculo; et Deus, sit nomen Ejus benedictum! dat ei spiritum et mentem, vultum visumque oculi, et auditum auris, atque loquelam oris et gressum pedum, ingenium et intellectum. Et quum tempus adtenerit discedendi ex mundo, Deus, benedictum sit Ejus nomen! partem suam capit; et pars patris sui et matris suae ante eos jacet!» — Cum illis verbis aliquomodo conveniunt quae Galenus (de semine L. I. c. 8.) scripsit: ossa enim, secundum Galenum, ex crassa et maxime terrestri seminis parte, calore quasi combusta, formantur, et carnibus cinguntur; et calore quoque, quod pingue in ossibus est, ex horum extremitatibus effluit, et ligamenta constituit, atque circa ossium superficiem periosteum. Quaecunque autem carnosa in corpore inveniuntur, ex sanguine (Rubro Talmudistarum) originem trahunt, membranosa vero omnia ex semine (albo eorundem).

Tendines sero firmari, et membra sero inter se conjungi, patet ex sententia cujusdam Rabbini dicentis: *De firmatione tendinum.* (Chulin, 89 b.) »quod ad abortum cujus membra nondum per tendines (גִּידִים) connexa sunt 12).

12) Hoc loco verbum גִּידִים per tendines interpretandum esse

De secundinis.

Perpauca sunt, quae Talmudistae tradunt de membranis foetum cingentibus. Dicunt: foetum humanum a foetu brutorum differre, etiam per secundinas, (*Nidda, fol. 25 a, Bechoroth, 19 b.*); iis locis nimirum perhibent: »*signum* [characteristicum] *foetûs in bestiis teneris est* » *maculatio* (טִיטָה?) *in magnis velamenta* (שְׁפִיר), *in femina* (humana) *placenta et velamenta* (שְׁפִיר וְשֵׁלִיא 13). Descriptio quaedam generalis et valde obscura secundinarum sequenti modo obvenit in *Nidda, fol. 26 a.*: »*Docuerunt* » *Rabbini: Secundinarum* (שְׁפִיר) *initium simile est filo* » *subtegminis, et earum finis similis est lupino* 14), *et* » *cavae sunt uti tuba* (*Trompet*), *et* » *nullae secundinae* » *minores sunt quam pugni* (circumferentiae). R. Schimeon ben Gamaliël dixit: »*secundinae similes sunt*

censeo. Illa vox autem habet varias significationes. Cf. doct. L. Ali-Cohen: *De dichter van het boek Ijob als durkundige beschouwd. p. 39. nota 28.*

13) Sunt haec unica loca, ubi distinguunt inter שְׁפִיר et שֵׁלִיא. In *Berachoth fol. 4 a.* censerem, שְׁפִיר esse molam. Ceterum quum de secundinis loquuntur Rabbinæ, etiam in homine, vulgo solum illas voce שֵׁלִיא designant, et uti omnes veteres voce χῶριον, ita et Rabbinæ hac voce placentam et velamenta intelligunt. Neque commentatores inter se conveniunt, quid verbis שֵׁלִיא et שְׁפִיר intelligendum sit; ad quam confusionem non parum confert anatomiae multorum doctorum imperitia: neque ipse Maimonides meliorem lucem hîc spargit; in *Bechoroth* vero ad Mischnam I. cap. III. verbo שֵׁלִיא intelligit velamenta, et שְׁפִיר placentam habet, quibuscum etiam Baal Aruch (*ad voc.*) et Pinner (*Talmud Babli, Thl. I. Berachoth ad 4 a in Etymologia.*) conveniunt: שְׁפִיר denique etiam saepius significat: molam, abortum. Vid. Buxtorff: *-n voce.*

14) Raschi quoque legit: וְרֹאשָׁהּ רוֹכָה כְּחוֹרְטוֹס *et caput earum simile est lupino.*

»*stomacho galli ex quo exeunt tenuia* (intestina).” Haec omnia vaga sunt et valde confusa: jam ex usu promiscuo verbi שֶׁלֵךְ, nescimus utrum agatur de placenta, an de membranis; et ex solà confusione multae hunc locum interpretandi oriuntur difficultates, quae augentur etiam si rem accuratius contemplemur. »*Initium secundinarum simile est filo subtegrinus*,” nescio num velint initium formationis, vel initium sive finem superiorem vel inferiorem; »*et earum finis similis est lupino*” eàdem premitur difficultate. Raschi autem explicat: *quando increscunt secundinae, latae sunt uti lupinus*. Amnion quidem aliquomodo simulat formam fabae, sed tantummodo priore stadio evolutionis, et sic ad membranas, et iterum quidem ad amnion referenda sunt verba: »*et cavae sunt uti tuba*.” Placenta tamen nec initio formationis speciem habet fili, nec de ejus initio vel capite possumus loqui; neque placenta cava est; ergo de placenta non potest esse sermo. Altera iterum oritur confusio ex sententia R. Schimeonis, qui placentam videtur describere quando secundinas comparat cum ventriculo gallinarum, organo uti notissimum est, valde crasso et carnoso. Quidquid itaque sit, est locus certe corruptus; nam et Raschi pro parte aliter legit; et fateor me totam illam descriptionem aliter non intelligere.

§ 11.

Uti statuit auctor libri spurii Hippocratici: *de partu octimestri*, sic etiam Rabbini foetum, qui octavo *De infante octimestri*. graviditatis mense in lucem edebatur, habebant non vitalem. Haec ita referunt:

Jevammoth, fol. 80 a.: „Dixit R. Abuh a (omnes qui habent signa) cas-
 trati et sterilis et filius octavi 1) non
 aestimantur 2) usque dum sint annos
 viginti. Et filius octavi, num ille
 potest vivere? Didicimus enim: (Sab-
 bath 135 a. Baba Bathra. 20 a.)
 „filius octavi est lapidis instar, et non
 licet movere eum, sed sua mater se-
 flectat super eum et lactet eum prop-
 ter periculum 3).” — Sed putant hic
 quoniam signa sunt perfecta 4). Uti di-
 dicimus: Quis est filius octavi? Cui-
 canque nondum omnes impleverint
 menses. Rabbi dicit: signa testantur
 de eo 5), crines et ungues, qui non-
 dum sunt perfecti, tunc (proprie qui-
 dem) est infans septem mensium, (sed)
 „qui nimis diu moratus est (in utero).” 6)
 quomodo R. Abuh a dicere posset: expectandum est donec
 aetatem attigerit XX annorum. Vulgo enim hanc aetatem non
 attingunt.

5) Illum nondum esse perfectum.

6) Hoc est: infans talis mensibus 7 jam maturus fuit, sed
 dein adhuc in utero remansit per unum mensem.

1) Qui mense oc-
 tavo natus fuit.

2) Proprie, non
 faciunt ei factum;
 i. e. non aptus est
 uxorem ducere fra-
 tris sine liberis de-
 functi. Est jus ju-
 daicum ex mente
Deut. XXV. 5 sqq.,
 sic dicti leviratus,
 de quo imprimis
 agit Tractatus *Je-
 vammoth*.

3) Baschi addit,
 matris quoque est
 periculum, ne lac-
 nimia copia in
 mammis coacerve-
 tur.

4) Nam si in vita
 superesse nequit,

Auctor libri *de octimestri* perhibet: „proptereaue
 „eorum qui octavo mense eduntur nullus est superstes.”
 Aristoteles autem dixit: „in Aegypto octimestres foe-
 tus vitales sunt, in Graecia vero plurimi intereunt” (*Hist.*
animal. Lib. VII. c. 4). Plinius (*Histor. natural.*
Lib. VI. c. 5.) narrat exemplisque proba, in Italia tales
 partus esse vitales. Moschion quidem vitales octimes-

tres habet, sed addit „difficulter quidam evadere solent.“ (Moschion: *De mul. pass. Ed. cit. cap. 64*). Rabbini certe infantes octavo mense natos superstites etiam quidem observaverunt; hoc vero quia cum illorum theoria non conveniebat, miro modo statuunt, esse foetum septimestrem, qui nimis diu in utero moratus fuit. Quod attinet ad *ungues et crines* talis foetus, qui nondum sunt perfecti, cum illis conveniunt quae auctor libri *de superfoetatione* (Hipp. *Opp. F. Sect. III. 42.*) dicit: „cum „foetus minime vitalis natus fuerit, hujus unguis caro „supereminet, unguis vero tam in manibus quam in pedibus deficiunt.“ Haec de octimestri quidem eo sensu valent, quum unguis mense 8^o adhuc breves et molles sunt, dum lanugo supra totum corpus est dispersa. (Busch und Moser *l. c. Bd. I. Art. Aetas. p. 152*).

§ 12.

Inter argumenta embryologica, de quibus nostra *De superfoetatione.* etiam aetate non omnes conveniunt Auctores, pertinet doctrina *de superfoetatione*. Plurimi medici praeclari omnique fide digni multos publici juris fecerunt casus a se ipsis observatos, superfoetationem probantes; dum alii e contrario ex rationibus praecipue theoreticis, hanc doctrinam pervertere conati sunt, et superfoetationem omnino negaverunt. Casus affirmantes quoque retulerunt Rabbini (*Nidda, fol. 27 a.*). „Dixit Rab Acha filius R. Awi-
rae: dixit R. Jitschak: *Factum est, ut infans expectaverit post socium suum dies 33.* R. Joseph „dixit: 34 dies.“ (*Ib. Ib.*) „Dixit R. Abbin filius R. Addae: dixit R. Menachem ex Kefar Schearim: „factum est, quod infans moratus sit post socium suum

„tres menses, et sedent ante nos in schola. Et quinam „sunt? Jehuda et Chiskiah filii R. Chyae. Sed „nonne Mar dixit: foeminam non fieri gravidam et „iterum fieri gravidam? Dixit Abajae: gutta (semi- „nis) una fuit, et divisa fuerat in duas, una perfecit „formam suam initio mensis septimi, et altera fine „mensis noni.” Primo in casu gravida erat femina ge- mellis, quorum unus dies 33 ante alterum venit; in alio casu mulier peperit infantem, postquam tres menses antea primum infantem enixa est. Mar negat existen- tiam superfoetationis, uti Cl. R o o s e, B l u m e n b a c h, L u d w i g, multique alii recentiores, quia femina jam gravida non iterum gravida fit; dum Rabbini, qui casus narrant, affirmant superfoetationem revera locum habere posse; id quod ab aliis multis quoque defenditur, ab auctore inde libri *de superfoetatione* ad nostrum diem usque. Rabbini Abajae singularis est opinio, assen- tientis Mari feminam gravidam iterum gravidam fieri non posse; cum autem casus ab aliis Rabbiniis memo- rantur, ex quibus pateret revera superfoetationem adfuisse, illas ita explicat, ut gutta seminis, quae feminam foe- cundaverit, in duas partes fuerit divisa, et exinde duo infantes sint orti, quorum unus mense septimo jam per- fectus fuit et natus, alter serius perfectus, demum post novem menses in lucem fuit editus. Profecto necesse non erit, hanc explicationem demonstrare omni veritatis specie destitutam.

§ 13.

*De animali-
one foetus.*

Per multa secula Medici, Theologi et Philosophi disputaverunt de quaestione: utrum foetus in utero

materno animatus sit, nec ne? De industriâ in iHam etiam inquisiverunt Talmudistae in Tractatu *de Synedriis* (fol. 91 b.), ubi sequentia leguntur:

» *Et dixit Antoninus 15) רבֿי* Rab-
 » *bi: a quonam tempore inde animus* 1) פְּקִירָה = com-
 » *datur in homine, a tempore inde* memoratio (Gen.
 » *commemorationis 1) vel tempore con-* XXI. 5.), concep-
 » *formationis? Dixit 2) ei: a tempore* tio, 40 dies ante
 » *formationis. Dixit ei 3): num qui-* יצירה formationem,
 » *dem frustum carnis absque sale pos-* vel tempus forma-
 » *set per tres modo dies superesse et* tionis.
 » *foetorem non spargere? non aliter est* 2) Rabbi impera-
 » *quin a tempore commemorationis in-* tori.
 » *de 4). Dixit Rabbi: hanc rem ab* 3) Antoninus.
 » *Antonino didici. Et Antoninus* 4) Animus datur
 » *dixit ei: a quonam tempore inde con-* in homine.
 » *cupiscentia mala hominem regit, a* 5) Ex utero =
 » *tempore inde formationis, an a tem-* partus.
 » *pore exitus 5)? Dixit ei: a tempore* 6) Antoninus.
 » *formationis inde. Dixit ei 6): id si* 7) Concupiscentia
 » *ita esset, nonne illa 7) ei impelleret* mala.
 » *ut exiret? non aliter est, quin a*

15) In Talmude obveniunt multa loca, e quibus familiaritas R. Jehudae Sancti cum Romanorum imperatore quodam Antonino constat. Dissentiunt autem Historici, quisnam Antoninorum fuerit ille qui cum Rabbi tantam amicitiam coluerit. Nonnulli perhibent illum fuisse Antoninum, cui cognomen Caracalla (Jost); alii vero, crederem meliore jure, Marcum Aurelium vel Autonium Pium (Rappoport.). Cf. *Keren Chemed. Tom. IV et VII. et Litt. Blatt des Orients* 1844. No. 37.

»tempore exitus inde! Rabbi dixit, illam rem mihi »docuit Antoninus." 16)

Videmus ex iis, in Talmude statui: facultates mentales quidem in foetu se palam non facere, animam tamen jam statim ei inesse. Rabbi autem forsán Aristotelis doctrinae fuit addictus, statuentis (*in libro de anima*), animam non prius homini inesse quam sit natus 17).

§ 14.

*De situ et
vita infantis
in utero.*

Situm foetus in utero egregie illustrat Tractatus *Nidda*, (*fol. 30 b.*), quo loco simul quaedam adduntur de vita foetus. „*Explicavit R. Samlaï* 18):

16) Similia invenimus in libro false Galeno adscripto; *an animal sit, quod in utero est.* (K. XIX. p. 368.): »Eo perspicuum est, una cum jacto in uterum semine, insitam a creatore »universi esse animam, ut gubernandi vim corporis habeat." Cf. *Definition. medic.* K. XIX. p. 455 sqq.

17) Quod ad animationem foetus, haec sunt addenda. »Stoici »partem ventris [materni] non animal; utque fructus, qui stir- »pium partes sunt, ubi maturuere, defluunt; ita et rem se ha- »bere de foetu." (Plutarch. *de placitis philosoph.* Lib. V. c. 35. apud von Siebold: *Geschichte der Geburtshülfe u. s. w.* p. 209). Antoninus vero, secundum Talmud, contrarium statuit: et revera tempore Antoninorum, Academicorum doctrina magis magisque defendi coepit, *foetum sc. jam esse anima- tum.* Cum Stoicorum placito aliquomodo conveniunt quae dicuntur in *Eirchin*, fol. 7 a. et alibi »*foetum esse ipsum corpus ma- tris*" »*esse femur matris.*" Capite vero foetus nato, infans וְדָן = individuum, persona, habebatur, eique omnia jura compete- bant, quae cuivis alii homini. (Vid. porro ad partum abnormem ubi de *Embryotomia* agitur).

18) Floruit altero dimidio Seculo III. p. Chr. (circa 250-300).

„Cui similis est foetus in intestinis matris suae? Ta-
 „bulae scriptoriae convolutae! et ejus manus positae
 „sunt ad duo tempora ejus, duae axillae supra duo
 „genua ejus, et duae ejus calces contra nates ejus duas,
 „et caput ei positum est inter femora, et os ejus clau-
 „sum est, et umbilicus apertus, et edit ea quae mater
 „edit, et bibit illa quae mater bibit, et alium non
 „deponit, ne forsitan necaret matrem suam. Et quum
 „exierit in aërem mundi, clausum aperitur et apertum
 „clauditur; nam ea si non ita essent, ne unam quidem
 „horum posset vivere!” — Sic et auctor libri *de natura*
pueri scripsit: „At vero puer ubi in utero existit, ma-
 „nibus ad genas adhaeret caputque pedibus proximum
 „habet; neque certo dignoscere queas, etiamsi puerum
 „in utero videas, utrum caput sursum an deorsum vergat.”
 [Hipp. *Opp. F. Sect. III. p. 26. Cf. Aristot. Hist.*
animal. Lib. VII. c. 7.]

Illam descriptionem R. Samlaïi si comparemus cum iis, quae nostra docuit aetas de situ foetus in utero, tantummodo corrigenda sunt quae de manibus dixit: foetus nempe non quidem regulae et normae instar manus ad tempora habet positas, sed vulgo supra pectus decussatas tenet; cetera hodie fere eodem modo docentur. Et haec profecto, quam Rabbini dederunt, descriptio valdequam differt ab illa multorum imo recentioris aevi Auctorum; si nempe ex iconibus, ut plurimum ligno incisis, et seriori tempore illis operibus adjectis, concludere liceret ad ipsam Auctorum cognitionem physiologicam: — at vero incongruae tales delineationes bonam plerumque comitantur descriptionem 19).

19) Probant illa icones, adjectae operibus, quae conferre mihi contigit: nempe

Quae insequuntur loco citato, optime conveniunt cum iis, quae jam in libro *de octimestri* scripta sunt: „Um-

Der Swangeru Frawen und Hebammen Rossgarten, primus forsitan post medium aevum liber de arte obstetricia, typis editus anno 1513 Coloniae, vel ex aliorum opinione Vormatiae, cujusque auctor est Eucharius Rösslin, vel Rhodion. (De quo plura vide in Osiander, *Lehrbuch der Entbindungskunst*, Vol. I. Gott. 1799, p. 102-104.). Porro

Den Rosegaert van de bevruchte Vrouwen; gheprent Thantwerpen, in die Baghijnen strate, bi mi Jan van Ghelen (sine anno: sed certissime in prima quadrante seculi XVI): est forte hic libellus versio Belgica libri Gualtheri Hermannii Reiffi, inscripti *Frawen Rosengarten*; omissis pluribus stultitiis, quas in illo reperiri notat Osiander l. mox cit. § 134. Situs foetus in utero optime hic est descriptus Fol. II.

Hebamenbüchlin. Empfengnusz und geburt des menschen, cet. *allen getreuwen Hebammen und Seugmüters zuwissen hoch von nöten.* 1561. Francofurti. (Videtur opusculum Euch. Rösslini mox citatum; quem vero emendavit et mutavit A. Lonicerus. Bona hic etiam descriptio situs foetus. pag. 7 b.

Alberti Magni editio Hamburgica anni 1592, titulo: *alle geheimnusz und gebrechen des weiblichen geschchts.*

Ambrosius Paracelsus, *de hominis generatione*, Cap. XIV. *de situ infantis in utero.*

Jacob Rueff, *de conceptu*, cet. Francof. 1587. Posteriora duo opera sunt recusa in J. Spachii *Gynaecologia*, Argentor. 1597.

Thomas Raynalde, *the birth of mankinde, otherwise named the womans-booke* London, 1604. 4to. In ipso hujus temporis libro reperiuntur perversae istae situs foetalis delineationes.

Melius illum situm jam antea docuerant icones in: *Ein schön lustig Trostbüchle von den empfangknussen und geburten der menschen, und iren vilfaltigen zufalen und verhindernussen, mit vil und mancherleij bewarter stücken und artzneyen ouch schönen figuren*

„bilicus autem, per quem ad pueros ingressus patet, solus
 „ex reliquis corporis partibus, matri adhaerescit, per
 „quas vias eorum, quae ingrediuntur participes sunt,
 „cum reliquae clausae sint, nec prius apertae, quam
 „puer exitum ex utero tentavit.” (Hipp. Opp. F. Sect.
 III. p. 40.); dum in libro *de natura pueri* de foetu dici-
 tur: „et sanguine a matre in uterum delapso incrementum
 accipit:” auctor vero libri *de carnibus* statuit, foetum
 ore suo nutrir.

Quae R. Samlaï dicit: „*foetus album non deponit*”,
 nostris quoque diebus valet; etiamsi nos non statueremus,
 id si accideret, matrem exinde occumbere, quia in
 liquore amnii foetuum mortuorum meconii partes quidem
 inventae sunt, sine ullo tamen matris damno.

Talmudistae embryonem in amnio suo convolutum
 non incongrue comparaverunt cum nuce aquis innatante.
 Dixit enim R. Eleazar (*Nidda*, fol. 31 a.): „cui *foe-*
 „*tus similis est in intestinis matris? Nuci in pelvi*
 „*aquae (aquâ repleta) positae; homo ei imponit digitum,*
 „*et immergit nunc hinc nunc illic.*”

Undique Rabbini foetum partem ipsius corporis ma-
 tris aestimant, et sic in *Jevammoth*, (fol. 78 a.) San-

cet. durch Jacob Rüff, Barger und Steinschnyder der loblichen
 statt Zürich. Zürich 1569. 4to. Etiam in

't Boeck van de Frochtwijfs, in 't welke men mach leeren alle
 heymelyckheden van de Vrouwen, oet, na Jacob Ruff overgezel
 door Martijn Everaert, Amst. 1580.

Hos libellos, ut plurimum rarissimos, aliosque uti von Wey-
 bern und geburten der Kinder durch Q. Apollinarem, 1591.
 4to, — Schwangerer, Kreissender Wochnerin und Seugender
 Regiment, Holl. 1591 cet. inveni in Bibliotheca cl. de la Faille,
 et perscrutatus sum.

hedrin (fol. 80 b.) „foetum femur matris suae” vocant, et in *Tractatu Eirchin* (fol. 7 a.) dicunt: „foetum „esse ipsum corpus matris,” et ita passim per totum Talmud.

C.

DE MONSTRIS ET MOLIS.

§ 15.

*Quae mon-
stra sunt in-
fantes vere
humani.*

Permulta scripta veterum, nec non medi aevi, temporis tam superstitiosi, referta sunt descriptionibus monstrorum cujuscunque generis: horum etiam Talmud nonnulla enumerat, pro parte quidem phantasmatica, plurima autem ut ludi naturae vere existentia. Doctores Mischnici, de monstris agentes, sequentem statuunt thesin primariam: *quodcunque femina in lucem edat, id debet habere saltem aliquid faciei humanae, si infans vere humanus sit accipiendus.* (*Nidda*, fol. 21 a.). Talis foetus infans aestimatur, si habet frontem, superciliis, oculos, maxillas et mentum formae humanae; os vero, aures et nasus, licet formam referant alicujus bruti, non impediunt quominus talis foetus humanus declaretur: quaestio itaque exsurgitur: *num mater propter eum sit polluta, nec ne?* (*Nidda*, fol. 23 b.). Disputant doctores porro: *utrum foetus sit accipiendus humanus, qui habet faciem hominis et corpus hirci (שרץ), vel faciem hirci et corpus humanum; vel talis foetus, cujus facies*

quidem est humana, attamen unum habet oculum, uti oculum bestiae. Conclusio est secundum Mischnicos: si ei foetui insit aliquid faciei humanae, est infans, aliter non. — Foetus si nascatur formâ gaudens serpentis, mater est polluta ob partum, quia pupillam habet humanam (*Ib. Ib.*), — [ita Plinius narrat: (*Histor. Natur. L. VII. c. 3.*) »namque et serpentem peperit inter initia »Marsici belli ancilla]". Antiquitas, talium monstrorum originem variis ornavit fabulis, uti coïtu daemonum, brutorum, cet. cum feminâ humanâ, vel hominis cum animalibus: — quia autem satis nunc constat, concubitum inter bruta et homines semper esse sterilem, omnia illa, quae hac de re tam Talmudici quam ceteri Auctores veteres narrant, inter fabulas sunt recensenda.

§ 16.

De monstris autem qualia vere nascuntur, etiam nobiscum quaedam communicant Talmudistae. Sic legimus (*Nidda, fol. 23 b.*): »Rabbi dixit: (si) fuerit creatus (foetus) uno oculo et uno femore ad latus, mater immunda est; (si fuerit creatus uno oculo et uno femore, quae ambo sunt) in medio, mater munda est. Dixit »Rabba: si oesophagus ejus est perforatus, mater ejus »est impura; si oesophagus est obturatus, mater munda »est. Docuerunt Rabbini: quae abortit corpus obturatum (מסור נקי), mater ejus non est immunda propter »partum. Et quid est corpus obturatum? Rabbi »dixit: quantum ab homine vivo potest auferri, nec »tamen moriatur. Et quantum [sic rogatur] ab homine »vivo auferri potest, ut moriatur *)? R. Zaccai

*Enumerantur monstra-
rum variae
species.*

*) Sensus est: quantum ab homine vivo auferendum esset, ut exinde istum hominem mori necesse sit?

«dicit: ad genna usque. R. Janai dicit: ad anam ejus usque. R. Jochanan dicit: ex nomine R. Jose »Jozuae filii: ad locum usque umbilici ejus.” Quod ad alia monstra attinet nostro loco commemorata, omnia nostro etiam tempore ita observantur. Videntur Rabbini illo solo principio ducti, num foetus esset vitalis, nec ne, — ut declararent, feminam esse pollutam ex partu, nec ne? Hoc videtur probare monstrum illud duobus dorsis et duobus spinis dorsii instructum, — de quo infra, — ex quo mater non polluta declarabatur, quia illum foetum vivere non posse credebant, et hinc infantem non habebant.

Quod citaverunt Rabbini corpus obturatum, non abs re videtur referre ad classem *Peromeliae* (Gurlt) vel *Ectromeliae* (Geoffroy de St. Hilaire) monstrum nempe deficientibus extremitatibus inferioribus et imperforato ano 1) *Vid. Busch und Moser. l. c. III. 505.*

1) Describit Cl. W. Vrolik, (*Handboek der Ziektekundige ontleedkunde. Tweede deel. Amst. 3842. Aangeborene gebreken. p. 300 sqq*) monstrum quoddam, musei Groningani, (antea musei Cl. N. Mulder), capite et extremitatibus superioribus rite formatis, cujus autem pars inferior corporis est detruncata et quasi in conum obtusum desinit, dum ne rudimentum quidem extremitatum inferiorum neque genitalium adest. Credit vir Cl. observationem illius monstri unicam: si autem quae reperiuntur in Talmude de corpore obturato cum hoc monstro comparamus, forsitan quidem Rabbinos, nomine «corporis obturati» idem descripsisse monstrum credere fas est. Cl. C. P. J. Wolff: *Diss. de monstros Sireniformibus. Amst. 3839, p. 53-57; praesertim Tabula prima.* — Vide porro quae de Corpore obturato dicuntur ad caput de *Infante dissoluto.*

In eodem Tractatu (*Nidda, fol. 24 a.*) alia adhuc memorantur monstra his verbis: »*quae abortit* (foetum) »*cujus cranium est obturatum* (שגולגולתו אטומה).» Jarchi explicat: *cujus cranium deest* (Anencephalum). — Porro »*quae abortit uti apex palmarum* (כמין אפקת דריקלא),» nempe cujus membra superiora adsunt, pars autem inferior est sine ulla forma, non divisa, uti truncus palmarum. (Raschi): hoc videtur monstrum *Sireniforme*²⁾. Mentionem adhuc faciunt de monstro, »*cum facie aliquomodo compressa* (שפני מוכססין)»: mater est polluta propter talem infantem. Citant porro monstrum, faciem habens anni forma destitutam (פני שחוח), et narrant, filios R. Chijae talem habuisse casum; venerat nempe ad illos mulier, quae abortu ediderat foetum cui facies erat sine ulla forma; declaraverant matrem pollutam: Pater autem (R. Chija) filiis non consensit, et mulierem puram declaravit.

Eodem loco sequens occurrit monstrum: »*quae abortit creaturam, cui sunt duo dorsa et duae spinæ dorsales*: Dixit Rab: *apud foeminam non est infans,*

2) Observationes talium monstrorum narrat quoque N. Rocheus: in libro *de morb. mul. curand. Cap. XXII. (Recus. in J Spachii Gynaecologia. Argent. 1597. p. 308.)*; deinde nonnulli alii auctores. Ante aliquot annos praeceptor aestumatis-
simus de la Faille parum difficili tale monstrum sireniforme vidit natum: femina, quae illud peperit, per quinque posteriores graviditatis menses continuo praedixerat, se infantem edituram esse uno solo instructum crure, et quidem ex causâ vehementis terroris, quum vespere illi, in cubiculo soli, et operâ domesticâ sc. colo occupatae, subito mendicus elaeemosynam flagitans, monstraverat baculum, cruris amputati loco adlaxum. Sceletum hujus monstri descriptum reperias a Cl. Vrolik, l. c. p. 110, et Wolff. *Diss. taud. p. 32-34.*

»et apud bestiam illicitus est ejus esus; et Schemuël
 »dixit: apud foeminam est infans, et apud bestiam
 »licitus est ejus esus." Porro (*Ib. Ib.*), »quae abortit
 »creaturam corporis non incisi, et creaturam capitis
 »non incisi" (ברייט גוף שאינו חתוך וברייט ראש שאינו חתוך), — ma-
 ter non est impura ex partu, nam infans circumcidi nequit,
 quia per octo dies non potest vivus superesse. »Creatura
 corporis non incisi" tale est monstrum in quo nullo modo
 membra, vel forma articulata, possunt dignosci. [*Peromelia* (Gurlt), defectus omnium extremitatum?] Sic
 et »capitis non incisi," cujus caput nulla vestigia praë-
 bet oculorum, neque nasi, vel cujusvis formae in genere:
 censerem illud esse referendum ad classem *Aprosopiae*
 (Gurlt) vel *Triocephaliae* (Geoffroy de St. Hi-
 laire): monstrum sine faciei formâ.

Aliud monstrum ita memoratur: (*Ib. Ib.*): »Dixit
 »Schemuël: quae abortit formam Lilith, mater ejus
 »immunda est ob partum; est infans, sed sunt ei alae.
 »Etiam ita didicimus: dixit R. Jose: factum est
 »Simonae in aliqua femina, quae aborta erat formam
 »Lilith, et venit coram sapientibus, et dixerunt: infans
 »est, sed sunt ei alae." 3).

3) M. Pierquin écrit relativement à un cas de monstruosité,
 qu'il a observé chez un foetus humain, et qu'il croit n'avoir
 pas encore été décrit. »Chez cet individu qui est du sexe femi-
 nin et qui paraît être à terme, on observe un repli cutané qui,
 »partant des bords supérieurs des pariétaux, s'élargit considéra-
 »blement, puis se rétrécit et va se terminer en pointe vers la
 »région lombaire, offrant dans son ensemble la figure d'un cerf
 »volant." *Comptes rendus des Séances de l'Académie des Scien-
 ces. Tom. XVIII. No. 27. Séance du 30 Juin 1844, p. 1111.
 Paris 1844.* — Ceterum notandum, *Lilith* significare hoc loco
vespertilionem, ita ut vox »alae" satis videatur accurata.

§ 17.

Mentio saepissime fit in Talmude de duabus formis Hermaphroditismi, de *Androgyno* sc., et de *obturato* (אנדרוגינוס וטומטום). Forma *Androgyniae* satis superque nota est, neque hinc ulteriorem postulat explanationem. *Obturati* vero nomine intelligunt talem infantem, qui nec signa praebet virilitatis, neque genitalium muliebrium, sed *obturatus* est, — forte non perforatus? (*Vid. Maimonides in Hilchoth Ischus, cap. II. No. 25.*). De his, sequentia statuerunt Mischnici (*Nidda, fol. 23 a*): »*Quae abortit obturatum et androgynum, debet polluta manere pro mare et femella. Obturatum et marem (quando abortit), Androgynum et marem, tunc sedeat pro mare et puella. Obturatum et puellam, Androgynum et femellam, sedeat pro femella.*» Diebus enim purificationis pro puella simul comprehendunt illos maris, et in tali casu sedet et pro mare et pro femella 4). Quid autem proprie significat *obturatus*, valde videtur incertum. Num forsitan sit monstrum ex ordine cryptorchidum una cum *hypospadia*? Illud crederem eo magis, cum probari videtur casu certe memorabili sequenti, qui legitur in Tractatu *Jevammoth (fol. 83 b.)*. »*R. Amme dicit: quid fecit R. Jehuda obturato ex Biri (nomen cujusdam loci)? Posuit eum in sella et secavit eum, et genuit (ille obturatus*

De Androgyno et obturato.

4) De Androgyno etiam Hippocrates loquitur in Libro: *de victus ratione in acutis (Opp. omn. Ed. Foës, Sect. IV, p. 15)*. Sic Plinius quoque narrat: »*gignuntur et utriusque sexus, quos Hermaphroditas vocamus, olim Androgynos vocatos, et in prodigiis habitos nunc vero in deliciis*» (*Hist. Natural. Lib VII, cap. 4*).

»postea) *septem filios.*» In Mischna (*Jevammoth* 81 a.) loquuntur »*de obturato, qui laceratus est* [שנקרע = qui »secatus est] *et invenitur mas, non discalcebit.*» Videtur itaque exstitisse in casu mox citato R. Jehudae atresia, quam R. Jehuda cultro sustulit: itaque obturatus ille ex Biri revera *obturatus* fuit" 5).

§ 18.

*Rabbini
duas species
molarum as-
sumserunt.*

Rabbini jam duas species molarum assumnsisse videntur, quippe loquentes de *frusto* quodam abortivo (תריכה) quod sanguinem coagulatum, menstruum habent; et propter tale frustum quocum simul sanguis effluerit, polluta est femina ob *menses* (et non ob partum sive abortum). Illud itaque convenire videtur cum nostrarum molarum spuriarum specie *sanguineâ*. Alias molas שפיר (*membranulas*) vocant; forsán quidem, quia membranae cuidam includitur mola. Ut plurimum hoc verbo intelligunt foetum antea exstitisse, qui dein dissolutus fuerit. Vel alias formas describunt, in quas foetus dissoluti mutati sunt, et ob tales molas feminam ob partum nonnumquam pollutam declarant. Hae sunt nostrae molae verae. Nullo vero loco molam habent morbum uteri. Dissentiunt itaque a Moschione (*de mul. pass. Ed. cit. cap. 135.*) et ab Aëtio (*Tetrabibl. IV. Sermo IV. cap. 80.*) multisque etiam recentioribus, qui contrarium statuerunt, molas sc. *morbos* uteri sistere. Tamen exci-

5) Inter veteres, Plinius idem fere narrat, de quopiam a parentibus puella habito, et dein in marem commutato, cui barba et virilitas supervenerant, quique uxorem duxerat. (*Hist. Natural. Lib. VII. cap. 4.*).

pere debemus casum in *Nidda*, fol. 22 b. quo de femina sermo est, quae abortivit *corticulas rubras*; sed illum casum dubium declaraverunt Rabbini, et inter eos non constitit, num corticulae illae fuerint producta morbosa, vel sanguis menstrualis: (vide illum casum accuratius in § de *Abortu*). Statuunt e contra, molas sistere vel sanguinem coagulatum plerumque menstruum, vel infantem qui unum alteramve formam assumsit. Denique *molas cujuscumque formae* semper abortum habebant, quod etiam apparet ex usu verbi המפלה (= quae abortit), quo verbo nempe ubicumque utuntur 6), si agatur de molis.

§ 19.

Molarum varias species enumerant Rabbiui, feminamque quae molam in lucem profert, impuram vel puram declarant, pro casûs natura, — num sc. simul effluat sanguis, nec ne. Attamen sanguinem illum habent menstrualem sanguinem, et mulier propter sanguinem illum non ob partum verum est polluta, sed propter menses; itaque si mola spuria nascitur, partus verus non est, sed abortus. Ut hodie, sic jam Rabbini, (vid. § praec.) molas spurias, tales quae constant sanguine coagulato, observaverunt (*Nidda*, fol. 28 a. et b.), et dicunt eas constare »quatuor coloribus sanguinis menstrui (Ib.)." Suadent tale frustum dissecare, ut pateat num forsan sanguis non coagulatus insit, siquidem tunc femina foret

Enumerantur molarum nonnullae species.

6) Non solum molarum partui, verum etiam partui monstrorum illud verbum adjungunt, et non sine omni jure, quum monstra fere semper ante solita :: graviditatis finem in lucem edantur. ,

polluta ob menses. Disputant porro (*Nidda*, 21 b.) de mola (frustum) quae *interne* rubet.

Molarum verarum exempla nonnulla quoque recensent Talmudici. Agunt v. g. de mola ossea (*Nidda*, 21 b.), quae venit sub nomine *frusti albi*, quod findere suadent; nam si insit os, mater certe immunda est propter partum: — perhibent enim, infantem exstितisse qui perierit; et sane non immerito; cum satis notae sint mutationes, quas subeunt aliquando embryones degenerati. In *Nidda*, fol. 24 b. variae molae describuntur, et sequentia a doctoribus Mischnicis traduntur: » *Quae abortit molam* (molam veram, רשפ) *plenam aquae, plenam sanguinis, vermiculorum plenam* (sec. alios colorum) *non suspicatur de prole; et si acupicta fuerat, sedeat propter marem et puellam.*” In Gemara hujusce Mischnae dicunt nonnulli, sanguinem et aquam nihil esse, — hoc est sanguinem illum et aquam non sistere embryonem degeneratum; — attamen si vermiculi adfuerunt (mola carnea, quae uti vermes est figurata Maimon.), tunc forsitan cogitandum erit, infantem initio revera exstितisse, dein vero dissolutum fuisse.

Cum hac vero sententia non consentirem: nonnumquam enim ita dissolvitur foetus, ut nihil superesse diceretur quam velamenta, quae vel humorem continent aquae ad instar (mola aquosa), vel sanguinem (mola sanguinea), vel materiem gaziformem (mola ventosa). Nonnumquam et particulae ipsius foetus, vel ejus funiculi umbilicalis fragmenta supersunt, et interdum molae non nisi aquam continent flocculis refertam. Si tamen id vellent: *foetum verum non exstितisse*, nos quoque Rabbinis possumus concedere; quemadmodum plurimis in casibus molarum evolutio non ita procedat, ut foetus evolutus jam fuerit

tempore quo mola nascatur: nam ovum ex variis causis (nostra quoque aetate valde obscuris) jam ante embryonis evolutionem forte degeneratur 7).

Disputant porro (*fol. 25 a.*), num ex contentis molae non acupictae, de infante esset cogitandum nec ne? Dicunt nonnulli, si contentum sit clarum, purum, (צלול) non esse suspicandum foetum exstitisse; sed si contentum fuerit turbidum (עכור), tunc embryonem exstitisse suspicari licet. Schemuël vero idem esse contendit, utrum contentum sit purum, clarum, nec ne; in omni tali casu semper foetum habens revera degeneratum. Ex his iterum videmus, quantum Schemuël prae aliis excellerit, et quantus fuerit Naturae scrutator.

Nobis servaverunt quoque Talmudici modum, quo Schemuël molam exploravit (*Nidda, 25 a.*) »R. Dimi, »*quum venerit, dixit: numquam molam* (שפיר) *puram* »*declaraverunt Nehardeae, nisi illam molam quae venit* »*coram Schemuële, qui ei imposuit pilum in uno* »*latere et potuit videre (pilum) ab alio latere. Tunc* »*dixit: si id (hujus molae contentum) a foetu aliquo* »*oriretur, tunc non tam clarum foret."*

§ 20.

Formationem quamdam Rabbini describunt, medium *De Sandalo*, quasi tenentem inter monstrum et molam carnosam, quamque *Sandalum* (סנדל) vocant. Illa denominatio originem trahit a *Sandalo* quodam pisce marino, qui formam habet Sandalii vel soleae. (*Vid. Buxtorff in voce, p. 1511.* Baal Aruch eum habet frustum carnis

7) Molam acupictam descriptam vide p. 44.

uti soleam). Describunt talem *Sandalum* in *Nidda*, (fol. 25 b.) »Docuerunt Rabbini: *Sandalus* formam »habet piscis marini, in initio infans erat, sed compressus est. R. Schimeon, filius R. Gamaliëlis, dixit: »*Sandalus* similis est linguae magni bovis (i. e. omnino »compressus sine ulla forma figurae in facie). *Ex* »nomine nostrorum magistrorum testati sunt: necesse est, »ut *Sandalus* habeat formam faciei." Huic sententiae etiam assentit Schemuël, alii vero negant. Sandal, ajunt, numquam sine infante in lucem editur; nam vulgo in graviditate gemellorum oboritur, et tunc unus infans alterum ita comprimit, ut ille exinde fiat »planus" et omni formâ orbatus, et sic oritur *Sandalus* (*Nidda*, ib. ib.) Hoc autem ne fiat, feminae, quae concepit et gravida est, suadent a concubitu se abstinere, vel gossypium in vaginam immittere, ne semen virile uterum intret feminaeque de novo fiat gravida. (*Nidda*, fol. 45 a. *Jerummoth*, fol. 12 b., fol. 100 b., *Ketuboth*, 39 a., *Nedarim*, 35 b.) 8). — *Sandalus* autem si jam efformatus est, eodem tempore ac verus infans in lucem editur, nonnumquam cum fine suo inferiore adhaerens umbilico alterius infantis veri (*Nidda*, 26 a.). Idem fere dicit Ambrosius Paré in libro *de hominis generatione*, quo de molis agit: »nonnumquam et foetui integro ligatae et adhaerentes molae!"

8) Sapientes vero ab illo consilio abhorrent, dicuntque (*Nidda*, fol. 45 a. et alibi) »coëat uti vulgo fit et ex coelo miserebunt villarum! nam scriptum est: (*Psalm.* 116, 6.) »*Deus conservat Stultos!*""

CAPUT II.

DE GRAVIDITATIS NEGOTIO.

A.

DE PUBERTATE ET STERILITATE.

§ I.

Ex lege Mosaiica, nec non ex mente institutionum Talmudicarum, feminis diversa jura competunt pro aetate, quam attigerunt. Haec aetas autem ut magis stabiliretur, a Talmudicis ad pubertatem usque hoc modo divisa est: ad annum XIII^{um} puella vocatur *parva* et *infans* (קטנה תנוקה); quando autem nata est annos XII, et exorti sunt pili circa pudenda, vocatur *juvenca* (ניצה), hisque pilis nomen dederunt *signum inferius* (סימן התחת); Hoc signum si jam exstabat, et puella nata erat annos XII et dimidium, tunc *pubescens* (בגרה) habebatur. Ab hoc inde tempore, si signa omnia aderant, et praesertim si prolem ediderat, *adulta* (גדולה) simul vocabatur; — tunc quoque virgo habebatur nubilus; nempe quum nata fuerit annos XIII. Signo inferiori opponebant signum su-

*De signis
pubertatis*

perius, quod imprimis ex mammis incrementibus petierunt. Hanc mammarum evolutionem tempore pubertatis, accuratissime ita descripserunt Talmudici (*Tract. Nidda, fol. 47 a.*) et quidem primo loco in ipsa Mischna: »*Parabolice locuti sunt sapientes de muliere: ficus immatura (grossulus), ficus maturescens et ficus matura. Grossulus, adhuc est infans; — ficus maturescens, hi sunt dies juvenutis ejus; — ficus matura, quando pubescit. Quenam sunt signa (adultae virginis nubilis)? R. Jose Galilaeus dicit: quando plica oritur infra mammam. R. Akiba dicit: quando mammae inclinaverunt. Ben Azaï dicit: quando corona papillae nigrescit. R. Jose dicit: si quis imponit manum papillae, eaque subsidet et tardat recerti.*» Haec doctorum Mischaicorum. In sequente Gemara porro adduntur: »*Dixit Schemuel: non quae vera oritur plica, sed quando manus suas retrahit (virgo), et videtur quasi oriatur plica infra mammam. Schemuel exploravit (illud) in ancilla sua.*» Paullo post haec invenies: »*Docuerunt Rabbini: Ea sunt signa virginis nubilae (pubescentis): R. Eleazer, filius R. Zadokis, dicit: quando mammae increment. R. Jochanan, filius Berokae, dicit: quando pallescere incipit papilla. Quum incipiat pallescere tunc jam est vetula? Sed R. Asche dicit: quando fissurae in papilla veniunt. R. Jose dicit: quando corona durescit. R. Schimeon dicit: Mons veneris (רֶכֶס) quando mollescit. Et sic dicebat R. Schimeon, Jochaïi filius: tria signa dederunt sapientes in femina, deorsum et invicem sursum 1): nempe, si grossulus (est)*

1) Signa superiora non enumerat. Sunt varia signa a mammis deducta.

»sursum, certe nondum produxit pilos duos; (si) ficus
 »maturescens (est) sursum, certe produxit duos pilos;
 »si ficus matura (est) sursum, certe quod mollescat
 »Kaph (Mons veneris). Quid est Kaph? Dixit R.
 »Hunna: est locus convexus supra illum locum (geni-
 »talia externa); quique eo magis mollescit quo magis
 »increseit."

In universum magnam fidem Rabbiui pilis habent ad locum pudendorum exoriundis, vel ad axillas in utroque sexu; et semper loquuntur de ortu duorum pilorum, ut signo pubertatis.

Auctor libri VI *Epidemiarum* (Hippocrates?) loquitur de pilorum eruptione tempore pubertatis, et quidem ita: „Aetatem quidem ab aetate distinguere „oportet. Dentium eruptiones, capillorum exortus, seminis „ejectio, majus aut minus pilorum incrementum." (Hippocrat. *Opp. F. Sect. IV. p. 295*). Galenus quoque mammas tempore pubertatis extuberantes pilosque erumpentes memorat 2). Attamen mammarum incrementum est signum adeo notum pubertatis, ut accuratae descriptioni Rabbiorum, naturae omnino congruae, ali-

2) »Quum puerilis aetas in adolescentiam transit, quemadmodum ipsissime et pili in locis genitalibus erumpere incipiunt, »perinde et testes subito crescunt, quemadmodum puellis vir- »ginibus mammae extuberant, una et menses ferri incipiunt. »Tunc igitur et vocis mutatio in maribus fit praecipue" cet. (Galenus in Hipp. *Epidem. IV. comm. Sect. IV. K. XVII. B. p. 20*. Cf. Aristoteles *de gen. animal. L. II. c. 3*.) »Mammae autem amplitudinis uteri signa sunt, quae virgines »etiam ad matrimonium idoneas esse demonstrant, quas turgentes »vocare consuevit Hippocrates." (Galen. *comment. III. in Hipp. Libr. II Epidem. K. XVII. A. p. 451*).

quid adjicere non possimus. — Nec minus ratione ducuntur, quum pubertatis initium anno XII^o vel XIII^o statuerint: — plerumque enim illa valet regula, quo calidius clima, eo citius homines evolvuntur. eoque citius oboritur pubertas 3).

§ 2.

Num parva
fieri possit
gravida.

Ad pubertatis tempus sequens referendus est locus; quo inquitur, num parva gravida possit fieri, nec ne? (*Jevammoth*, fol. 12 b.). »Et uti dixit Rabbā, „filius Liwa'yi, est terminus ei (parvae, quae aetatem „nondum attigit XII annorum). Ante illud tempus, haud- „quaquam gravida fit; intra tempus illud moritur illa, „et foetus ejus moritur; post illud tempus illa vivit, et „infans ejus vivit." Doctores Mischnici quoque parvam parere non posse statuunt (*Jevammoth*, fol. 33 b.) Casum etiam referunt pubertatis valde praecocis, cum

3) In Hispania, v. c. anno jam XII^o matrimonium ineunt puellae, juvenes aetatis anno XIV^o. In insula Java matrimonium ineunt puellae aetate IX annorum; et in China, imo aetate VIII annorum puberes jam sunt (J. P. Frank: *Geneeskundige staatsregeling etc* I. 225. Haller. *Element. Physiol.* T. VII. L. 28). — Galenus de pubertate ita loquitur: »Pueri post annum quartum decimum pubescere incipiunt, qui vero prope hanc aetatem »accedunt, sunt: qui duodecimum aut tertium decimum aut quartum »decimum etiam annum agunt. Non enim unus omnium certissimus pubertatis est terminus, propter temperamentum caliditatem et »frigiditatem. Calidi namque citius, frigidi vero tardius pubescunt." (Galen. *Comm. III. in Hippocr. Aphorism. K. XVII. B. p.* 63). »Tempus autem pubertatis est a quarto decimo anno ad »vicesimum quintum." (Galenus: *Comm. V. in Hippocr. Aphorism. K. XVII. B. p.* 792).

corollariis nonnullis, sequenti modo: (*Nidda*, fol. 45 a.).
 „*Docuerunt Rabbiui: Factum est de Justina, filia*
 „*Severi, Antonini filii, quae venit coram Rabbi,*
 „*et dixit ei: Rabbi! fenina, quanam aetate nuptias*
 „*celebrare potest? Dixit (Rabbi) ei: quando est filia*
 „*duodecim annorum et unius diei. Dixit (Justina) ei:*
 „*ego nuptias inivi, quum sex (aunos nata) eram, et pe-*
 „*peri ad septem! Vae mihi, de istis tribus annis, quos*
 „*in domo patris peridi! — Sed quomodo gravida*
 „*potuisset fieri? Didicimus enim: (Jevamm. fol. 12 b.*
 „*100 b., Ketuboth, 39 a. Nedarim, 35 b.): „R. Bibi*
 „*„dicit ex nomine R. Jochananis: tres foeminae gossypio*
 „*„utuntur, parva, gravida et lactans: parva, ne gravida*
 „*„fiat et moriatur; — gravida, ne foetus ejus fiat*
 „*„Sandalus; — lactans, ne ablactet filium et moriatur.*
 „*„Et quanam est parva? Ab annos XI inde et die uno*
 „*„ad XII annos et unum diem, abhinc minore (aetate)*
 „*„vel majore (aetate) coëat modo semper: sic dicit R.*
 „*„Meïr. Et sapientes dicunt⁴): perinde est vel illa vel*
 „*„haec; coëat modo ut mos est, et ex coelo miserebunt*
 „*„illarum; sicut scriptum est: „Deus conservat stultos!”*
 Alius Rabbini adjungit huic narrationi Justinæ, ver-
 sum *Ezech. XXIII. 20.* „*et caro asinorum est eorum*
caro” et alium versum ex *Psalmis* (c. 144. vs. 5.) „*quorum*
ora falsa loquuntur, et quorum dexter est dexter men-
dax.” Certe hunc ultimum adjecit versum, quo indicaret
 se nullomodo huic narratiunculæ fidem habere, seque
 credere, Justinam mendacem fuisse: et non sine
 jure! Plinius⁵) quidem retulit etiam nonnulla, quae

4) Usus gossypii hi non probant, obscœnitatis causâ.

5) *Mandrærum nomen iis (populo cuidam in India viventi

cum hoc casu aliquomodo conveniunt, attamen inter fabulas recensenda, quales ex more et tempore multas narravit.

§ 3.

De virginitate.

In lege Mosaïca statutum est: quicumque concubuerit cum virgine, eum oportet talem puellam uxorem ducere. Rabbinī hanc ob rem praecipiunt, filiam tres annos natam jam concubitu sacrari, minore tamen aetate, non ita: — ratio est, quia eam virginitate privavit; in puella vero minore aetate quam tres annos, est uti digitus, qui oculo intruditur" (*Nidda, fol. 44 b. et 45 a.*); „nam," — ita dicunt — „uti oculos lacrymat et iterum lacrymas profert, »(sic) hymen sese regenerat." Quod attinet illam hymenis membranae regenerationem, recentiore tempore nonnulli auctores contenderunt, hymen regenerari post diuturnam abstinētiā 6): — quod cum veritate non convenit; si autem hymen pro parte modo fuisset destructum, tunc forsā iterum concrescere posset et cicatricem efficere. (Vid. Schmalz, in Siebenhaars *Encyklopädisch Handbuch der gerichtlichen Arzneikunde*, Leipzig 1833. I. p. 728.).

Ut constaret, num virginitas sit illaesa, nec ne, — Talmudici sequens suadent experimentum capiendum: (Je-

»annos quadragenos non excedenti) dederunt Clitarchus et Megasthenes, trecentosque eorum vicos annuērant. Feminae »septimo aetatis anno parere, senectum quadagesimo anno accedere" — et porro: »In Calingis, ejusdem Indiae gente, quinquēnnes concipere feminas."

6) Morgagni: *Resp. med. legal. de virginitate in: opusculis miscell. Venet.* 1763. I. p. 3. Mursinna, *Von die Krankh. der Schwangeren* I. p. 49. Cappel, *Med. Beobacht.* I. obs 53. Buffon, *Hist. natural.* II. p. 94.

vammoth, fol. 60 b.): „Dixit Rab Kahana, pone „*eas in dolio vinario; si jam viro fuerit aggressa, odore „eius fragrat, si virgo sit, odore ejus non fragrat.*” Sic in *Ketuboth* (fol. 10 b.) casus narratur, quo illud experimentum revera captum est in quamdam mulierem, cujus maritus fuit conquestus, uxorem suam virginem non amplius fuisse quum eam duxerit: illa tunc non fragraverat et virgo erat declarata. Experimentum illud in multis cum eo convenit, quod Hippocrates (?) in *Aphorisms* suis (Sect. V. No. 59.) tradit: „Mulier si „in ventre non concipiat, velis autem scire an concep- „tura sit, vestibus circumtectam subter suffito, et si „quidem praecedere tibi videatur odor per corpus ad „nares et ad os scito: hanc non propter se ipsam infoe- „cundam esse.” Galenus (*Comment. V. in Hipp. Apho- rism. K. XVII. B. p. 867 sq.*) experimento illi adsentit: sed quis est, qui hodie illud experimentum non habeat absurdum?

§ 4.

Uti multi populi orientales, sic et Hebraei omni tempore magni aestimabant multitudinem infantum. Cujus *De sterilita-
tis signis.* fidem faciunt ea quae statuit quidam Rabbini (*Nedarim*, fol. 66 b.): „Quatuor uti mortui aestimantur: pauper, „leprosus, coecus, et qui liberos non habet.” Sterilitas profecto causa divortii saepe fuit, et feminina sterilis ab omnibus vituperabatur. Signa sterilitatis muliebris nobis tradiderunt Talmudici loco sequente⁷⁾: (*Je-*

7) Eodem loco signa impotentiae virilis traduntur: „*Docuerunt Rabbini: quis est Eunuchus solis* (h. e. qui jam ex utero matris eunuchus est; qui nunquam vidit solis lucem, nisi

vammoth, fol. 80 b.). » *Et quacumque est sterilis* (אֵילֹנִית) ?
 » *Quaecumque annos XX est nata, et nondum produxit*
 » *duos pilos, et licet produxerit postea, est sterilis omni*
 » *sensu. Et ea sunt signa ejus: quaecumque non habet*
 » *mammās et cui coïtus est dolorificus* (s. a. quae durante
 » coïtu voluptatem non percipit). R. Schimeon ben
 » Gamaliël dicit: *quaecumque non habet declivitates*
 » *abdominis nti feminae* (solent. Cujus mons veneris non
 » adeo prominet ac aliarum feminarum, Raschi.) R.
 » Schimeon ben Eliëzer dicit: *quaecumque vocem*
 » *habet amplam, neque agnoscitur utrum sit mulier an*
 » *vir!*” Catalogus haec signorum sterilitatis valde est
 incompleta; sed quae narrantur, omnino tamen veritate
 nituntur; uti comparatio cum scientia hodierna facile
 probat 8).

Eunuchus: cf. de significat. hujus vocis Buxtorff l. c. pag.
 1554)? Quicunque XX annos natus est, et non produxit
 » duos pilos, et etiamsi produxerit eos postea, est tamen
 » Eunuchus omni sensu. Et ea sunt ejus signa: quicunque non
 » habet barbā, cujus pili sunt graciles et caro est glabra. R.
 » Schimeon ben Gamaliël dicit ex nomine R. Jehudae
 » filii Jāiris: cujuscunque aquae (urinæ) spumam non producant;
 » — et nonnulli dicunt: quicunque mingit et non facit curvam; — et
 » nonnulli dicunt: cujuscunque semen nimis clarum (tenuē) est,
 » (s. a. quod nimis cito ejatatur); — et nonnulli dicunt: quisque
 » cujus urina non acescit. — Alii dicunt: quicunque se tempore
 » hyemali lavat et ejus caro vaporem ascendere non facit. R. Schi-
 » meon ben Eleazar dicit: quicunque vox tenuis est, neque
 » agnoscitur utrum sit vir an foemina? ”

8) Tempore quidem seriori Aëtius (Tetrabibl. IV. c. XXVII.)
 de femina sterili ita loquitur: „ » foecunda enim mulier habere
 » debet proceritatem corporis moderatam, lumbos et superiorem
 » ventrem latos, nates eminentes, pectus angustum, mammās
 » amplas: tales enim mulieres foecundae, his autem oppositae

Ad causas impotentiae muliebris ab auctoribus quoque referuntur haemorrhagiae uteri post coitum: lique auctores cum Talmudicis conveniunt, qui nempe ejusmodi casus tradunt in *Nidda*, fol. 65 b. et 66 a. Dicunt ibi: femina, quae post quemlibet coitum sanguinem viderit ex genitalibus fluentem, dimittenda est; tali mulieri tamen licet de novo matrimonium inire, et quidem ter; sed si in tertio matrimonio idem accadat, iterum nubere illi non licet. Rationem, quâ feminae novum matrimonium ter concedant Rabbini, hisce verbis exponunt: »*potest etiam in culpa viri esse; omnia enim membra virilia non sunt aequalia* (שאין כל האצבעות שוות), *nec omnes vires aequales!*» Dein casus sequentes narrantur: »*Venit aliquando coram Rabbi femina*, (quae post coitum sanguinem viderat): *dixit Rabbi Abdano: injice ei terrorem; injecit ei terrorem, et disfluxit ab ea frustum sanguinis; tunc dixit Rabbi: sanabilis est.* — *Alia (femina) venit coram Schemuële; dixit ille R. Dimio, Josephi filio: perterre eam subito; fecit ille et nihil ab ea abiit; tunc dixit Schemuël: illa impletur sanguine, et dispergit sanguinem et quaecumque post coitum impletur sanguine et (sanguinem) dispergit, insanabilis est.*»

Denique hoc loco memoranda sunt remedia quaedam a Talmudicis contra sterilitatem laudata, quaeque in Talmude nomine veniunt *poculi sterilium*." Legimus enim in tractatu *Sabbath* (fol. 110 a.) sequentia: »*Quid*

*Poculum
sterilium.*

steriliores sunt." (lb. C. LI.). »Est autem talis mulier omnino virilis, coloris fuscii, corporis probe compacti, nervis robustis, venosa, lumbos et nates ampliores habens, pectore ac humeris latiores, mammis solidis, voce gravi, fortior item ac hispidior: talis enim aut omnino non, aut modice purgatur."

«est poculum sterilium? Dixit R. Jochanan: *Abi et
 «sume pondus unius Zuz gummi Alexandrini, et sume
 «pondus unius Zuz Aluminis, et sume pondus unius
 «Zuz Croci hortensis, et tere haec tria inter se pro
 «femina fluenti; bibat tria haec, et non fiet sterilis.*
 Adjungantur quoque haec remedia, quae ad classem medica-
 mentorum menses pellentium pertinent, ad numerum magnum
 remediorum, quae nostra etiam aetate contra sterilita-
 tem laudari solent. De illorum autem utilitate dubitare
 licebit; inprimis si causae sint tales, quales etiam a
 Rabbinis traduntur, nempe corporis muliebris constitutio
 peculiaris.

§ 5.

*Cosmetica
 nonnulla
 Rabbinica.*

Hoc loco tradere libet duo praecepta cosmetica Rab-
 binorum, magis vero curiositatis causa, quam momenti
 cuiusdam historico-medici. Hoc quoque respectu po-
 puli et aetates non differunt! Legimus in *Ketuboth*,
 (fol. 59 b.): «qui vult filiam suam albidam reddere,
 «det ei edendas aviculas juniores, et bibendum lac,
 «prope terminum ejus.” Alia occurrunt in tractatu *Sab-
 bath* (fol. 80 b.): «Dixit R. Jehuda ex nomine
 «Rabi: filiae Jisraëliticae, quae ad terminum pervene-
 «runt, sed nondum aetatem attigerunt (produxerunt
 «enim ante tempus vulgare duos pilos. Quid de illis sit?),
 «filias pauperum illiniverunt cum calce, filias divitum
 «illiniverunt cum farina optima, filias regum illiniunt
 «cum oleo Myrrhae! Quid est oleum Myrrhae? R. b.
 «Hunna Bar Chija dixit: *Stacte* (Balsamum). R. Je-
 «remiah, filius Abbi dixit: *oleum olivarum*
 «(bonum est), quod nondum ad tertiam partem matri-

» *tatis venit* (oleum ex olivis immaturis). R. J e h u d a
 » *dixit: Oleum omphacium est oleum olivarum,*
 » *quod nondum tertiam partem maturitatis attigit. Et*
 » *quam ob rem illiniunt cum illo?* Quia solvit pilos,
 » *et carnem reddit mollem. Rab Bibi filiam habuit,*
 » *illinivit eam membratim et lucrum fecit ab ea CCCC Zuz.*
 » *Habitabat in vicinitate sua peregrinus quidam, cui filia*
 » *erat: ille eam una vice illinivit (totum corpus) et*
 » *mortua est. Dixit (peregrinus): R. Bibi uccavit meam*
 » *filiam. Rab Nachman dixit: R. Bibi, qui*
 » *spirituosos (potus) bibit (quibus pili augentur, Raschi)*
 » *illius filia est illinienda (ut solverentur pili cutisque*
 » *fieret glabra): nos autem qui non bibimus spirituosos*
 » *(potus), nostrae filiae non sunt illiniendae.*” Nonne
 his verbis probari quodammodo videtur nexus, qui exstat
 inter abusum spirituosorum potulentorum et cosmeticorum
 latissimum usum et universalem applicationem?

B.

DE MENSTRUATIONE.

§ 6.

Praeunte M o s e , Talmudici ingentem numerum
 subtilissimorum praeceptorum dederunt quod ad feminam
 » *menstruam et fluentem.*” Sed uti facile intelligitur,
 longe maximus numerus harum institutionum ad Religio-
 nem pertinet, et pauca modo strictiore sensu ad nostrum
 argumentum referri possunt.

*De aetate
 qua men-
 struatio
 incipit.*

Incipiente pubertate, oboriuntur menses, aetatis nempe anno XIII^o et unius diei (*Nidda, fol. 5 a.*); cujus rei vero multae exstant exceptiones. Feminae, quarum tempore fixo menstrua fluunt, vocantur *consuetae* (וכרות); et ipsi menses *consuetudo* (וכת). Memorantur vero casus nonnulli infantum, qui mox post partum haemorrhagiam e genitalibus habuerunt: — sunt Talmudistae nonnulli, qui causam hujus phaenomeni in compressione quaerant, quam infantes subierant transientes per uterum (pelvim) angustum; alii autem talem causam posse exstare non credunt, dicuntque »non esse in utero contusiones membrorum (*Chulin, 51 a.*);” sed haemorrhagiam e genitalibus, quae infantibus mox post partum accidit, sponte exoriri (*Ib. ib.*). Tales casus narrantur in Tractatu *Nidda, (fol. 32 a.)*: »Dixit R. Jose: factum est in Ein Bul, quod (infans) lavari debebat ante matrem;” infans enim ob illam haemorrhagiam pollutus erat, et lavandus ut iterum mundus fieret. Similem casum narrant Rabbini obvenisse ר'ו Rabbi in Beth Schearim; et R. Joseph casum talem refert, qui contigit Pumbedithae 1).

1) Nostis temporibus certe non desiderantur observationes, quibus non quidem mox post partum, sed primo tamen jam anno menses prodierunt. Sic Doct. Wilde (*Gemeinsame deutsche Zeitschrift von Busch, Mende und Ritgen. Bd. VI. p. 431*) narrat de puella quadam 2½ annos nata, cui pili jam erupti fuerunt circa pudenda, et menses regulariter prodierunt; et asserit idem auctor, se in puella novem mensium haemorrhagiam spontaneam ex genitalibus observasse, quae tamen sponte iterum desiit. Et vir Doct. Schmalz (*in Siebenhaar's Encyklopadie der Gerichtlichen Arzneikunde. Bd. I. p. 600*) dicit: »Mädchen bei denen die Menstruation, im ersten oder in einem nächstfolgenden Lebensjahre erschien, sind nicht selten.”

§ 7.

Omnes feminae menses non habent, suntque periodi *De feminis, quorum menses non fluunt.*
 in quibus mulieres eorum sunt immunes. Hae periodi
 ita a Talmudicis in Mischnah describuntur, (*Nidda*, fol.
 7 a. b.): »R. Eliëzer dicit: quatuor feminis suf-
 »ficit hora 2), virgini, gravidæ, lactanti et vetulae.
 »Dixit R. Jehoschuah: ego non audiui nisi vir-
 »ginem, sed tamen decisio est secundum R. Elie-
 »zarem. Quænam est virgo? Quaecumque nondum
 »vidit sanguinem 1), licet sit nupta; 1) Menstrualem.

2) *ריה שעה* = *Sufficit ei hora*. Ut intelligatur ea quæ
 sequuntur, pauca hoc loco debemus adnotare. Norimus, secun-
 dum legem Mosaicam quæcumque mulierem menstrua per sep-
 tem dies esse pollutam, omniaque quæ attingat esse immunda.
 Dissensio exstat (*Nidda*, fol. 1 a. seqq.) inter scholas *Schammaï*
 et *Hillelis*, de tempore, a quo femina primo iterum menses per-
 cipiens polluta sit, et res quas attigerit immunda sint. Posuerunt
 asseclæ *Hillelis*, feminam, quæ primo sanguinem videt, non-
 nullos dies debere retro-computare, ad suam pollutionem, ex
 quibus diebus omnia sunt polluta quæ attigerit. Contendant
 vero discipuli *Schammaï* sufficere, si modo numeret ab isto
 inde tempore, quo primum iterum menses viderit; quod verbis
ריין שעה = *sufficit his hora* exprimat. Rabbini tamen ab utraque
 schola dissentiant, statuuntque, omnes quascumque feminas retro
 computare debere horas XXIV a tempore inde, quo primo per-
 ceperunt menses. Eo loco R. Eliezar excipit quatuor feminas
 de quibus in textu dixi, quia his vulgo menses deficere solent.
 Talibus enim feminis satis est perceptio mensium, et numerent
 illæ, modo ab illo tempore inde quo videriat menses iterum
 fluentes.

»gravida 2): ex eo tempore, quo foetus
 »ejus se manifestat. Lactans 3): donec
 »ablactaverit filium suum. Si nutrici tra-
 »didit filium suum, ablactavit eum vel
 »hic mortuus est; — R. Meïr dicit: fit
 »polluta de tempore in tempus 4), et
 »sapientes dicunt: sufficit ei hora. Quae-
 »nam est vetula? Cuiusque transie-
 »runt senectuti suae proxime tria tem-
 »pora 5).»

2) Quando ei de-
 ficiant menses.

3) Quamdiu men-
 sibus caret?

4) XXIV horas.
 Cf. annotationem.

5) Si tribus inse-
 quentibus vicibus
 menses non adfue-
 runt.

In hac Mischna inter feminas quae menstruatione carent, numerantur quoque gravidae, et menses quidem deficiunt »ex eo tempore, quo foetus ejus se manifestat.» Videbimus infra, — quando de conceptione et graviditate acturi sumus, — Rabbinos statuisse, mense quarto graviditatis foetum se manifestare. Volunt ergo Rabbinī, in feminis gravidis non raro ad quartum graviditatis mensem continuare menstruationem: quum autem observarent mulieres, quibus supra illud tempus menses fluxerunt, praeceptum illud statuerunt: feminis gravidis, quum vulgo post quartum mensem graviditatis menstruatione careant, sufficere ab illo tempore dies impuritatis numerare quo viderint menses; sed si superveniant feminae tali menses ante mensem quartum, tunc debet retrocomputare XXIV horas. Licet haec non dicant verbis adeo dilucidis, tamen ad statuendum illud praeceptum ducti videntur Talmudici, quoniam ante mensem quartum, graviditas (ex illorum sententia) non sine omni dubio dignosci poterat, et menstruatione tunc procedente, femina poterat errare sicque non gravidam se credere sine jure. Sed si menses subito superveniunt feminae gravidae quarto mense, tunc rarior est casus et sufficit ei hora. Hippocra-

tes 3), auctor libri *de natura pueri* 4) et Galenus 5) eodem modo loquuntur. Hippocrates, cui Aëtius 6) et omnes recentiores assentiunt, statuit, post conceptionem feminae menses mox cessare, cessationemque mensium signum esse conceptionis. Neque vero iis minus quam Talmudicis nota fuit fallacitas illius signi. Hippocrates 7) et Galenus illud quidem observaverunt, tempus tamen non definiunt; auctor libri *de natura pueri* primo modo mense, dum Aristoteles inquit: (*Hist. Animal. Edit. Schneideri Liber. VII. c. 3.*). „Postquam conceperint aliquae, ad certum usque tempus purgantur, conceptis foemellis cum dintissime diebus tricenis, ad quadragenos autem in masculis.” Scimus et nos feminis gravidis vulgo deficere menses, attamen aliquando feminas per totam graviditatem regulariter fluere. Imo aliquando obveniunt feminae, quae non alio tempore habent menstrua, quam in graviditate, et tum solum

3) „Si mulieri purgationes non prodeant, neque horribres, neque febre superveniente, cibi autem fastidia ipsi accendant, hanc in utero gerere putato.” Hipp. *Aphorism. Sect. V. No. 61. Editio Paris et. Bruxelles 1833.*

4) „Neque enim menses prodeunt mulieri, quae praegnans est, nisi puer sanus futurus sit, praeterquam quibusdam perpusillum primo mense.” Hipp. *Opp. Ed. cit.*

5) „Quum autem mulier peperit, menstrua non valde prodeunt, quibusdam tamen excepta pauca.” (Galen. *Comment. III. in Hipp. Epidem. Lib. II. K. XVII. A. p. 456.*).

6) „Et menses consueto tempore non apparuerunt” (*Tetrabibl. IV. Sermo IV. Cap. VIII: quomodo cognoscantur quae concepturunt*).

7) „Si mulieri in utero gerenti purgationes prodeant, foetum unum esse impossibile.” (Hipp. *Aphorism. Sect. V. No. 60. Ed. cit.*).

regulariter illa fluunt. (Beyerle in Stein: *Annalen der Geburtshülfe*. III. St. p. 166. Busch und Moser: *l. c.* IV. p. 351.).

Feminis lactantibus menses non esse quamdiu ipsae infantem lactent, sine dubio ex eadem *Mischnah* patet. Neque hoc phaenomenon ignotum fuit omnibus veteribus; quippe Aristoteles 8) id jam observavit: sed neque ille, neque (quantum scio) alter ex priscis de redeuntibus mensibus mentionem facit, quando femina ipsa non lactat, vel quando infans morte fuit abreptus. Dissentiunt inter se Rabbini, num talis foemina constituat exceptionem regulae vulgaris, nec ne? Statuit enim R. Meïr: „sit polluta de tempus in tempus,” ergo terminum assumit, qui ex mente sapientium competit feminis regulariter menstruis; et sapientes illam R. Meïri opinionem videntur assumsisse et statuisse non semper tali mulieri menses mox iterum supervenire; igitur ei *sufficere suam horam*. Rationem, quâ feminis lactantibus menses non fluunt, Rabbini secundum Aristotelis sententiam aliquomodo explicant, quum dicant (*Nidda*, fol. 9 a.). »*Sanguis fit turbidus, producitque lac.*” Menses vero et lac *ejusdem esse naturae*, — quae est sententia Aristotelis, — non statuunt. Insuper monendum, in Talmude tempus lactationis extensum esse ad duos annos; infans autem qui ultra illud tempus sugit, est tanquam horrendum quid sugat (*Ketuboth*, 60 a.).

8) »Exeunte lacte haud fere eveniunt purgationes. Nam sane quae lactant, factum est ut purgentur. Omnino natura ita fert ut ne humor ille locis pluribus simul erumpat: velut iis, quae fluxus sanguineos patiuntur, deteriores superveniunt purgationes. (Arist. *Hist. Animal.* VII, c. 10.).

Quae sequuntur, vetulas nonnumquam habere catamenia, naturae quoque respondent: sic Aëtius et Paulus Aegineta dicunt, rarissimis in casibus feminis ad annum sexagesimum usque menses fluere. Recentiore aetate tales casus plures innotuerunt; Kahleis (Meckel's *Deutsch Archiv, f. d. Physiolog.* 1823. *Bd. VIII*) narrat de femina quadam, cui menses desierunt aetate annorum XLIV, redierunt autem annum agenti LXXIV^{um}, et quidem plane regulariter; etiam refertur in Hufeland's *Journal* (1829. *Bd. II*. 85.), casus feminae, quae ab anno aetatis XIII^o inde, menses habuit fluentes, et in aetate annorum LXI, adhuc regulariter continuantes: et tales multi alii casus leguntur.

§ 8.

Symptomata instantium mensium a Talmudicis ita descripta sunt (*Nidda, fol. 63 a. in Mischna*): „Et ea sunt (symptomata) consuetarum (quando menses instant): (femina) *oscitat, sternutat, dolet ei umbilicus et declivitates ventris suae* (genitalia: Raschi), et sanguis fluit, et species horripilationum eam corripit, et sic porro; et cuicumque haec ter (iterata vice eodemque mensis die) acciderunt, illa est consuetu (habetur femina quae menses habet regulares).” his signis adduntur in Gemara hujus Mischnae: „Caput ei est grave, lassitudo (gravitas) membrorum, tremet et oscitat.” 9).

9) Aëtius (*Tetrabiblion IV, Sermo IV, cap V*) inter notas instantis in virgine menstruationis recenset maxillarum pruritus, lumborum, pectoris et capitis dolorem, bilis aut pituitae vomitus. Quantum tamen differunt haec verba ab iis, quae

*De sanguinis menstru-
alis indole.*

De sanguine ipso menstruali sequentia traduntur (*Nidda*, fol. 19 a. in *Mischna*): „*Quinque sanguinis* „(species) *immundae sunt in femina: ruber* (sanguis) „*niger, cornu croci* (alii: splendori croci similis) „*et aquarum terrae ad instar, et* (uti) *vinum* „*mixtum* (cum aqua). *Schola Schammaïi dicit:* „*etiam uti aquae Foeni graeci et uti aquae carnis assa-* „*tae; et schola Hillelis pueros* (illos colores) *promun-* „*ciat. Viridis* (si sit sanguis), *Akabia, filius Mehal-* „*lelis, impurum eum declarat, et sapientes purum* „*declarant. Quisnam* (sanguis) *est ruber?* (qui est) „*uti sanguis vulneris*, 10); (quisnam est) *nlger?* (qui est) „*atramenti ad instar; profundius* (coloratus) *quam hoc* „*impurus est, levius coloratus purus. Splendor croci,* „*ut purissimum quod in eo est, et ut aqua terrestris ex* „*valle Betkerem, si eum fluere faciant* (ut) *aquam; et* „*uti mixtum: duae partes aquae et una pars vini, vini* „*nempe Scheroni.*” In Gemara vero sequente niger sanguis, sanguinis species *peculiaris* non habetur; nam R. Chanina peritissimus inter Talmudicos dijudicandarum sanguinis specierum, eum nonnisi *sanguinem rubrum decoloratum* declarat. Ceterum controversiae inter scholas Schammaïi et Hillelis, in ipsa Gemara latius

Talmudici dederunt, quibusque nos vix nonnulla haberemus addenda, quippe quae evidenter propriis observationibus sunt stabilita, naturaeque omnino congrua.

10) »Per idem tempus foemellis quoque mamillae intumescunt, ut quae appellant menstrua erumpunt. Et sunt sanguis quasi »*recessus cuncti animalis.*” Aristoteles *Hist. animal.* VII, 1. Sic et Schemuël in Gemara (fol. 19 b.) hujus *Mischnae*: dicit enim R. Jehuda ex nomine ejus: »*quomodo uti sanguis vulneris?*” »*Uti sanguis bovis mactati.*”

exponuntur, earumque conclusio haec est: „Omnes sanguinis colores, qui quinque colores supra recensitos, plane aemulant, vel qui adhuc profundiores sunt, ii sunt impuri: sanguinem menstrualementem verum sistunt; si e contra laetius sunt colorati, puri sunt.” Inquirunt porro Rabbini magnis verborum ambagibus in ipsos colores, et in modum, quo isti dijudicentur; nil tamen de naturâ ipsius sanguinis proferunt 11). Non soli autem Talmudistae, sed etiam Medici praeclari aliarum gentium sanguini menstruali varios tribuerunt colores; quorum tamen plures nostra aetate potius habentur effectus cujusdam affectionis membranae mucosae; ita ut id quod veteres sanguinem vocaverunt, saepe nihil aliud sit quam mucus morbosus vaginae. Ita v. c. agitur in operibus Hippocraticis de mensibus decoloribus 12), biliosis, nigris 13), de mensibus pituitosis et pelliculosis 14); — et Galenus quoque menses decolores memorat 15).

11) Qui cupidus est cognoscendi modum pusillum, quo sanguinem investigaverint, ad dijudicandum num revera esset sanguis menstrualis, adeat Maimon: *Hilchoth Jssure Biah, C. V. Halachah, 6-13.*

12) „Mulieres menses decolores neque secundum eadem (tempus et modum) semper prodeunt, purgatione opus esse significant.” *Hipp. Aph. S. V. No. 36*

13) „At si mulier sit corpore male affecto et menses biliosi decurrant, et hoc facile dignoscitur. Admodum nigri sunt, interdum vero splendidi, paucissimi feruntur et citissime conerescunt.” *Hipp. opp. omn. Ed. cit. Sect. V. de morb. mul. p. 157.*

14) „Pelliculosi enim ei (menses pituitosi) apparent, et velut saraneorum telae distenti, aliquantumque subalbicant.” *Ibid. p. 158.*

15) „Neque enim propter pituitosum humorem solum, sed

Aëtius quidem loquitur de colore albo et obscuro fluxus muliebris; eum tamen fluxum corruptum habet, cum mensibus non convenientem, (*Tetrabiblion IV. Sermo IV. cap. 65.*).

§ 9.

*Quomodo
sanguis men-
struus dig-
noscatur.*

Si macula sanguinis reperiatur in linteamini-
bus cuius mulieris, dubiumque sit num sanguis sit menstru-
us nec ne, tunc sequentem indagandi methodum laudant:
(*Nidda, fol. 61 b. in Mischna*): „Septem signa trans-
„ferantur supra maculam: salica jejuna et aqua faba-
„rum contusarum (מי גריסין aqua hordei?) et urina et
„nitrum (Alexandrinum, Gemara) et sapo et Camonia
„(קמניא), et Aschlag (אשלג); et oportet confricare eos
„(supra maculam) ter; sed si transducantur septem
„signa uti num (omnia inter se commixta) nihil fecit,”

*Differentia
inter sangui-
nem men-
struum et
sanguinem
virginitatis.*

— non juvat, non detegent quod volunt. Distinguunt
porro inter sanguinem quem femina vidit post primum
coitum, — sanguis virginitatis qui dicitur, — et san-
guinem menstruum; et quidem ita: (*Nidda, fol. 65 b.*):
„R. Meïr dicit: adspectus sanguinum variant inter se:
„quomodo? sanguis menstruus rubeus est, sanguis virgi-
„nitatis non est ruber; sanguis menstruus spumosus est,
„sanguis virginitatis non est spumosus; sanguis men-
„struus venit ex utero, sanguis virginitatis venit ex
„lateribus (vaginae). Dixit R. Jochanan: (haec)
„sunt verba R. Meïri; sed sapientes dicunt: omnes
„adspectus sanguinis sunt iidem 16).”

etiam propter melancholicum et biliosum decolorcs fiunt menses.”
Galen. *Comm. V. in Hipp. Aphorism. K. AFII. B. p. 326.*

16) Horum omnium iterum causa est religio, quia illi

Narrant (*Ketuboth*, fol. 10 b.) de femina quadam, <sup>De amenor-
rhoea, cel.</sup> ad familiam pertinente cui nec menses nec sanguis virginitatis esse solebant. Nomen hujus familiae erat *Dorketi*. Dicunt menses uberiores foecunditatis esse signum, quam sententiam ita protulerunt (*Nidda*, fol. 64 b.): „*Feminae durante sua virginitate sunt uti vitis: est vitis cujus vinum est rubrum, et reperitur vitis cujus vinum est nigrum; et est vitis cujus vinum est multiplex, et vitis est cujus vinum est parum.* „*R. Jehuda dixit, cuicumque viti est vinum, et cui non est vinum, (illa) est Dorketi.*” In Gemara hujus Mischnae sequentia obveniunt: „*Didicimus, — nomen illius familiae fuisse — Ketieh. Docuit Rabbi Chija: sicuti fermentum pulchrum est massae, sic sanguines (menses) pulchri sunt feminae, cujus sanguines multi sunt, erunt filii multi (Nidda, fol. 8 b. Ketub. 10 b.) 17).*”

Rabbini quoque recte statuerunt, menses suppressi animi pathematibus deprimentibus, praecipue terrore (*Nidda*, fol. 9 a.). Casum porro memoriae tradiderunt Talmudici, quo probent calamitatibus atque

virginitas quam maxime his cordi erat. Cf. v. g. *Deuteron. C. XXII. v. 13 sqq.*

17) Hisce contrarium quid posuit auctor libri: *de his quae uterum non gerunt* (Hipp. *Opp. F. Sect. V. p. 244*) dicens: „Et si quidem naturā copiosos menses mulier demittit, infocunda redditur.” Galenus vero (*Comment. V. in Hipp. Aphor. K. XVII. B. p. 363.*) atque Aëtius, *Tetrabibl. IV. Sermo IV. C. LI.*) cum Rabbiniis conveniunt: — et recentiore tempore Cl. J. P. Frank statuit, in Brittannia feminas, quae copiosa et regularia habent menstrua, multam gignere prolem, (*Geneeskundige staats-regeling etc. Dl. I. p. 306.*)

inopia permagnam vini in totum organismum exerceri: occurrit nempe narratiuncula in Tractatu *Ketuboth* (fol. 10 b.): „Homo quidam venit ad Rabbi, dixit ei: „Rabbi! concubui et non inveni sanguinem; dixit illa „(uxor hujus viri): Rabbi virgo eram! Sed tempore „fuit calamitatis; vidit Rabbi faciem eorum nigram; „curavit eos, et introduxit eos in balneum, et dedit „eis edendum atque bibendum, et duxit eos in cubiculum. Coïvit maritus, et invenit sanguinem!”

C.

DE CONCEPTIONE ET GRAVIDITATE.

§ 10.

De concep-
tione.

Ut coïtus sit foecundus, varia requiruntur, quorumque etiam in Talmude hic et illic fit mentio. Sic quidem contendunt doctores in *Jevamoth*, fol. 55 b., immissionem penis requiri ut foecundus sit coïtus; nihilominus tamen non negant, ejaculationem seminis locum habere et conceptionem exinde sequi posse, sine immissione *perfecta* penis, nempe „immissione solius glandis,” (נשיקת העטרה) *osculatio coronae*). — *Ib. ib.*) Ad seminis ejaculationem „erectio penis” requiritur (*Ib. ib.*); quae tamen erectio sine voluntate atque conscientia obtinere nequit 1). Coïtus foecundus non est, nisi simul adsit voluptatis

1) *Jevamoth*, fol. 53 b. »Et Rabba enim dixit: in stuprando non est vis, quia nulla erectio est absque voluntate, nisi vin somno” Cf. *Nidda*, 43 a.

sympathia totius corporis; nam Schemuël dixit (in *Nidda*, 43 a.): „*Omnis concubitus seminis, quem totum corpus ejus non sentit, non polluit. Quoniam est ratio? „Concubitus seminis” lex vocat talem, qualis foecundare potest,*” et cum alius coïtus foecundare nequit, ergo tali non polluitur. Eodem loco Schemuël dicit: *quicumque concubitus seminis non ejaculatur uti sagitta, (is coïtus) non est foecundus: Nec femina gravis fit, si cum stante viro coïverit. (Sanhedrin, fol. 37 b.). 2).*

Non magis comprobavit experientia sententiam Rabbimorum qui perhibeant (in *Jevamoth*, fol. 34 a. et passim aliis locis multis) „*nullam feminam gravidam fieri aggressa primo.*” Vulgo quidem primus coïtus cum virgine intacta, et praecipue si stuprum locum habuit, non est foecundus; posse tamen contrarium quoque observari, veritati non est absonum 3). Varias in partes

2) Horum plurima, nempe necessitatem sensationis voluptatis, — fortis ejaculationis, — et alius positurae quam stantis, — hodierna melior experientia ut erronea refutavit. Vid. Schmalz, in *Siebenhaar*. l. c. Th. I, p. 124. Inter veteres, Galenus etiam statuit, erectionem necessariam esse ut semen ejaculetur. Ita enim dixit: „Non enim solius coïtus causa pudendum exacte tensus esse est utile, sed quo meatu diducto ac directo semen quam longissime ejaculetur. Qui meatus nisi rectâ ferretur, sed aut obliquus esset, aut alicubi in sese consideret, ibi tunc semen haereret,” Galen. *de usu part. corp. human. Lib. XV. K, IV p. 221*. Nunc etiam novimus, hypospadiacos, eosque qui infra et post glandem habent aperturam penis, attamen posse interdum gravidare.

3) Cum Rabbimis conveniunt Meijer (Haller: *Vorles. über die gerichtlichen Arzneiwiss. 1e Band, S. 305.*) aliique. — Cll. Henke (*Lehrbuch* etc. 137) Sebastian (*Element. physiol. spec. Ed.*

simul sententiae Rabbinorum abierunt, quum disputarent de quaestione, quonam tempore femina facillime concipiat? (*Cf. Sotah, fol. 27 a. Nidda, fol. 31 b.*). Dicunt nonnulli, „nullam feminam gravidam fieri nisi instantibus mensibus;” alii e contrario statuunt: „nullam feminam gravidam fieri, nisi lavationi suae proxima sit,” i. e. cessantibus mensibus 4). Tradunt, concep-

alt. p. 302) et praecipue Heim, contendunt, cum multis aliis, unicuique coitum saepe sufficere ut fiat conceptio.

4) Auctor libri *de genitura* posteriori sententiae adsentit. »Quare, inquit, »si illo sanguine (menstruo) vacuata mulier fuerit concipit, si vero is redundarit minime. ... Hae nempe post menstruum purgationem ob iam dietas, utero concipiunt,” (*Hipp. opp. F. Sect. III. p. 12.*). Galenus vero dubius haeret. »Itaque conceptio sit potissimum sedatis nuper menstruis, ut maxime uteri genituram concipiant,” (*Gal. Comm. III. in Hipp. Epidem. Lib. II. K. XVII. A. p. 443.*). E contrario dicit in libro *de uteri dissectione* (*K. II. pag. 903*). »Vasorum uteri ... oscula, »quum foemina conceptura est aperiuntur, hoc autem conceptionis tempus est: vel incipientibus vel cessantibus menstruis.” — Aristoteles opinatur »plerasque post mensium fluxum concipere, nonnullas vero fluentibus adhuc menstruis” (*Hist. animal. Lib. VII. C. II.*). Moschion (*cap. 24.*) quoque credit, tempus concipiendi fesse idoneum, absolutam menstruationis periodo. Recentiores fere omnes credunt, feminam omnium facillime concipere mox post menstruationem. Neque id mirum videri potest cogitantibus, recentissimas indagationes viri Cl. Bischoff, doct. Négrier, aliorumque docuisse, ovula in folliculis Graafianis quamdam maturitatem periodicam subire, ad quam acquirendam vis seminis virilis minime requiritur: illa ovula matura in muliere humana durante menstruatione et in brutis durante aestu venereo, ab ovaris solvuntur atque expelluntur: — si hoc tempore coitum exerceant animalia, vi, quam semen virile in hoc ovum solum et expulsus exercet, foecundantur, et tunc concip-

tionem posse fieri statim post coitum, imo secundo adhuc tertiove die post eum; tunc si non conceperit femina, semen corrumpitur atque ejicitur. — *Sabbath* 86 a. — 5).

§ II.

Conveniunt Talmudici cum omnibus Medicis veteribus, nonnullisque recentioribus, in potestate hominis esse ut ad libitum mares vel foeminas procreent; — in modis tamen quibus fiat, est differentia. Sic Rabbini rogant in Tractatu *Nidda* (fol. 31 a. b.): „Et estne in potestate „hominis quod multos habeat filios? Sed qui morantur „supra abdomen, (quia retardant seminis ejaculationem, ut „uxor prius ejaculet) erunt infantes mares. Dicit R a b b a „(Eirchin, fol. 8 a.): „qui vult facere omnes suos liberos masculos, coeat et repetat coitum; — et alibi: (*Nidda*, fol. 28 a. 31 a. *Berachoth*, fol. 60 a.): Dixit R. „Jitschak: si mulier prius ejaculaverit semen, tunc „pariet marem; vir si prius ejaculaverit semen, pariet „puellam!“ Auctor libri de *superfoetatione* suadet: testiculum dextrum obligare si feminam, sinistrum si

*Non prole-
hinc mas vel
puella possit
procreari.*

piunt feminæ. Quibus factis nitens Cl. Bischoff credit, conceptionem nonnisi durantibus mensibus vel statim post eos locum habere posse. — Vid. Bischoff. *l. c.* p. 35. sq. et p. 558. et praesertim ejusdem auctoris: *Beweis der von der Begattung unabhängigen periodischen Reife und Lösung der Eier der Säugethiere und des Menschen, als der erste Bedingung ihrer Fortpflanzung.* Giessen 1844.

5) De coitus abusu verissime ita loquuntur: „Membrum exiguum est in homine, si saturet illud, esuriat (homo), si fume „patiatur, saturatur (homo),“ *Sanhedrin*, 107 a.

quis marem procreare velit, et penem penitissime intrudere, ad marem procreandum. (Hipp. opp. F. III. p. 46.). Galenus vero in foetus temperamento calidiore vel frigidiore, causam evolutionis maris vel femellae quaerit. (*De semine, Lib. B. K. IV. p. 641.*). Alii veteres multique recentiores, imo nostro aetate viri ceteroquin praeclari, varias atque miras hypotheses hac de re construxerunt; de quibus vero agere mei non est.

§ 12

*De tempore,
quo graviditas absolvitur.*

Quod ad graviditatem ipsam attinet, statuunt Talmudici (*Bechoroth, fol. 8 a. Chulin, 127 a.*): „Quaer-
„cumque coitu et tempore graviditatis aequalia sunt,
„(haec) pariunt et educant inter se;” cui sententiae adiungunt enumerationem diversi temporis graviditatis in variis animalibus, quodque tempus graviditatis animalium comparant cum tempore, quo nonnullae arbores et frutices fructus gerunt. Quod ad humanum genus (*Nidda, fol. 38 a.*): „nulla femina gravida fit, et parit, nisi diebus CCLXXI „vel diebus CCLXXII vel diebus CCLXXIII.” Isti dies itaque conveniunt cum novem mensibus triginta dierum; sed omnes in ea non consentiunt: legimus enim: „Dixit „Mar, etiam secundum eos, qui dicunt: quae parit ad „menses novem, non parit ad imperfectum; quae parit „ad septem menses, parit ad imperfectum.” (*Nidda, fol. 27 a., 38 b. Rosch haschana, fol. 11 a., Jevammoth, fol. 42 a.*). Horum verborum sensus est: quae parit ad novem menses, parit ad dies CCLXX, ergo revera praeterlapsis novem mensibus: alii vero contendunt, feminam quae ad novem menses parit, non plane hos menses implere. Sic quoque partus septimestris, ex opinione

nonnullorum, omnino implet septem menses, secundum alios autem non: — Schemuël tamen voluit, omnes mulieres tantummodo initio decimi mensis parere. Modum quo Schemuël numeravit menses, locus sequens in *Nidda*, fol. 25 b. illustrabit: »*Et fuit abortus, qui venit coram Schemuële; dixit: is est filius dierum »XL^o; et computavit a die inde quo lavavit usque ad »hunc diem, et non fuit nisi dies XL. Et dixit: illa »femina durante ejus menstruatione viro est aggressa! »ligaverunt eam, et confessa est.*» Quoniam Ieminae Jisraëliticae ex lege Mosafca, vulgo se lavabant VIII dies postquam finire inceperant menses et Schemuel ab hoc die numerabat, primo intuitu diceremus, Schemuelis computationem falsam esse, si cum hodierna graviditatis computatione comparetur: — sed nostris diebus numerare solent a die, quo ultima vice menses inceperunt; ergo, si diebus quos statuit Schemuël, addimus octo, tunc cum nostro numero convenit. Dies tamen certus definiri nequit, cum partus ad diem unum praedicere non possimus.

Quae decimo mense pariunt, earum graviditas, uti Talmudici perhibent, jam optime dignosci potest mense quarto. Etenim dicunt (*Jevammoth*, fol. 37 a.): »*in »maxima parte illarum, quae mensibus novem pariunt, »foetus se palam fit* (praesentiam illius agnoscit) *in »tertia parte dierum suorum,*» et sic in casibus in quibus de graviditate oborta fuerant dubia, expectaverunt per menses tres, »donec foetus se ostendat.» (*Sotah*, fol. 20 b. *Jevamm.*, 33 b.). Modum, quo foetus praesentiam suam palam facit, ulterius non describunt; opinarer autem, Talmudicos dicere voluisse, mense quarto foetum jam plene esse formatum, et ita increvisse ut

*Quoniam
tempore
graviditatis
optime possit
dignosci.*

jam primo intuitu] femina gravida posset dignosci. Veritati et nostrae aetatis observationibus haec omnino respondent 6).

§ 13.

*Infantis loci
mutationes
in utero de-
scribuntur.*

Circa loci mutationes quas facit infans in utero, sequentia afferam, quae reperiuntur in *Nidda*, fol. 31 a.: »*Docuerunt Rabbini: per tres menses priores infans habitat in habitaculo inferiore; per medios (menses) infans habitat in habitaculo medio; posteriores, infans habitat in habitaculo superiore.*» Illud phaenomenon tam singulare iis videbatur, ut peculiare testimonium Omnipotentiae divinae id haberent: adjungunt enim (*Ib. ib.*): »*Veni et vide, mores Dei non esse mores carnis et sanguinis (hominis); mos (enim) est carnis et sanguinis, illud quod est in deliciis suis in lagenâ clausâ ponere, et orificiam ejus (lagenae) superius est; forsân servatur (illud quod multi aestimat homo) forsân non servatur; sed Deus creat foetum in intestinis feminae, quae sunt aperta, et os eorum (os uteri) est inferius, et nihilominus servatur (foetus).*» Alia sententia: »*Homo res pretiosas suas in bilance ponit; quamdiu gravior evadit, bilanz descendit. Deus e contrario (aliter facit) quamdiu ponderosior fit infans, ad superiora adscendit (infans).*»

6) »In vierten Monat ist der untere Theil des Unterleibs deutlich gewölbt, so dass es schon auf den ersten Blick auffällt.«
Busch und Moser: *l. c. Th. IV. p. 332.*

§ 14.

Aetatem vim habere in conceptionem et graviditatem, Rabbini his verbis expriment: »*Dixit R. Chisda: »Init (puella) conjugium minore (aetate) quam filia XX »anorum, parit ad annos LX; filia XX anorum (si »fuerit puella, quum conjugum init) parit ad annos XL; »filia XL anorum, tunc prorsus non amplius parit*» (*Baba Bathra, fol. 119 b.*). Plinius vero cum his non consentit, dicens: mulier post *quingagesimum* annum non gignit (*Hist. Nat. Lib. VII. C. XIV.*). Aetas qua feminae concipere possint, multopere variat; vulgo concipiunt ab anno aetatis XIV — L; casus vero non desiderantur, quibus puellae juniores et feminae aetate profectiones conceperant et pepererant.

*De aetate
qua femina
concupere
possit.*

§ 15.

Ut evolutio foetus rite obtineat, in prioribus mensibus graviditatis feminae quam maxime commendatur abstinencia a coitu; uti patet ex his verbis (*Nidda, fol. 31 a.*): »*Docuerunt Rabbini: per tres menses priores »coitus nocet feminae et nocet foetui; per medios »(menses) nocet feminae et prodest infanti; (per) ulte- »riores (menses) prodest feminae et prodest infanti; »nam tali modo infans invenitur purificatus et fortis. »Didicimus qui cum uxore concubuit die XC^o, est uti »effudit sanguinem;*» nam tunc incipit infantis vita (*Raschi 7*).

*Abstinentia
a coitu du-
rante gra-
viditate lau-
datur.*

7) Ita etiam auctor libri *de superfœtatione* dicit: »Mulier praegnans, si venerem non exerceat; partu facilius liberabitur;»

Feminis vero coïtum quidem exercentibus suadent nonnulli Talmudistae (uti jam monuimus p. 80) applicationem gossypii, ne semen uterum intret foetusque fiat *Sandatus*.

§ 16.

*De Appetitu
alieno gravi-
darum.*

Appetitus alieni, gravidis non rari quique apud veteres venit nomine *Kissae* (Moschion), Rabbini quoque mentionem faciunt. Si non obtemperet mulier huic appetitui, in periculo eam versari dicunt. Tractatus *Joma*, 82 a. b. haec habet: »*Gravida quae odorabatur* (et appetivit cibos vel carnem vetitam), *edat, donec revertatur anima sua.*» Huic sententiae Mischnicorum addunt Gemaristae: *nam est tibi nulla res cui resistere possis, quando quaestio est de servanda vita.*»

(Hipp. Opp. F. Sect. III. p. 43): — et in libro *de morbis mulierum* L. I. auctor percipit: »Ubi autem praedictis diebus viri complexum experta fuerit, si commode apparati uteri fuerint et decem aut duodecim diebus genituram continuerint tum ne virum vident'' (*Ib. ib. Sect. V. p. 161.*). Idem fere suadet Cl. Busch: »Der Beischlaf ist zwar nur in einzelnen Fällen ganz zu verbieten, doch darf er nur mit grösser Massigung und selten statt finden, da er in Uebermasse in früheren Monaten leicht Abortus bewirkt, und in den letzten Monaten wahrscheinlich nicht ohne Antheil an der regelwidiig zu festen Adhasion der Placenta ist'' (*Lehrbuch der Geburtshülfe* 1842. S. 77). Doct. Hoebeke inter causas quae saepissime abortum efficiant, etiam recenset abusum coïtus durante graviditate, et suadet mulieri, quae semel abortum jam passa fuit, a coitu plane abstinere. (*Verhaudeling over de Miskraam Uit het Fransch door Meijer en Terlaak 's Gravenhage* 1843).

D.

DE ABORTU.

§ 17.

Talmudici talem foetum habent abortivum (נפל), qui a matre editur ante septem menses. Cujus fidem faciunt ea, quae legimus in *Berachoth*, fol. 60 a. »Diebus tribus prioribus homo misericordiam imploret, ne foetidum fiat semen; a tribus (diebus inde) usque ad quadraginta invocet misericordiam; ut sit mas; a quadragesimo die inde usque ad tres menses, misericordiam invocet, ne fiat Sandalus; a tribus mensibus inde usque ad sex menses misericordiam imploret, ne fiat abortus: — a sex mensibus usque ad novem imploret misericordiam ut exeat in pace!'' Sed non solum partum praematurum voce *Abortus* denominaverunt, verum etiam talem, quo femina edat foetum qui non est vitalis vel qui monstrositatem quamdam sistit. Omnibus enim casibus supra memoratis monstrorum et molarum, praefigitur verbum המפלה, i. e. quae delabi facit, quae abortit, — uti omni infanti usque ad XXX dies post partum nomen נפל, i. e. abortivum dederunt.

Dissensio exstat (in *Nidda*, fol. 21 a.), num omni abortui haemorrhagia necessaria sit. Putant enim nonnulli uterum posse aperire sine sanguinis jactura; alii vero negant. Concedunt Gemaristae, fieri posse ut uterus abortiens aperiatur sine sanguinis missione; et conclusio manet secundum eos, qui perhibent non semper adesse haemorrhagiam. Errassent vero, si istam regulam universalem fecissent; novimus enim inter symptomata abortus, quae maxima parte dubia sunt, ut

De haemorrhagia et de doloribus duran'te abortu.

signum valde constans, haemorrhagiam; ab altera autem parte casus quoque non desunt, in quibus fere nulla adfuit haemorrhagia. Metrorrhagiam, quae abortui praecedit, non aequiparant Rabbini haemorrhagiae, quae partum verum antecedere solet, sed potius eam habent fluxum morbosum. Dolores ex abortu tunc demum vehementes evadunt quando foetus jam ita mole accrevit, »ut caput rotundaverit verticilli ad instar,» veluti glomeris coli 1). Volunt ergo haec: si foetus abortivus minus

1) Hanc opinionem contentam credo sequentibus duabus sententiis. Quae de metrorrhagia dixi, hausi ex sententia in *Nidda*, fol. 38 a. אין קושי לנפלים: quae verba proprie quidem significant, abortibus non est haemorrhagia, simul cum doloribus, sed ratione habita ipsius contextus, ejusque nexûs mutui, verba haec videntur habere sensum, quem Jarchi quoque profert: »Metrorrhagia quidem adest, sed abortus eam mundam non reddit, quod in partu vero quidem obtinet; sed potius est fluxus, et mulier nob eam haemorrhagiam, h. e. propter fluxum, est immunda et parit »fluens.» — Quae secundo loco de doloribus durante abortu scripsi, petii ex dictis in *Oholoth*, Cap. VII. M. 4. et *Bechoroth*, 22 a. אין לנפלים פתיחת הקבר עד שיגילו ראש כפיקה: »abortibus non est »apertura sepulcri, nisi rotundaverint caput verticilli ad instar.» Sed locum illum in *Oholoth* tropicum habeo. Eumvero si perspiciantur verba quae antecedunt: »Si apertura adsit uteri non »ei est otium incedendi;» nempe propter dolores vehementes et haemorrhagiam; tum elucet, sensum nostro in loco non esse, »in omni abortu uterum non esse apertum,» sed alio modo sententiam esse explicandum. Non dubito igitur quin Maïmonidî concedere debeamus, sensum hujus sententiae ita esse: »in abortu non talis adest apertura uteri, qua femina impediretur, quominus obambulare, nisi caput jam rotundaverint, ut verticillum. »In *Bechoroth*, fol. 22 a., magnitudo hujus פיקה ulterius definitur, et dicunt modo eam glomus staminis, ergo glomus parvum, sistere.

evolutus sit, dolores sunt mitiores. Et revera ita est; dolores enim eo magis aemulantur doloribus partûs veri, quo magis jam processerit ipsa graviditas.

Statuunt etiam Talmudici (*Nidda*, fol. 9 a.): »(Femina quae) fuit in praesumptione graviditatis, et vidit sanguinem, et postea abortit flatum vel aliquam rem, quae durabilis non est, illa manet in sua praesumptione et sufficit ei hora." Quibus verbis haec volunt: femina quae gravis est, inopino vidit sanguinem e vagina profluentem, et dein ex utero emisit fluidum gazosum (Physonetra?) vel aliquam rem non durabilem, haec gravis manet. Id autem omni casu defendi posse, maxime dubitarem. Certum quidem non est semper insequi abortum, si metrorrhagia supervenerit feminae gravidae, — id enim experientia quotidie docet: — neque immo vehementes Metrorrhagiae, quae occurrunt in casibus placentae praeviae, licet prognosin valde infaustam reddant, semper abortum efficiunt. Nihilominus tamen nimis generaliter dictum mihi videtur Talmudicorum effatum, »post exitum materiae gaziformis ex utero vel alius rei non durabilis, unâ cum Metrorrhagia feminam posse manere gravidam."

§ 18.

Quod ad frequentiam abortuum statuebat R. Jehoschuah: »Plurimae gravidae pariunt, minima pars earum abortum patitur, et in maxima parte abortuum foetus sunt feminini sexûs." *Bechoroth*, 20 b. Haec ultima sententia nostris quoque diebus est repetita.

Inter causas abortûs recensentur in Talmude mors

matris 2) *odor carnis* 3) et *abortus* quem in anteriore graviditate femina jam passa fuerat; nam tunc verendum, ne nova graviditate iterum aboriat. (*Sabbath*, fol. 66 b. cf. *Raschi*, ad *h. l.*). Vento australi magnam tribuerunt efficaciam, quamobrem, quum *R. Nachman filius Jaākobi* dixerit: »*ventus australis flat,—dixit Rabbā,* »*sic Rab dixit: femina abortum patitur eo. Et Sche-* »*muël dixit: etiam margaritae in mare putrescunt eo.* »*R. Jochanan dixit, etiam concubitus seminis in in-* »*testinis feminae (semen in utero) corrumpitur eo.*" (*Gittin*, fol. 31 b) 4). Ad illustrandas causas abortus quoque sequens factum pertinet, quod in *Tractatu Sabbath*, fol. 63 b. refertur: »*Istam feminam (gravidam), adeuntem* »*quamdam domum ad coquendum panem, allatravit* »*canis, et infans suus se evulsit. Dixit ei herus domi: ne* »*perterreas! nam evulsi sunt dentes ejus et sublata sunt ei* »*ungues! Dixit femina: arripe bona tua et dejice ea in* »*spinas! (Proverbium Talmudicum, pro gratibus nimis sero* »*habendis) nam jam movit se infans.*" Ex hacce enarratione videmus, causam abortus hujus feminae fuisse terrorem, quam ei iniecit canis dum abortum percepit ex motu infantis: — terror enim saepissime sistit causam abortus praecipue in feminis, quae nervosa gaudent constitutione. Quod ad motus infantis, ex quibus femina praedixit abor-

2) »*Omnes consentiunt, ejus (matris) mortem facere abortum*"" *Chulin* fol. 73 b.

3) »*Non aborta est femina odore carnis sacrae.* (*Joma*, fol. 21 a; *Aboth V.* 5.).

4) Fere similia *Hippocrates* statuit: »*Si vero hyems* »*australis et pluviosa et placida fuerit, ver autem siccum et aqui-* »*ronium, mulieres quidem, quibus partus in ver incidit, ex* »*quavis occasione abortiunt.*" (*Aphorism. Sect. III. No. 12.*).

tum instantem, optime judicavit illa; — nam symptomata, quae abortum antecedunt et indicant, saepe motus vehementes foetus sunt, qui motus, ex opinione recentiorum, sunt convulsiones in agone mortis. (Hoebeke: *Verhandeling over de miskraam*, p. 77.).

§ 19.

Inter ea, quae apud veteres veniunt nomine *Abortus*, ^{De seminis effluxu.} pertinet quoque ejectione seminis ex utero, paucis diebus post coitum, imprimis diebus *septem* prioribus. Auctor libri *de partu septimestri*, et Aristoteles (*Hist. Animal. L. VII. cap. 3.*) ἐχρῶσεις, vel *effluxiones* vocant tales seminis ejectiones. Neque Rabbini hanc doctrinam ignoraverunt, talem feminam, dicentes *mulierem*, quae «*concubitum seminis evomit* (אשה שפלטה שכבח ורע)" Haec seminis ejectione ex Rabbiorum doctrina inprimis locum haberet tres dies post coitum. (*Sabbath*, fol. 86 a. *Mikvaoth. Cap. VIII. M. 3.*). Curae graves et esus vernium et reptilium semen corrumpunt foetidumque reddunt, ita ut a femina, quae conceperat, iterum defluat. (*Nidda*, 34 b.).

Describunt varias res quae abortu eduntur, quarumque plures jam enumeravi; occurrunt vero alia. Sic v. c. loquuntur in *Nidda*, fol. 21 a. in *Mischna*: «*Quae aboritur, frustum . . . quae aboritur uti species corticulae, uti species crinium, uti species humi, uti species muscarum rubrarum, — (hae materiae) ponantur in aqua; si solcantur, impura est; si non, pura est 5).*" Omnia haec varias sistunt formas, quas sanguis coagulatus refert. —

5) De frustis illis vid. pag. 76 seqq.

Modum, quo indagabant Rabbini, num sanguis esset coagulatus menstruus, vel aliud quid, sequentia quoque illustrent quae obveniunt in *Nidda*, fol. 22 b. »R. Eleazar filius, R. Zadokis, dixit: Duos casus pater meus »secum tulit a Tabaïn ad Jabnen: Factum est, »ut quaedam femina abortifuerit quasi species corticularum rubrarum, et venerunt et rogaverunt a patre, et »pater rogavit a sapientibus, et sapientes rogaverunt a »medicis, et dixerunt iis (Medici sapientibus): illa »femina habet vulnus in intestinis (in utero) ex quo »aboritur corticularum adinstar; ponantur in aqua; si »solvantur, immunda est. Et iterum factum fuit, ut »femina aliqua aborta fuerit quasi crines rubros, et »venit et rogabat a patre, et pater rogabat a sapientibus, »et sapientes a medicis. Et dixerunt iis: abscessum »(שומא) habet in intestinis suis, ex quo aboritur quasi »crines rubros; ponantur in aqua; si solvantur, inmundum »est;» eo in casu enim foret sanguis coagulatus, et inmundum erit ob menses; si non solvantur, forent particulae ulceris vel abscessus uteri: — immittebantur particulae dubiae in aquam tepidam (בפרשין) per XXIV horas. Si vero casus urgeret, judicationem suadent sequenti experimento. Fricetur materies abortiva cum saliva supra unguem; si est sanguis, saliva illum solvit. Ista experimenta demonstrant quidem sagacitatem horum medicorum, neque iis omnis fides est deneganda. Doleo vero, Gemaristas non attulisse rationes, quibus fuerint ducti hi Medici, ut abscessum uteri dignoscerent.

§ 20.

De secundariis abortu editis.

Loquuntur denique de abortu secundinarum (הכפרלה) שרי, *Nidda*, fol. 24 b.). Ob talem abortum femina

debebat implere dies purificationis pro matre et pro femella; nam dicunt: »*nullae secundinae absque infante*» (Nidda, 26 a.). Tali in casu enim verus abortus exstat; secundinae tantummodo superstites manserunt, dum ipse embryo interiit. Statuit Rab (Nidda, 26 b.) secundinas insequi abortivum foetum intra tres dies, quumque femina aborta fuerit, et placenta veniat serius quam post tres dies, tunc polluta est *ob novum partum*. Errant tamen Rabbini nonnullis in rebus. Secundinas nempe semper insequi infantem, — et quando istae exeunt foetum jam fuisse expulsum, haec non omnino cum experientia nostrorum dierum conveniunt, quia placenta remanens, primo illud docente cl. Nägelle, aliquando viribus uteri absorbentibus plane disparuit et fuit absorpta; — et rarissimis casibus etiam placenta praevia ante foetum in lucem prodixisse videtur. Neque minus a veritate discessit Rab, statuens, »in abortu citius insequi secundinas quam in partu vero,» quia nunc satis superque notum est, in abortu saepissime secundinas diu in utero morari antequam exeant, et quidem per hebdomades plures sine ullo mulieris damno.6). (Cf. L. F. von Fro-

6) In lectionibus obstetriciis Cl. de la Faille narravit, se ante aliquot annos fuisse vocatum ad puerperam, quae quatuor fere diebus tuoc post partum nondum expulerat secundinas. Exploratione orificium uteri satis inveniens clausum, credidit errorem Obstetricis, et forsan cum sanguine ex haemorrhagia gravi, secundinas fuisse rejectas. Post biennium autem ad eandem feminam, iterum parturientem vocatus ob haemorrhagiam, vidit placentam recentem expulsam cum insequente massa dura, compacta, albida, fere coriacea, magnitudinis et formae pilae oblongae, (uti Ruysch tales refert); quam accurate investigatam, ex fabrica vasculosa interna tandem diguovit placentam anterioris partus.

riep's *Handbuch der Geburtshülfe*, Ed. 7^a. p. 266. —
 Busch und Moser: *l. c.* III. p. 214.).

*De lapide
 stationis.*

Medicamenta, quibus praecaveri posset abortus, vel
 cura quaedam, qua mulierem abortum patientem tractare
 oporteret, nullibi reperiuntur, excepto autem Amuleto,
 de quo in Tractatu *Sabbath*, fol. 66 b. sermo est,
 quodque mulieres collo adalligare deberent ne aboriren-
 tur. Venit amuletum illud nomine אבן הקומה *lapidis sta-*
tionis, (Buxtorff); et imprimis istis feminis bonum
 praestaret, quae jam antea abortum passae, et nunc,
 iterum gravidae, novum abortum timerent.

C A P U T III.

DE PARTU NORMALI ET ABNORMI.

A.

DE PARTU NORMALI.

§ 1.

Tempore patriâque Talmudicorum, omnia, quae feminae parturienti ferebantur auxilia, Obstetricibus fuisse mandata, supra jam dixi: nihilominus tamen in difficilioribus casibus viros quoque praestitisse auxilium. In Talmude non quidem exstat locus, quo patet quaenam auxilia Obstetrix in partu normali tulerit; sed nonnulla tamen obveniunt, quibus haec quaestio luce quadam collustretur. Primo loco de adminiculis partûs agam, inter quae aptus parturientis situs certe primum tenet locum.

*De Sella
obstetricia.*

Collocabant parturientem in sellam quamdam; et nullibi in Talmude Babylonico invenimus notitiam, quae docet, lectum vulgare hunc in scopum fuisse usitatum. De ipsa *Sellâ obstetriciâ* paullo fusius agere oportet,

siquidem adhuc hodie sub iudice lis est, quam aetate haec primo in usu venerit. Ejus mentionem in Talmude Babylonico ipsa Mischnah jam facit: — dolendum autem, auctores hujus operis nomina eorum quorum varias sententias collegerunt posteritati non tradidisse. Quum igitur jam in *Mischnah* de *Sella* est sermo, sequitur, *Sellam jam cognitam fuisse Doctoribus Mischnicis, seculo III^o P. Ch. N.* Sed Mischnici doctores prius jam sellam novisse videntur, uti patet e *Kelim* (Cap. XXIII. M. 4), quo loco discussionem de ea legimus adnotatam, cujus quoque R. Jose fuit particeps; et R. Jose vixit seculo II^o 1). Nullum ergo dubium superesse potest, quin *Sella obstetricia* saltem jam ineunte seculo III^o doctoribus Mischnicis fuerit cognita; imo longe antea jam bene cognitam fuisse sellam, eo quoque probatur, quia agitur de illa ut re maxime vulgari, cujusque hanc ob gratiam nullibi ulterior occurrit explicatio. Hoc respectu sellae obstetriciae idem accidit, quod multis aliis supellectilibus, quorum hic Tractatus facit mentionem, quaeque ut plurimum hodie ignoramus. Sed non solum in partu difficili has sellas in usum vocabant, verum etiam in partu naturali. (*Vid. Sabbath*, 128 b. *Eirchin* 7 a. et alibi).

Procul dubio igitur evictum videtur, sellam obstetriciam longe antiquiorem esse, quam vulgo credant Medici; quorum ante aliquot annos adhuc plurimi perhibuerunt, Moschionem et Artemidorum primos de ea mentionem fecisse 2). Sed jam ante Moschio-

1) Fuit enim R. Jose Chalephtha magister R. Jehudae Sancti. Vixit forsan ab Ao. 150-200 et ultra p. Ch. N.

2) Moschion: *de mulier. passion.* Ed. cit. cap. 47. Arte-

nem, magister eius Soranus Ephesius, qui floruit anno circiter 120° p.C., *sellam obstetriciam* accurate descripserat in libro *de passion. mulier.*, eamque protulerat ut diu jam cognitam. (Cf. Pinoff: *Diss. laud. p. 29 sqq.*). *Sella* venit in Talmude nomine משבר, proprie *fractor*, a vires feminae frangendo.

Sunt autem veteres atque recentiores interpretes qui opinentur, notitias etiam multo veteriores hac de re exstare, verbum האבנים (*Exod. I. 16.*) nempe interpretantes: *sellam obstetriciam*:—et quamvis hanc interpretationem non omni dubio liberam habeam, meam tamen facio 3). Neque ii videntur errare, qui quoque verbum

midori *Oncrocritica*. Cf. ioprimis: Ed. C. J. von Siebold: *Versuch einer Geschichte der Geburtshülfe*, I. Bd. p. 41, 42, 43.

3) Inter eos, qui huic voci aliam tribuerunt significationem, pertinet quoque R. Chasid, Talmudista quidam, qui ita effatur: (*Sotah*, 11 b.): «Quid est האבנים? Dixit R. Chanin: «magnum signum iis tradidit (Pharao obstetricibus), dixit iis: «tempore quo se inclinat ad pariendum femora sua frigescent «lapidum adinstar (באבנים). Et quod attinet ea, quae dicuntur «(*Jerem. XVIII. 3.*). «Et descendi ad domum figuli et ecce! «operam perfecit supra rotam» (figulorum) (אבנים); uti figulus «femur illud hoc loco, et femur (alterum) in alio loco, et rota figuli «in medio, sic et femina femur ad hoc latus, et femur alterum «in latus, et infans est in medio.» R. Chanin ergo aliam assumit interpunctionem, formamque dualisticam in pluralem mutat, atque (uti postea multi) voce nostra videtur subintellexisse partes genitales parturientis. Quae Septuaginta verterunt, «καὶ ὥς πρὸς τῷ τικτεῖν», nullo modo cum textu Hebraico conveniunt; hicque locus videtur etiam ad iungendus multis illis mendis, quibus codex Septuaginta scatet. Interpretatio Cl. Rettig ridicula est et manca (vid. Siebold l. c. 42), neque cum Cl. Siebold conjecturam doct. Redslob, declarare auderem «als der beste

משבר, obveniens in Jesaj. XXXVII. 3. et II Reg. XIX. 3. *sellam obstetriciam* habent, quae verba autem tropice sunt sumenda; sc. »infantes jam fere sellam attingunt, in exitu sunt, deficient vero mulieri vires ad partum absolvendum.»

Magis tamen mirandum, etiam adfuisse nonnullos, qui notitiam *sellae obstetriciae* in ipso quoque Talmude negaverint. Haec autem dubia plane falsa sunt, et exinde orta, quod illi ex fonte impuro hauserunt 4).

und einfachste,» quum nee longinquo vox האכנים similitudinem quamdam habeat cum illis vocibus, quibus Hebraei *testiculos* significant. (Eo minus hanc quaestionem silentio praeterire oportet, quia et Cl. Siebold (l. c. p. 39 sqq.) istis explicationibus in errorem est ductus.).

Multam hac in re fidem tribuo interpreti Chaldaico vetustissimo, Onkelos, qui האכנים = סחברא habet, ergo perfecte conveniens cum Talmudica *sella*, quae nomine venit משבר, quibuscum etiam Baal Aruch, fol. 110 b, consentit. Si porro cogitemus, apud Jerem. XVIII. 3. האכנים significare rotam, s. sedem, non video quare quoque hoc in loco non significaret aliquam *sellam*, sedem parturientis feminae. Aptia quidem non fuit neque idonea talis sella, sed »vividae fuerunt Hebraicae mulieres,» neque praeis tantae commodum erat curae ac nostris diebus. — nostraeque feminae talem non optarent sellam qualem Soranus et Moschion describunt.

Quamvis itaque verbum האכנים revera sellam obstetriciam significare videatur, dubia quaedam tamen tamdiu supererunt, donec ex monumentis veteris Aegypti pateat, tale instrumentum ea regione hisque temporibus in usu fuisse, et donec in veteri Aegyptiaco idiomate vox reperiatur ejusdem significationis et aequalis nostrae voci Hebraicae.

4) Vir Cl. Rettig, in Ullmann's und Umbreit's Theologische Studien und Kritiken, VII Jahrg. I Bd. p. 99, non solum existentiam *sellae* in V. T. negat, sed quoque in Talmude.

Constructio tamen sellae Talmudicae nusquam traditur. Tempore fere aequali, forsán autem serius quam

Afferit vir Cl. testimonium ipsius Maïmonidis, qui in commentario in Mischnam, *Sabbath*, fol. 128 b., inter ea quae ad partum necessaria sunt, et propter quae Sabbathum violare licet, etiam recenset »*nexum funium a quibus se suspendat ipsam tempore partus.*» His verbis Maïmonides nitens, Rettig non dubitat exinde argumentum petere pro sua thesi, credens *Talmud* agere de hoc »*nexu funium.*» Sed graviter erravit vir Cl.; nam Maïmonides quidem talia dicit, sed in ipso *Talmude*, neque en loco nec alio, de *nexu funium* sermo est. His accedit quod ipse Maïmonides in opere seniori aetate confecto, quodque *Jad-Hachasakah* inscribitur, hujus rei nullam facit mentionem, quum, in exponendis preceptis diei Sabbathi (*Cap. II. Hal. 11.*), enumeret ea quae necessaria sunt ad partum. Neque vero ex mente Gemarae Maïmonides talia potuit pertractare, siquidem ne ullo quidem loco in illa occurrat mentio »*funium nexus, a quibus se suspenderet ipsam tempore partus!*»

Hoc tamen argumento auctor nullomodo contentus, tandem unum affert documentum, quo (uti censet) tota historia interpretationis verbi האבנים, nec non »*fabula de sella,*» ad nihilum reducerentur. »In einer weiteren Stelle (*de vasis 23. 4.*),» inquit Rettig, »wird die *Sella obstetricis* genannt. Der Commentar »dazu scheint auf den Ursprung der ganzen *Fabel (!)* von einen »Geburtsstuhl zu führen. Denn ausdrücklich beruft sich der Commentator auf das Targum, welches על האבנים durch מתכרא »erkläre, und leitet daher die Bedeutung *sella mulieris puerperae*, »da doch die Text ausdrücklich מושב של חיה hat und R. Mosche »erklärt: *sella quaedam cui obstetrix insidet apud puerperam!* »Et haec sunt Cl. viri argumenta, quae Cl. vno Siebold (*l. c. p. 40*), epitheto »*schlagend*» ornat. Sed videamus, num eam laudem mereantur. In loco a Cl. Rettig citato, (*Kelim, C. XXIII. M. 4.*) obveniunt verba: ומשכר של חיה. (De significatione vocis חיה, cf. *Introd. p. 32 § 4*). Auctor clarissimus plenam fidem habuisse videtur iis, quae a Surenhusio, in sua versione

vixerunt auctores nonnullarum sententiarum in Talmude,

Mischnae (Tom. VI. pag. 116.), sunt tradita; sed Surenhusius ipso hoc loco maxime erravit, et quidem in voce חיה; quam vocem דֹּחַיה semper promiscue adhibitam esse a Talmudicis et pro obstetrice, et pro puerperâ ipsâ, videtur ignorasse. Sic v. c. in Joma (C. VIII. in Mischn. Ia.) vox חיה obvenit, et ipse Surenhusius optime eo loco vertit: »puerpera." Num forsitan autem hoc loco erravit Surenhusius et bene vertit priorem locum? Minime gentium! Quisnam vocem חיה in loco allato (Sabbath, f. 129 a.): per »obstetricem" verteret! Locus hicce ita sonat: »Dixit Schemuël: femina parturiens (חיה) per omne tempus quo sepulcrum (uterus) apertum est, num dicat egeo, vel dicat non egeo, violant propter illam Sabbathum: si clausum est sepulcrum, num dicat egeo, vel dicat non egeo, non violant propter eam Sabbathum." Ponatur nunc loco verbi »parturiens" verbum »obstetrix," — etiam obiter textum inspicienti luce clarius patebit, sensum tunc plane perversum esse. — Sed plura habemus: fateor enim, me reperisse neque in textu Mischnae ipsius, nec commentationis Bartnorae, vel Maimonidis, verba מושב של חיה: undenam itaque haec hauserit Rertig, prorsus nescio! — Verum pulchriora adhuc sequuntur: »ipse R. Mosche (Maimonides) erklärt: »sella quaedam cui obstetrix insidet apud puerperam!" Haec, verba sunt repetitio verborum Surenhusii, qui totam explicationem Maimonidis, nec non textum ipsum plane corruptit: — commisit nempe priorem errorem vertendo מושב של חיה = »sella obstetricis," — nunc autem vertens explicationem Maimonidis ad has voces, ita scribit: »est sella quaedam cui obstetrix insidet apud puerperam!" — haec autem Maimonides non dixit nam textus Hebraicus ea habet: מושב של חיה הוא הכסא אשר יעשה לאשה הרהר לישב עליו אצל הלידה hoc est: »Sella feminae parturientis: est sedile illud quod perficitur feminae gravidæ, ut sedeat in illo durante partu." Haec dixit Maimonides, — uou ea quae protulit Surenhusius, quaeque ab aliis sunt repetita.

Galenus quoque de *sella* disseruit in libro: *de naturalibus facultatibus*, Lib. III. (K. II. p. 151, 152.) 5)

§ 2.

Alia quaedam adminicula partûs recensentur in Tractatu *Sabbath fol. 128 b.* (in *Mischna et Gemara*); quo loco ita disserunt: »*Licitum est, propter feminam parturientem Sabbathum violare, ejus causâ obstetricem vocare ex uno loco in alterum, accendere lucernas, offerre ei oleum, et accendere rognm ut illa calescat.*» Solebant porro feminae imponere spongiâs oleo imbutas, ut frigesceret; id quod patet ex sequentibus verbis R. Nachmanis in *Sabbath fol. 54 b.*: »*Tempore quo (ovis) procumbat ad pariendum, abscondunt ei duas spongiâs (vel linteamina mollia) in oleo, et imponunt ei unam fronti, et unam supra uterum, ut (ovis) calescat. Dixit ei R. Nachman: tunc facis (ovi) ac si fuerit Jalta (uxor R. Nachmanis) 6).*

Ante jam dixi, in ipso Talmude perpauca occurrere, quibus munus obstetricum ulterius illustretur. Obveniunt vero quaedam notitiae de auxiliis, bestiis afferendis, quaeque ita sonant, (*Sabbath, fol. 128 b.*): »*Quomodo jvant? R. Jehuda dixit: arripit foetum, ne humi cadat. R. Nachman dixit: premit carnem, ut exeat foetus. — Didicimus [secundum sententiam*

5) »Quin et jam obstetrices ipsae non illico parturientes surgere jubent nec in sella collocant (οὐδ' ἐπὶ τῶν διαφρῶν καθιζοῦσιν), imo prius os uteri, quod paulatim se aperit tanguant.»

6) Oleum et spongiâe molles etiam a Sorano recensentur inter partus adminicula; sed suadet Soranus, oleo calido genitalis illinire ad dolores mitigandos. Pinoff l. c. p. 33

»R. Jehudae: *quomodo juvant? arripiunt foetum ne
 »humili cadat, et inflant ei in nasum, et porrigunt ei
 »papillam in ore, ut sugat. Dixit R. Schimeon
 »ben Gamaliëlis: miserebamur bestiae mundaе in
 »die festo. Quomodo id factum est? Dixit Abaje:
 »manipulum salis afferatur et ponatur ei in utero, ut
 »memor sit doloris sui et se misereat ejus (pulli); et
 »stillare faciunt liquorem secundinarum (liquorem amnii)
 »supra pullum, ut (mater) odoretur odorem ejus et
 »misereatur ejus.” — Haec quum bruta spectent, ulte-
 rius non explicabo: monendum tamen, nostro adhuc tem-
 pore multa ejusmodi auxilia in usu esse.*

Transeamus ad partûs ipsius negotium.

§ 3.

*De ipso
 partu.*

Probatur exemplis in Tractatu *Bechoroth* (fol. 8 a.)
 sequens Abajei sententia: »*Cuicumque virilitas ex-
 »terne est* (eorum femella) *parit; (cuicumque virilitas est)
 »interne, ponit ova. Quaecumque (animalia) coeunt de
 »die, pariunt de die; (quae coeunt) de nocte, pariunt de
 »nocte; sed quaecumque coeunt et de die et de nocte,
 »pariunt vel de die vel de nocte.”* Omnium infantum,
 qui nascuntur, dimidia pars est sexûs masculini, et
 dimidia sexûs feminini: itaque tot mares nascuntur quot
 puellae. Sic statuit R. Jehoschuah, in *Bechoroth*,
 fol. 20 b., quae sententia a veritate vix est aliena 7).

Tempore partûs, infans in utero est corpus hetero-
 geneum; quae regula ita a Rabbinis circumscribitur:

7) In Borussia v. c. ratio infantum masculinorum ad infantes
 femininos, per annos 1820-1834, fuit = 1,060 . 1. Busch
 und Moser, l. c., Bd. IV. Art. *Partus*.

» *Quando se abruptit (infans), corpus alienum est.*» *Eirchin: fol. 7 a.* Verbo illo עקר = *abruptit*, solvit, forsitan dicere voluerunt Rabbini, infantem ligamenta, quibus utero adnectitur, tunc dirumpere, et tum exire. Rabbini igitur videntur fovisse opinionem eandem ac omnes veteres, qui credebant, infantem ligamentorum ope utero materno adnexum esse, quibus ruptis, locum habet partus.

§ 4.

Causam dolorum ad partum, et situm quo infans nascitur, Talmudici sequenti modo explicant; in *Nidda*, fol. 31 a.: »*Et quum advenerit tempus ejus exeundi, se vertit et exit, et ii sunt (et ea est causa) dolores feminae. Et id est quod didicimus: dolores puellae vehementiores sunt quam dolores maris. Ille (mas) venit secundum modum coitus sui, et illa (puella) venit secundum modum coitus sui; haec faciem convertit, et ille faciem non convertit.*» In *Sotah*, fol. 11 b. tradunt, regem Pharaonem obstetricibus Hebraeis signa dedisse, ut marem a puella facile dignoscerent, et quidem inter ea: »*R. Chanina dixit: magnum signum iis tradidit: mas facie suâ est deorsum, puella facie suâ sursum.*» — Causam igitur, quâ feminis partus difficilior esset quum puellam eniterentur, in majore rotatione et versione puellae ponebant. Paraphrastes Raschi huic loco in Tractatu *Nidda* addit: »*uti vir faciem vertit deorsum (in coitu), ita etiam mas nascitur cum facie deorsum; et uti femina faciem habet sursum, sic puella vertere sese debet;*» foetus faciem enim in utero deorsum spectare credebant, uti supra

De doloribus ad partum; et de situ, quo infans nascitur.

dictum est (*Vid. pag. 67*). — Puella itaque plures perficere debet rotationes mare; atque hinc dolores, qui ab illis rotationibus pendent, majores sunt et plures quando puella nascitur. Puellam facie sursum, marem vero situ contrario nasci, est opinio certe singularis Rabbiniisque propria, cujus autem falsitatem probare nostris diebus non opus erit.

Mirum vero non est, Rabbinos causam dolorum ad partum quaesivisse in foetu ipso; nam non solum tota antiquitas, sed etiam plures obstetricatores recentiores (v. c. adhuc ante aliquot annos J. B. Friedreich) hanc in rem infanti vim longe majorem tribuerunt quam utero. Rabbini porro partum puellae difficiliorem pronuntiaverunt partu maris; et haec sententia iis est communis cum omnibus veteribus, inter quos Aristotelem⁸⁾ citabo, cui adsentiant Plinius⁹⁾ et Galenus¹⁰⁾. Haec omnia falsa esse, hodie satis constat: — imo Burdach contrarium docet, partum nempe puellae esse faciliorem, tardius tamen peragi partu maris (*Die Physiologie als Erfahrungswissenschaft. Bd. III. pag. 37.*).

Attendentibus ad sententiam: »et quum advenerit »tempus ejus exeundi, se vertit et exit,» ex verbis »se »vertit» (מחלפך) nobis apparet, Rabbinos quoque eidem hypothese addictos fuisse ac omnes veteres, statuentes

8) »Quae marem gerunt, fere facilius expediuntur et nitidiores »degunt, quae feminam contra.» *Hist. animal. L. VII. c. 4.*

9) »Melior color marem ferenti et faciliior partus, motus quadragesimo die. Contraria omnia in altero sexu, ingestabile onus, crurum et inguinum levis tumor.» *Hist. Natural. L. VII. c. 6.*

10) »Masculus autem in corpore quam femina majorem motum plerumque conceit et facilius paritur, tardius femina.» *Comm. III. in Hippocr. Epidem. Lib. B K. XVII. A. p. 445.*

omnem foetum, graviditate ad finem vergente, in caput sese vertere (*Calbute*); — hic enim non quidem erit sermo de rotationibus foetus in ipso partus actu.

§ 6.

Dolores praesagientes, una cum haemorrhagia, jam diu ante partum aliquando oboriri posse, doctores Mischnici in Tractatu *Nidda*, fol. 36 b. statuunt. Legimus ibi: »*quamdiu durat difficultas partus* 11)? R. Meir »*dicit, imo (aliquando) quadraginta et quinquaginta* »*dies; R. Jehuda dicit: sufficit ei² suus mensis* 12); »R. Jose et R. Schimeon dicunt: *nulla difficultas*

De doloribus praesagientibus, et haemorrhagia ante partum.

11) »Gravida, si doloribus affici incipit, eique sanguis »fluere incipit antequam pariat, ejusmodi sanguis vocatur *sanguis* »*difficultatis* (רם הקשי).» Maimonides, *Hilchoth Issure Biah. C. VII. Hal. 1.* »Et illud initium dolorum et stillicidium »sanguinis vocatur *difficultas* (קשי).» Cf. Maimon. ad *Mischnam cit.*

12) Haec ut bene intelligantur, ulteriore indigent explicatione. Est quaestio in hac Mischna: utrum femina gravida, quae in ultimo stadio graviditatis sanguinem videt, menstruata vel fluens sit habenda? Nunc rogant: quonam tempore jam statuere possumus, stillicidium sanguinis ex ipso instante partu oriri? Nam si ex ipso partu ortum habeat sanguis, non fluens est femina; sed sanguis pertinet ad partum. R. Jehuda hinc dicit: »omne »stillicidium sanguinis quod mense nono obtinet, partus est effectus.» Maimonides quidem aliter Mischnam intellexit; sed quum ad nostrum argumentum haec vix pertineant, ea omittam. In Gemara hanc regulam assumunt: »*Summa rei haec est: si* »*difficultas partus perpetua sit, non parit uti fluens; sed si dolores* »*per dies nonnullos cessent, stillicidium sanguinis vero continet,* »*tunc est parturiens et simul fluens.*»

»partûs diutius durat quam per duas hebdomades.” In ipsa Gemara tamen dicunt, nonnisi aegrotantibus supervenire praesagientes dolores, diebus quadraginta vel quinquaginta ante partum. Ceterum etiam auctores hodierni statuunt, imprimis in multiparis dolores praesagientes non raro jam IV hebdomades ante partum obvenire. Sensu tamen quo difficultatem partûs intelligunt Talmudistae, R. Jose et R. Schimeon aperte errant; quum praesagientes dolores jam citius nonnunquam adveniant, quam duabus hebdomadibus ante partum.

§ 6.

Signa diagnostica aperturæ uteri

Quaedam signa diagnostica aperturæ uteri, aliaque hanc rem spectantia, offenduntur in Tractatu *Sabbath*, fol. 129 a.: »*A quonam tempore adest apertura sepulcri (uteri)? Dixit Abaje 13): ab hora inde, quâ sedet in sella. — R. Huna, filius R. Josuae, dixit: a tempore inde, quo sanguis fluere incipit. Et dixerunt ei: a tempore inde, quo amicae eam suis brachiis ferunt. — Quamdiu adest apertura sepulcri? Abaje dixit: per III dies. Rabba dixit ex nomine R. Jehudae: (per) VII dies. Et dixerunt ei: per XXX dies. Nehardaei (Academici urbis Nehardeae) dixerunt: III, VII et X; (quibus verbis volunt), diebus tribus prioribus, sive dixerit, egeo, — sive dixerit,*

13) Saepius jam sententias hujus viri attuli, quae tamen non semper magnam ejusartis obstetriciae peritiam testantur. Principium ei nomen fuit Nachmeni. Praeses factus est Academiae in urbe Pumbeditha, circiter Ao. 330 p. Chr. Quam maxime meruit de educatione infantum et jurisprudentia Judaica.

«non egeo, — violant propter eam Sabbathum; — VII
 «(septimo die si) dicit, egeo, — violant propter eam
 «Sabbathum, (si) dicit, non egeo, — non violant propter
 «eam Sabbathum; — dies triginta (post partum), licet
 «dixerit, egeo, — non violant propter eam Sabbathum,
 «sed faciat (operam) Aramaeus (gentilis) die Sabbathi.
 «Est secundum Ulla'n filium Ilai dicentem: omnia
 «quae necessaria sunt aegrotis, ab Aramaeo absolventur
 «die Sabbathi. Et (hoc quoque est) secundum R. Ham-
 «menunam; nam R. Hammenuna dixit: (omnem)
 «rem, cui non est periculum (in mora), commendent
 «gentili et faciat (ille).” Sententiam Abajei, femi-
 nam non prius in sellam esse collocandam, nisi jam adsit
 apertura uteri, jam ante eum statuerunt Soranus 14),
 Moschion 15) et Galenus 16), et post eum Aëtius 17)
 et Paulus Aegineta 18).

Diagnosticum signum ex sanguine fluente petiitum,
 omnes veteres silentio praeteriisse videntur, excepto
 Sorano, qui dicit, «partu vero appropinquante, geni-
 talia intumescere et tenesnum urinae intrare, liquorem

14) «Quo vero tempore orificium uteri dehiscat, et chorii
 «ruptura imminet, parturientem in sella collocandam esse,” Pi-
 noff: l. c. pag. 25.

15) «Cum vero chorion ad ovi magnitudinem in orificio uteri
 «protuberans invenerimus, eam in sedile transferemus.” l. c. Cap. 49.

16) *De naturalibus facultatibus, l. c.*

17) «Porro tempus collocandi puerperam in sellam est: quum
 «uteri, osculo aperto digitis occurrerit ac prominuerit id quod
 «praerumpi solet,” *Tetrabibl. IV. Sermo IV. Cap. 22.*

18) «Tempus autem desessus in sellam est quum osculum uteri
 «apertum digitis occurrerit et praeruptio prominuerit.” *De re
 medica. Lib. III. Cap. 76.*

»effluere e genitalibus plerumque sanguineum, vasis chorii »tenuibus ruptis" (P i n o f f: *l. c.* pag. 24.). Est certe illud signum, quod nos »signare" (*het teekenen*) vocare solemus.

Quae sequuntur: „*de tempore inde, quo amicae »eam suis brachiis ferunt,*" haec alio loco in Tractatu *Oholoth. Cap. VIII. Mischnas 4.* illustrantur, quo loco nimirum sequentia offenduntur: „*Dixit R. J e h u d a :* »*Quando (domus est impura)? Quum in laueris tol-* »*latur; sed si perambulet, prior est munda; nam ex* »*quo fuerit apertum sepulcrum, otium ei non est peram-* »*bulandi*" 19). Rabbini itaque comprobaverunt quoque veterum quorundam absurdum consilium, feminam scilicet prioribus periodis partûs oportere ambulare nonnullosque perficere labores, quibus omnibus nimirum partus citius absolveretur. Moschion vero recte illud consilium rejecit 20)

Quae sequuntur circa tempus, per quod uterus manet apertus post partum, haec cum hodierna doctrina non plane conveniunt. Profecto sententiam A b a j e i falsam habemus, quia tertio die post partum orificium externum neque internum clausum est. Lubenter vero

19) Discutiunt eo loco doctores Mischniei, uum domus, in qua femina, cujus infans mortuus est natus, debebat prioribus periodis partûs, impura sit nec ne? R. J e h u d a concludit, »si femina fuit in illa domo tempore aperture uteri, dubium »num domus sit impura" Infans enim mortuus impuram reddit domum, quâ nascitur.

20) »Jubebat quidem antiquitas ut ambularent, aqua perfunderentur et cibos assumerent. Nos autem non ita haec fieri »consulimus, eo quod deambulatio foetum jam modo vix non »prodeum em expellat et iterum exentiat." *l. c.* cap. 50.

assentior statuentibus, post dies septem clausum esse orificium uteri, scilicet internum; externum vero nullo modo; siquidem in multiparis ad statum pristinum non redeat et semper aliquantulum apertum maneat. Concedimus tamen Talmudistis, periculum eo minus esse, quo remotior sit ipse partus.

§ 7.

Ex mente Talmudicorum unicus situs normalis is est, *Exponitur quisnam situs sit normalis, quo infans nascatur; et quisnam sit modus quo caput creat.* quo foetus capite praevio nascitur. Dicunt enim Misch-nici: „*Exiit uti solet: donec exierit maxima pars capitis ejus* 1). *Et quae nam est ma-* 1) Tunc natus habetur. „*xima pars capitis ejus? Quando exie-* „*rit frons ejus.*” Nidda, fol. 28 a. Hisce sequentia addunt in subsequente Gemara: (Ibid. fol. 29 a.). „*R. Jose dixit: quando exit secundum normam suam ad vitam. Et quatenam est norma ad vitam? Quando exiit maxima pars capitis ejus. Et quatenam est maxima pars capitis ejus?* R. Jose dicit: quum exierint tempora. Abba Chanan dicit ex nomine R. Jehoschuae, quum exierit frons, et nonnulli dicunt quum cornua capitis in conspectu sunt.” (משיראו קרני ראשו, tuberositates occipitis; Raschi).

Licet haec verba nimis vaga sint, ut ex iis aperte possemus dijudicare quamnam ideam de mechanismo partus coluerint Rabbinii, exinde tamen patet, ni fallor, modum quo caput exit, Rabbinis non tam incognitum fuisse quam omnibus aliis veteribus. Et licet verba mox allata a Rabbinis praecipue in medium prolata sint ut definirent quatenam sit *maxima pars capitis*, probant tamen haec nonnullos e Rabbinis cogitasse *tempora omnium prima*

exire, faciei partem superiorem itaque prius in lucem educi cui opinioni illi quoque assentiunt, qui statuunt maximam partem capitis exiisse si frons nata sit. Nos vero iis magis applauderemus, qui dicant: „quando *cornua capitis* „(hoc est *occiput*, uti quoque ex antithesi patet) in conspectu sunt,” quum revera occiput inter omnes capitis partes per rimam pudendorum primum transeat.

Ex hisce parvis notitiis quoque redundare videtur conclusio, etiam in iis regionibus viros nonnunquam partui naturali adstittisse,

Modum autem, quo caput infantis pelvim intret, non tradunt; crederem vero, Talmudistas quoque assecclas fuisse doctrinae, quae faciem infantis os sacrum spectare docebat. Haec opinio ex iis quae supra dicta sunt de causa dolorum ad partum probari videtur: — dolores enim nascente puella graviores habebantur quam dolores nascente mare, quia puella „*vertere se debet, ut facie sursum nascatur*”: mari autem non opus est tali versione, quoniam caput eadem positione prodit qua in utero collocatum fuit, nempe facie deorsum spectante et ad os sacrum matris reversa 21). Assumentes unum

21) Ex his quidem videmus, Rabbinos notitiam quandam accuratorem habuisse de mechanismo partus, seriori tempore primo a Fielding Ould et Smellie, nostrisque diebus a Naegelle imprimis exulta; verum exinde non patet, Talmudistas dedisse descriptionem mechanismi partus *capite praevio*, quā videre possemus eorum opinionem circa modum, quo caput pelvim intret. Quae falsa opinio viri doct. Fulda (in Siebold's *Journal für Geburtshülfe. VI Bd I st. p. 7.*) ortum duxit ex sua perversa hujus loci interpretatione; quia, loco »R. Jose dicit: *quon exierint tempora*, posuit: »Rabba Jose sagt: *nder Eintritt des Kopfes mit dem Seitenwandbein*,” id quod nullomodo e verbis ipsius Talmudis duci posse facile patet.

tantum normalem situm, Talmudici eandem fovebant opinionem, cum omnibus Medicis qui ante eos vixerunt et pluribus inter suos aequales: — sic auctor libri *de natura pueri* 22) illum unicum situm felicem et naturalem proclamat, quodque Plinius 23) ei assentit; neque Galenus 24) aliam fovet sententiam: — et, uti illi, sic Talmud quoque partum pedibus praeviis quidem memorat (*Nidda*, 26 a.), attamen, ni fallor, non secundum naturam eum habet: dicentes enim audivimus Rabbinos „infantem tunc modo secundum normam exire, quum caput sit praevium.” Celsus 25) tamen, qui ante R. Josen floruit, Soranus 26) ejusque discipulus Moschion 27)

22) »Puer autem, siquidem suo momento in caput »magis inclinet, facile mulier parit. Quod si in latus, aut in »pedes prodeat, si sic unquam, difficilem partum mulier »sentiet.” Hipp. *Opp. F. Sect. III. p. 28.*, ita quoque *Ibid. p. 26.*, *De morb. mulier. Lib. I. F. Sect. V. p. 167.*

23) »In pedes procedere nascentem contra naturam est.” *Hist. Natur. Lib. VII. cap. 8.*

24) »Caput enim foetus primum collo matricis »adidit, tum per id aliis ipsius partibus viam munivit. Atqui, »si foetus obliquus aut transversus pararet egredi, aut si secundum »longitudinem quidem, sed non ut nunc, id est caput, non in- »sereret, quod nonnunquam etiam sed raro accidit, vel crus ante »caput vel manum exiens, difficilem aliis membris exitum effi- »ceret.” *De usu part. corp. hum. Lib. XV. K. IV. p. 247*
Cf. *Definitio. medic. K. XIX. 455.*

25) »In pedes quoque conversus infans non difficulter extra- »hitur.” *De medicina Lib. VII. c. 29.*

26) »Reliquis tamen figuris minus suspecta est ea, quae in »pedes contingit.” Pinoff: *L. c. p. 44.*

27) »Quis foetus partus bono situi proximior? Quotiescum- »que junctis et in orificio uteri locatis pedibus, manibus sane »lateribus junctis prodit.” *L. c. cap. 148.*

(aequales?) partum pedibus praevis partui naturali proximum censebant.

§ 8.

*Altera idea
Rabbinorum
in partus
mechanis-
mum.*

Hoc loco singularem audiamus opinionem, quam Rab-
bini foverant de actu ipso partus. Hanc sententiam me-
moriae nostrae tradiderunt Talmudistae in discussione
quadam valde intricata, quae obvenit in *Nidda, fol. 26 a.*
Agitur eo loco de casu quodam ficto, quo femina si-
mul et Sandalum et verum infantem peperisset. Sequenti
autem modo loquuntur:

» *Quando exeunt, non exeunt nisi* 1) Sandalus et in-
» *conjuncti* 1). R. Papa dixit: *Exinde* fans.
» *disco: infantem cum Sandalo esse con-* 2) i. e. caput in-
» *jectum usque ad suum dimidium* 2), fantis umbilicum
» *et Sandalum capite suo foras expel-* illius Sandali attin-
» *lere* 3). *In loco illo de Primogenito* 4) git, et ita caput
» *vita potuerat esse, quod exierint via* infantis Sandalum
» *suorum capitum, et tunc Sandalus* foras extrudit.
» *prius venit* 5). — *In (loco illo in Trac-*
» *tatu Kerithoth* 6) *judicare possumus,* 3) Nunc loca affert
» *quod exierint via pedum suorum, et* quibus de tali casu
» *tunc infans prius venit* 7). — Rab agitur.
» *Huna, filius Tachlifae, dixit ex* 4) In illo loco
» *nomine Rabbae: imo quum cogites* casum inquirunt,
» *quod sint conjuncti* 8). *Sed debemus* num Sandalus, qui
» *invertere thesin. Apud Primogeni-* vero infanti prae-
» *tum: exierant via pedum suorum;* cessit, primogenius
» *infans, in quo est vita, se adhaeret* sit, nec ne?
» *et non exit; Sandalus, in quo non* 5) Caput enim
» *est vita, dilabitur.* — *Apud Keri-* Sandali in ferus est
simum, officio uteri
propius est quam
caput infantis. Ergo
si capite praevis

»thoth vero exierunt viâ capitum suorum; natus habetur; et Sandalus non prius (natus habetur), nisi exierit maxima pars ejus.»

infantem pepererat et postea Sandalum. Sed Judaëae religioni se addixit interea, et quidem priusquam Sandalus veniebat. Nunc rogant: utrum talis femina ob illum Sandalum, qui verus non est infans, piaculum deberet ferre, nec ne?

7) Si situs est perversus, pedes infantis officio uteri propiores sunt quam pedes Sandali.

8) Unus super alterum jacens (סמך על סמך); tunc ea nihilominus accidere potuerant, quod nempe infans vel Sandalus primo exierit.

Ex hac narratione satis confusâ, quantumpote a me illustratâ, sine dubio patet, Rabbinos uti omnes veteres credidisse infantem suâ vi exitum quaerere, idque ita ut capite membranas ovi disrumpente, exitum sibi pararet infans, — haud secus ac avium pulli testas ovi, quo continentur, frangant et ita ipsi viam sibi parent. Id tamen Rabbinis est proprium, quod, se opposcentes omnibus priscis scriptoribus, mortuum infantem facilius in lucem edi censeant vivo: qua in opinione plurimi tamen recentiores artis periti hodie cum Rabbinis non conveniunt. Forsan verbis: *»infans in quo est vita se adhaeret et non exit,»* illud volunt: infantem vivum ideo se ipsum retinere in utero, quia, — quemadmodum exeundi actio *ab infante* pendet, — ei nondum tempus exeundi est; dum vero infans mortuus, — cui nulla esse potest voluntas aut nisus exeundi, — sponte sua, h. e. pondere suo, ex aperto uteri ostio foras tendit, sive secundum Talmudistas „*dilabitur*” 28).

28) Singularis quidem est haec opinio Rabbiorum, in partu

§ 9.

*De cura in-
fantis neo-
nati.*

Supersunt adhuc quae tradiderunt Rabbini de cura infantis neonati. Primum quod faciendum censebant, infante nato, fuit ligatio et abscissio funiculi umbilicalis. Ideo inquit: (*Sabbuth*, 128 b. in *Mischna*) »*et ligant* (etiam ipso die Sabbathi id est licitum) »*umbilicum*. R. Jose dicit: »*etiam abscindunt eum* (funiculum umbilicalem).” His addunt Gemaristae: (*Ibid. fol. 129 b*). »*Dixit Rabba Bar Abuha; dixit Rab: Assentiunt sapientes R. Joseo, quod ad umbilicum duorum infantum attinet, ut secent eum. Quanam est ratio?* »*Quia attrahant ambo.*”

Ligatio umbilicalis funiculi apud omnes veteres res summi momenti habebatur; imo officium obstetricum hac de re nominavit Hippocrates ὀμφαλοτόμιαν. 29). Auctore

gemellorum, unum infantem alterum premere ita ut exeat. Sed nonne haec aliquomodo conveniunt cum illis quae ab auctore libri *de superfoetatione* (in initio) proferuntur: »cum mulier superfoetarit,” sic scribit, »siquidem primus foetus in medio utero continetur, superfoetatum quoque a priore expulsus prolabitur. Quod si in altero cornu conceptum contineat, ipsum postea partu rejicit, minime vitalem postquam vitali foetu liberatus uterus relaxatus et humectus fuerit.”

29) Etiam tempore Prophetæ Ezechielis funiculum umbilicalem fuisse praecisum, eanique sectionem adeo necessariam tunc fuisse habitam, ut miser et derelictus crederetur infans, cui funiculus non fuerit praecisus, patet ex verbis Ezechielis, in Sacro Codice Cap. XVI, Comm. 3. sqq. »Dicens, sic ait »Dominus Jehovah urbe Jeruschalimaicorum: commercia tua, »adeoque geniturae tuae sunt e terra cenahanaeorum, quasi: pater tuus sit Enoraëus, et mater tua Cithæa.

»Nam ad genituras tuas, quo die genitus fuisti, non fuerat prae-

tamen Sorano Ephesio, obstetrices antea funiculum umbilicalem dissolvere solebant clavo, calamo, cortice panis, aliove supellectili acuto; primus autem Soranus habetur 30), qui laudaverit ejus dissectionem scalpelli ope. (*Vid Pinoff: l. c. pag. 58 sq.*). Ex verbis autem Mischnicorum concluderem, jam Palaestinenses et Babylonicos scalpellum hunc in scopum adhibuisse, quoniam Mischnici utuntur verbo חתך, a חתך = *secare, scindere, abscindere (instrumento acuto)* Hujus rei fidem faciunt loci, in quibus sermo est de dissecandis quibusdam partibus, quibusque utuntur voce קרע = *findere*, et quidem v. c. apice acuto grani hordei, non decorticati 31). Si haec conjectura vera est, exinde conclusio nasceretur Rabbinos cum Sorano, et fortasse jam ante eum, umbilicalem funiculum *scalpello dissecasse*.

Quae dicuntur de funiculo umbilicali gemellorum, nos quoque defendimus, aliis autem rationibus ducti quam quidem Rabbini, quorum verba, „*quia attrahunt ambo*” illam videntur profiteri sententiam, quod metus sc. adesset ne motu infantis nati, et motu infantis adhuc degentis in utero, funiculus dilaceretur et sic vita alterius infantis in perniciem vergat. Satis constat recentiore experientiam jam diu Rabbiorum theoriam refutasse.

„*scelus umbilicus tuus et aquis non eras lotus, quam adspexi te, neque sale fueras conditus, nec fasciis eras fasciatus.*” et 9. seq.

30) Cf. Isensee: *de Geschiedenis van de Geneeskunde en hare hulpwetenschappen. Uitgegeven enz. door Dr. L. Ali Cohen. I Deel. 3 st. p. 188. Cf. quoque annotat. ad h. l. Doct. Ali Cohen.*

31) Sic quoque illo in loco Tractatus Sabbath, fol. 134 a., ubi agitur de atresia ani, per operationem quamdam removendam.

§ 10.

*Continuatio.
Consilium
practicum
momento-
sum.*

Placentam nonnuquam Rabbini in usum vocabant ut infantem asphycticum in vitam revocarent. Tradunt enim: (*Sabbath*, 129 b.). »*Docuerunt Rabbini: ligant umbilicum, et R. Jose dicit: etiam secant eum, et abscondunt secundinas ut infans calescat.* R. Schimeon ben Gamalielis dixit: *filiae regum abscondunt eas in pelcibus cum oleo; filiae dicitum in spongiis lanae* (lana pura, mundificata); *filiae pauperum in gossypio.*" Hae cautelae adhibebantur ut secundinae calidae manerent; antea enim diximus Rabbinos usos fuisse oleo ad calorem promovendum 32). Idem etiam Abaje consuluit: »*Dixit mihi mater: illi infanti, qui non respirat, afferant secundinas matris et illiniant ei ipsi et respirabit*" (*Sabbath*, fol. 134 a.). Hoc consilium, nec non sequens, ut immittatur sc. placenta in oleo vel aliis rebus calefacientibus, nemo veterum, quantum scio, dedit. Recentiore tamen tempore Crantz 33), Smellie 34) aliique, et nostris diebus Cl. Busch et doct. Moser 35), Grenser 36), aliique infantem, qui

32) Infantem asphycticum ope placentae in vitam revocandum esse, jam Aristoteles quidem videtur innere, attamen verbis minus apertis quam Rabbini. »*Sarpe autem factum est,*" inquit Aristoteles, »ut videretur nasci infans mortuus; cum eo infans in umbilicum, ac partes circumscissas efflueret sanguis priusquam ligaretur. Verum peritae artis obstetrices exprimebant intro ab umbilico. Ac statim infans, quasi prius exsanguis, rursus revixerit." *Hist. animal. Lib. VII. cap. X. (Ed. Schneideri).*

33) *Hebammenkunst*, p. 48.

34) *A treatise on the theory and practice of midwifery. Book 3. Chap. 2. Sect. 4. T. I. p. 228 et 229.*

35) *L. c. Th. I. 218 sqq.*

36) In: Schmidt's *Encyclopädie der gesamten Medicin. Band V. Art: Schritod der Neugeborenen. pag. 416.*

nascitur asphycticus ex asphyxiâ sic dicta nervosâ et suffocatoriâ, una cum placenta in balneum calidum immitti suadent; quo calor sustentetur et incitetur circulatio, ita ut idem fere faciant ac jam Talmudici fecerint.

Boni omnis porro a Talmudistis habetur, si infans statim post partum ejulet (*Jevammoth, fol. 71 b.*); si vero non ejulet et asphycticus nascatur, suadet Abajê. «*eum excitare in vanno, quo facto respirabit.*» (*Sabbath, 134 a.*).

Infans sanus, cui umbilicus fuerat praecisus, in balneo lavabatur, sale conspergebatur et tunc demum linteaminihus involvebatur (*Sabbath, 129 b.*). In Prolegomenis hujus Dissertationis jam monui, tempore Prophetæ Ezechiëlis eodem modo infantes tractatos fuisse 37).

§ 11.

De morboris affectionibus, quae puerperis supervenire possint, Rabbini nil fere tradiderunt. In *Jevammoth, fol. 13 a* haec autem occurrunt: «*ex doloribus partûs pili nonnunquam defluunt.*» *puerperarum morbi.*

Morbus quidam abdominis puerperarum memoratur in *Avodah Sarah, fol. 26 a.*, quem mor'um כורא vocant. Buxtorff (*Lexicon Talmudicum in voce pag. 1018.*) hoc verbo intellectum vult: *dolorem aut flatuositatem ventris post partum*; quocum convenit Raschi, dicens: «*est morbus mulieris parturientis et refrigeratae in sella.*» [Species peritonitidis puerperalis cum meteorismo?] Contra hunc morbum Rabbini laudant usum *Sicerae*, שכרא, speciei cerevisiae valde calidae et inebriantis, ex hordeo vel dactylis confectae.

37) Soranus quoque balnea tepida sale commixta commendat, Pinoff, *l. c.* p. 60.

B.

DE PARTU ABNORMI.

§ 12.

Ex Talmudis argumento L. B. certe quidem intelliget, nequaquam hoc ex opere hauriri posse definitiones aut descriptiones omnium eorum, quae partum abnormem reddere soleant. Occurrunt modo in Talmude sparsae notae quae partum difficilem spectant, quaeque collectae ne ullo quidem modo vestigium efficiunt systematis ejusdam partuum abnormium.

De Embryotomia.

Inter omnes obstetricas operationes veteres Embryotomiam maxime celebraverunt. Sic auctor libri *de morbis mulierum* (Hippocr. Opp. F. Sect. V.) explicite eam tractat; sic quoque unicum caput Encyclopaediae Celsianae (*Libr. VII. C. XXXIX.*), quo de obstetricia arte agitur, plurima de Embryotomia vel Embryulcia habet; neque Soranus, neque Moschion in Dystokia ullam lere operationem memorant, exceptis versione et Embryotomiâ. In Talmude quoque nonnullae occurrunt notulae de Embryotomia. Infans, hac operatione in lucem editus, vocatur מרוחק = *dissecatus*, cui verbo simul addunt מפסד = *perversus*. Cf. *Nidda*, fol. 28 a. Legimus enim ibi in Mischna: »Si exierit *dissecatus vel perversus*, — (tunc) quando maxima pars prodiit, est uti natus" (tunc habetur quasi totum infantis corpus natum esset). Dissecatus infans autem simul perversus est, h. e. situm perversum habuit; nam dicunt Gemaristae (*Ib. fol. 29 a*): »Num exiit *dissecatus vel perfectus, uterque perversus est.*" Jarchi »*perversum*" infantem illum habet, qui pedibus praevis nascitur; videtur itaque iste commentator hac voce nil

aliud intelligere quam situm perversum simplicem 1).

Sed non semper situs perversus infantis Embryotomiam indicabat; quia ex alio loco (in *Oholoth Cap. VII. Mishna VI*) patet, Rabbinos nonnunquam dissecasse etiam infantem qui *capite praevio* nascebatur. Statuunt enim Mishnici (loco mox citato) sequentia: »*Femina quae* «(si) *difficulter parit, dissecant foetum in ejus intestinis, et faciunt exire eum membratim, quia vita ejus* «(matris) *praestat vitae illius* (foetûs). (Si) *Exiit maxima pars* 2) (foetûs), *non attingunt eum* (foetum), *quia non expellunt personam ob personam.*»

Ratio quare matris gratiâ foetum sacrificandum velint Rabbinei, haec est: Est praeceptum Talmudicum, *Quemcumque qui viderit alium persequentem et intendentem illi occidere, omnibus viribus conari oportet, personam quae in periculo versatur a periculo imminente vindicare, imo etiam si id non aliter fieri possit nisi proprio periculo: nulla autem haberi licet ratio, quatenam sit persecutoris persona, et casus semper et*

1) Maimonides (in suo comment. ad h. l.) aliter haec explicat; et quidem ita: »sensus verborum est: si membra in corpore (matris) fuerint dissecata, membraque ejus (foetus) absque nullo ordine exeunt, v. g. exeunt manus et postea pedes et tandem brachium, et hoc est *perversus* (מכורס); vel si exierint »secundum ordinem, hoc est כחורך = dissecatus.« Sunt tamen haec verbis Talmudicorum plane contraria et crederem, erissem typhographicum hic in culpa esse; quia verba *dissecatus* et *perversus* commutaverunt locum. — Baal Aruch vero ea habet, Caput III. *Nidda*, fol. 23: »exiit dissecatus vel perversus:» explicatur: »exiit dissecatus, uti *creatus est*: caput seorsum, et »post illud humeri, pectus, dorsum, femora, crura et pedes; »applicatio טוֹ מְכֹרֵס, *non secundum ordinem.*» Illis ultimis tamen non addit, membra fuisse dissecata. Aruch cum Musaf Ha'aruch. Ed. Amstel. Ao. 415 = 1655 fol. 127 a, col. 2.

2) In *Sanhedrin*, 72 b. legitur: »si caput exierit.»

omni sensu est idem. Et quia Rabbini causam partus difficilis non in matre, sed in ipso infante quaerunt, ideo infans ab iis habetur vitae matris persecutor, et infantem itaque matris gratiâ sacrificandum declarant. Hic enim si non sacrificaretur, matris mors sine ullo dubio instaret, et infans hinc sisteret causam hujus mortis. Haec omnia vero tantum valent, si caput infantis nondum exierit; nam si idem periculum adhuc instat post capitis exitum, scena plane mutatur; credunt nimirum tunc, causam sitam esse in ipsa matre, et dicunt: *»tunc ex coelo »eam (matrem) persequuntur.»* (Vid. *Sanhedrin*, fol. 72 b.). Hoc in casu infans vitae matris persecutor non amplius est; et quia *»vitam alicujus personae ob vitam alterius expellere non licet,*» ideo non attingunt infantem 3).

3) Haec ita habet Maimonides in *Jad Ha basukah, Hitchoth* רוצח ושכירת נפש (*de homicida et de conservandâ persona*). *Cap. I. Halach. 9.*, quaeque certe ex loco illo *Sanhedrin*, fol. 72 b. optimo jure hausit. Dicit nempe ille Commentator eximius: *»Et hoc etiam est praeceptum»* : od non facias, ne te *»miseret personae (נפש) persecutoris.* Hanc ob rem sapientes *»monuerunt: licitum esse in femina gravida quae difficultati parit,* *»foetum dissecare in suis intestinis, sive ope תוֹבֵי Sam, sive ope »manus, quia ille (infans) est tanquam persequens eam (matrem) »et intendens eam necare.* Et quando caput jam exiit, non *»attingunt eum, quia non pellunt personam ob gratiam alterius.* *»Et ea est natura mundi,*» est sententia omnium hominum, infantem matris gratiâ esse necandum. —

Haec omnia tam explicite exposui, quia sequentibus pagellis illis verbis mihi erit opus. —

Interpretationem meam vocis שָׂפָּ, certe non requirit ulteriorem defensionem, quippe quae sexcenties hoc sensu sumitur. Tali interpretatione omnes quoque auferuntur lites de quaestione: *»num Rabbini ideo Embryotomiam licitam declarent in utero, »quia infantem in utero animatum non habuerunt?»* Cf. *supra, Embryologia*, pag. 64 sqq.

Haec satis probant, ex mente Rabbiorum Embryul-
ciam non prius instituendam esse, nisi summum jam
adsit periculum, vitaeque feminae nullo alio modo ser-
vari possit quam morte infantis.

Vagam et indeterminatam esse indicationem »femina
quae difficulter parit,» omnes mecum consentient; quia
femina ex tot tantisque causis difficulter parere solet.
Elucescit vero ex verbis Talmudicorum, Embryotomiam
non esse contraindicatam etiamsi infans vivat; si autem
caput vel maxima pars infantis nata est, hanc operatio-
nem (ob rationes supra expositas) licitam non habent.
Quod ad sententiam, »foetum matris gratiâ esse inter-
»ficiendum,» nostra quoque aetate illis feliciter raris
casibus idem statuitur, quando foetûs vita inimice oppo-
sita est vitae matris; quia mater, haecque sola, habet
jus in infantem: — et ipsa Embryotomia, — operatio
adeo crudelis, quae meliore artis obstetriciae conditione,
continuo evadit rarior, nec tamen umquam e catalogo
licitarum operationum omnino poterit deleri, — nunc
quoque habetur indicata, si, versione neglectâ, et foetu
certissime mortuo vel ut mortuo habendo, matri auxilium
meliori modo afferri nequeat.

Altera Rabbiorum sententia, quod, si caput infantis
jam exierit, sed truncus ob magni sui volumen caput
sequi non possit, nullo casu Embryotomia sit instituenda,
— haec doctrina nititur fundamentis pro parte veris.
Tunc enim causa potest esse Ascites foetus, vel mon-
strositas duplex; et ambae hae aliam minusque horren-
dam requirunt agendi methodum: — nam hypertrophiae
partis inferioris (qualis interdum occurrit apud vitulos,
nostratibus cognita nomine *een steenbil*) quantum scio,
inter foetus humanos casus nondum est observatus.

§ 13.

Versio spontanea.

Inter situs foetus perversos prae aliis frequentior est ille humero praevio; et in hoc aliquando versio spontanea observatur, qua natura sua sponte perversum situm infantis in meliorem commutat. Ad hoc phaenomenon Rabbini et in homine et in bestiis attenderunt. Ajunt nimirum in *Nidda*, fol. 28 a.: «Dixit R. Huna 4): si infans egredientem facit manum suam et retrahentem facit eam, mater polluta est ob partum, uti scriptum est: «et fuit in pariendo et porrexit manum» (Gen. XXXVIII. 29). Rogavit R. Jehuda: (dum) egredi fecit infans, mater nondum de ulla re suspicatur? R. Nachman dixit: secundum meam sententiam verba R. Huna e ita explicare debemus: suspicanda quidem est (de instante partu); dies vero purificationis non attribuitur ei, nisi exierit maxima pars ejus (infantis).» In Tractatu *Chulin*, fol. 68 a., versionis spontaneae in bestiis mentio exstat; quae verba ita sonant: «Bestia, quae difficulter parit, et cujus foetus facit egredientem manum suam et retrahentem facit eam, licitus est (foetus) qui edatur. (Si) Exire fecit caput ejus, licet retrahens fecerit (illud), est (foetus) uti natus.»

Omnes veteres Medici silentio praetereunt versionem spontaneam, et per multa secula inobservatum remansit illud naturae spontaneum auxilium; donec Thomas Denman, obstetricator Anglicus peritissimus, publici juris fecit suas imprimis de Evolutione spontanea observationes 5).

4) Floruit ultimo demidio Seculo III. p. Chr. N. [circa Ann. 290 (Wolff)]. Praeses fuit Academiae Soranae, et dicitur octingentos discipulos habuisse.

5) *The London medical Journal*, Vol. V. 1785. Cl. Velpeau

Ab hoc inde tempore casus non defuerunt variarum formarum versionis spontaneae, ita quidem ut hodie tres ejus species assumant auctores. Ad quamnam speciem casus Talmudistarum sint referendi, certo statuere non possumus; sed loquuntur de membri praevis retractione, quae tunc modo locum habet, si jam rupta sint velamenta; crederem itaque, Rabbinicas observationes ad secundam speciem versionis spontaneae esse referendas; illam puto, quae pars initio praevis retrahatur et alia pars prodeat, quo facto partus magis accedit ad normam.

Capitis vero retractionem, quam saltem in bestiis contingere dicunt Talmudistae, dubitarem; licet doct. Haine casum communicet, quo infans caput jam natum in uterum retraxisset! (Causa ille citatur apud Hoebeker, *Verhandeling over de miskraam*, p. 81, qui illum habet fabulam.)

§ 14.

Versionis artificialis notitiae in Talmude plane quidem abesse videntur: attamen duobus locis aliquid de *Versio artificialis.* versionis negotio nos posse suspicari non plane negarem: — in Tractatu *Kidduschin*, fol. 24 b. enim haec leguntur: »R. Eleazar dixit: porrexit dominus manum suam in intestina servae suae, et coecavit foetum qui est in utero ejus; liber est. Quare? Quia lex dixit: „et corrumpit,” donec intendat corrumpere.” Addit huic loco commentator Jarchi: dominum hanc ob rem porrigere manum in uterum ut educeret infantem. Silent quidem ipsi Talmudistae de causa, illum fuisse primum negavit, probavitque, Peu et de la Motte in suis operibus observationes aliquas communicasse, quae revera evolutionem spontaneam arguant

quare dominus id fecerit; crederem tamen versionis negotium saltem in caput, iis non plane ignotum fuisse, quum ex supra dictis abunde pateat, Rabbinos praecipue Graecorum Medicorum opera haud ignorasse. — Alter locus, quem huc referre vellem, aliquo sensu tantum suspicionem posset movere de versionis auxilio. Legimus nimirum in Tractatū *Chulin*, fol. 71 a. (Mischna): „*Mulier cujus infans mortuus est in ejus intestinis; et porrexit (ופשטה) obstetrix manum suam et attigit eum (infantem): obstetrix polluta est pollutione septem dierum, et femina pura est usque ad exitum infantis.*” „Manus introductus in uterum,” suspicionem quamdam movere posset forsitan versionem hic posse intelligi; sed quia neque Mischnae, nec subsequentis Gemarae verba hanc suspicionem corroborant, et ipse textus aperte agit de „infante mortuo,” ideo concluderem, hoc loco tantum esse sermonem de „Extractione foetus mortui;” — id quod eo magis opinarer, quia Rabbini, exeundi actum a foetu ipso derivantes, exinde necessario statuebant infanti mortuo nullam hunc in actum esse vim, ideoque eum manu esse extrahendum.

§ 15.

*De partu
sine sanguine.*

Inter signa diagnostica aperturae uteri, quorum Rabbini mentionem faciunt, venit quoque Metrorrhagia, quam tamen non semper locum habere censent. Disputant enim de quaestione (*Nidda*, fol. 38 b.): „num „apertura sepulcri (uteri) adesse queat sine sanguine” (sine haemorrhagia)? E quibus conclusio est: „potest „adese apertura sepulcri sine sanguine.” Imo in *Nidda*

„fol. 42. b. „*partum siccum*” memorant, qui prorsus absque ulla haemorrhagiâ absolvitur. (Cf. Raschi ad h. l.).

Istius phaenomeni apud antiquos nulla exstare videtur mentio, sed cum experientia hodierna observationes Talmudistarum conveniunt: quemadmodum quoque praeceptor aestumatissimus Cl. de la Faille in praxi sua plures tales observavit casus et nobiscum in lectionibus suis communicavit, quibus ne guttula quidem sanguinis erat fusa: nihilominus tamen puerperium in plurimis, non tamen omnibus, siue noxa solvebatur.

§ 16.

Inter illa quae periodum quintam partûs abnormi feminaeque periculosam reddere valeant, tam apud veteres quam apud recentiores frequentissime fit mentio de *Retentione* placenta. Haec Retentio per multos dies continuare potest, uti jam Rabbini testantur in *Nidda*, fol. 26 b., quo loco simul nonnulla adnotantur de partu gemellorum. Sic enim ibi legitur: *Dixit R. Jehuda: dixit Rab: per omnes tres dies priores „attribuunt secundinas infanti, et abhinc eo tempore „et deinceps suspicantur alium (adhuc) infantem (ad- „esse). Dixit ei: num Rab talia dixit! Dixit eum „Rab: iustus nullo modo moratur post socium suum. „Tacuit. Sed, — inquit, — forsitan illic est sermo de „abortu, et hic de filio stabili (infante perfecto novem „mensium). Dixit ei: dixisti, te credere Rabum ita „judicare? explicite inquit Rab et quidem ita: aborta „erat abortum, et postea aborta erat secundinas: per „omnes tres dies attribuunt secundinas infanti (nunc*

„nato), hinc et deinceps suspicantur alterum infantem.
 „Peperit et postea aborta erat secundinas, etiam usque
 „ad decem dies non cogitant de alio infante.”

Iste locus, qui certe non plane immunis est quadam confusione, huc redit: R. Jehuda dixit ex nomine Rabi, „si per tres priores dies post partum, placenta „non expellitur, tunc cogitandum est gemellos adesse „et alterum infantem nondum nasciturum.” Alter Rabbīnus, discipulus — uti videtur — Rabi, objicit: „Rab „ea non dixit, quia opinabatur alterum infantem mox „insequi priorem, et ergo, si placenta per tres dies fuerit „retenta, ex ejus opinione alium infantem suspicari nemo „potest.” His quum nihil respondit R. Jehuda, prior ille explicationem ipse adjecit dixitque: „forsan Rab „loquitur in primo casu de abortu; et si ille locum habet, „et placenta intra tres dies non venit, tunc de alio „infante adhuc in utero est cogitandum. In perfecti in- „fantis partu autem alter infans semper priorem mox „insequitur, et ergo, si tali casu placentae expulsio „retardatur, de alio infante non est cogitandum, quia „talis jam dudum in lucem prodisset.” His respondet R. Jehuda: „revera ita dixit Rabi.”

Haec autem, secundum hodiernam scientiam sunt vera mixta falsis. Agens de abortu, errorem Rabi in hanc rem jam demonstravi; sed in praesente quoque casu errores exstant. Quod in partu gemellorum secundus infans priorem saepe brevi insequatur, concedo quidem, sed in multis casibus illud tamen ut regula non valet. Sunt enim casus, et profecto non rari, quibus alter infans alterum insequitur post duos tresve dies; neque desunt observationes, secundum infantem non prius fuisse natum quam die 17^o post priorem; imo 42 diebus postea. (Busch und

Moser, l. c. IV. p. 658.). Si tali in casu alterius infantis expulsio tamdiu post priorem natum retardaretur, Rab certe quam maxime errasset falsumque tulisset iudicium; et feminam puram declaravisset quae ex Rabbiorum doctrina deberet declarari polluta.

Memorant vero casus placentae diu in utero retentae, et quidem ita: (*Nidda, fol. 27 a.*): *Dixit Rabba „Bar Schilaj: dixit R. Mathna: Schemuël „dixit: Factum est, ut attribuerint secundinas infanti „ad decem dies”* infans jam decem dies natus fuit, et sic porro (*Ib. Ib.*): *Rabba Bar Bar Chana dixit: „factum est, ut attribuerint secundinas infanti usque ad „dies viginti tres. R. Joseph dixit: usque ad dies „viginti quatuor”* 7).

6) Inter veteres Medicos, auctor libri pseudo-Hippocratici: *de morbis mulierum*, de diuturna secundinarum retentione haec dicit (*Hipp. Opp. F. Sect. V. p. 173*): „Quod si secundae exierint, mulier etiam sanescit. Plerumque vero putrescunt, sexto tamen aut septimo die, aut etiam posterius exeunt.” Vidimus vero Rabbinos diuturniorem retentionem memorantes; neque haec mira videantur, quum nulla fere auxilia activa, ut ita dicam, veteres in casu retentionis placentae instituerint: — potius remedia interna, valde absurda, superstitiosa et fastidiosa commendaverunt. Attamen diu ante Mischuam confectam, Celsus (*de Med. L. VII. c. 29.*) et postea Soranus (*Cl. Pinoff, Diss. laud. p. 36 sqq.*) artificium manuale, hoc in casu adhibendum descripserunt, quod in multis omnino a veteriore curandi methodo distat, multaque in eo invenimus vestigia methodi agendi hodiernae. In Talmude nihil horum inventientes, exinde concludimus, Talmudistas hanc doctrinam verosimiliter sive ignorasse, sive rejecisse.

§ 17.

*Num foetus
possit vivere
in utero
matris mor-
tuae,*

Mortem matris frequentem causam sistere obitûs infantis, omnibus temporibus Medicis fuit notum. Ita jam vidimus Rabbinos dicentes „morte matris abortum provocari.” Hoc principio ducti, si gravidam capitis damnarent, sequentia praecepta tradiderunt: (*Eirchin, fol 7 a. Mishna*): „Mulier, quae ut „occidatur exit, non exspectant donec (haec) peperit; „mulier, quae sedet in sella, exspectant, donec peperit.” Addunt in Gemara: *Dixit R. Jehuda, „dixit Schemuël: mulier, quae ut occidatur exit, „terberant eam ad locum graviditatis, ut infans primo „moriatur, ne veniant ad aliquid turpe.”* His ultimis verbis addit Jarchi: „nam si infans vivat, post mortem „matris exit, et id est aliquid turpe.”

Morti matris non semper antecedere mortem foetus, asserunt in Tractatu *Nidda, fol. 44 a.*, ubi de successionem hereditatis est sermo; „*Dixit R. Scheschet: „hereditatem accipit 1) ex bonis matris, 1) Infans unius diei. „ut faciat accipere hereditatem a fratre 2) Haec valent, „patris ejus. Sed solummodo 2) de in- 3) I. e. si femina „fante unius diei, sed de foetu nou ita 3). 3) gravida moriatur, „Quare? quia ille primus moritur, et infans ejus adhuc „filius hereditatem nou accipit a matre in utero non est „in sepulcro 4), ut filius patris sit heres. in potestate ut haec- „Verum num illud certum est? 5) Ex- redem instituat „stat enim factum, quo, oetus se moverit 6) alium. „tribus motibus 7). Dixit Mar filius 4) In utero. „R. Aschei: id est 5) Infantem prius „cissae) lacertae adinstar, quae etiam mori. 6) In utero ma- „se movet.” tris emortuae.*

7) Postquam mater prius obiit.

8) Illi motus infantis in utero matris emortuae.

Plurimis in casibus, matre emortua foetus quoque perit; et in quaestionibus sic exortis medico-forensibus diu secuti sunt Judices jurisprudentiam concilii Wetzlar-
riensis, statuentis: „in casu dubio ad matris mortem „praegressam esse concludendum” 7). Sed non desunt observationes infantum, qui, mortua matre, superstites manserunt 8), imo talium, qui e matre mortua solis viribus uteri, vivi expellebantur 9). Hanc ob rem quoque praecipiunt Talmudici, „si femina capitis damnetur (quae „nondum sedet in sella), primo ejus foetum interire oportet.”

Pulchre certe rationem explicant, quae exstat inter vitam matris illamque foetûs; neque naturae omnino contraria sunt, quae de caudâ lacertae abscissâ dicunt.

Negant igitur, foetum semper simul cum matre obire; — sed de his in sequente capite, quo de Lege Regia sermo erit, fusius agam. Addunt loco citato in *Eirchin*. „si mater ex morbo obiit, infans primo moritur; „*infan-*
„*tem enim*” — dicunt — „*in quo parca est vita, prius in-*
„*trat guttula Angeli mortis, et dissecat ei signa* 10); sed „*si occidatur illa, prius moritur (femina),*” — si mater

7) Valentin: *Pandect. med. legal.* I. 1. casus 1.

8) Cf Gardien in *Dictionn. des sciences médicales.* XVII. p. 422. Refert casum, quo infantem vivum 48 horas post mortem matris, ex utero extraxerant Medici; et in alio casu 24 horas post mortem matris sectione caesareâ virus infans in lucem edebatur.

9) Flores tales casus collectos reperies in J. P. Frank: *Genes-
kundige staats. cegeling.* Deel. I. p. 456 sqq. Imprimis hic conf. doct.
Maizier: *de partu post matris mortem spontaneo.* Berolini, 1°35.

10) Loquendi modus a mactatione bestiarum mundarum derivatus, in quâ partes quaedam (signa) persecandae erant, ut talis bestia rite mactata pronuntietur. Signa haec erant v. g. oesophagus, larynx, etc. partes ergo vitae sustentandae omnino necessariae.

ex violentia externa perit, illa prius moritur foetu — quod iudicium ab omni parte sere hodie etiam valet.

§ 18.

*De dissolu-
tione infantis
in utero.*

Infans in utero emortuus nonnunquam plane dissolvitur et membratim in lucem editur. Sequentia hoc de argumento in *Nidda*, fol. 28 a. offenduntur: „*Docuerunt Rabbini: quae aboritur manum incisam* (יר חתוכה) *1) et pedem incisum* 2), 2) *Pes incisus: Cf. mater ejus (manus vel pedis) polluta est ob partum, et non suspicandum num fortasse ex corpore obturato* 3) *venerit. R. Chisda, et Rabba, filius R Hunnae, ambo dicant: non dentur ei dies purificationis. Quae nam est ratio? Quia partus jam e longinquo est.* Infans enim jam dudum membratim a femina discesserat, et jam praeterierunt ejus dies purificationis; et nescimus itaque, a quonam puncto incipienda esset horum dierum enumeratio. Revera nonnunquam tale quid accidit; et vir doct. Montgomerij 11) casum se observasse narrat, quo foetus mense VII^o obiit; mulier vero, finito mense IX^o, nihil aliud ex utero edidit nisi humorem plane putridum et valde foetidum, nullum autem infantem: sed per duos annos, quibus femina illa dein vixit, nonnunquam ossa exierunt. In graviditate extrauterina ex partibus externis abdominis, vel ex ano interdum membra foetus dissoluti in lucem

11) *Die Lehre von den Zeichen, Erscheinungen und Dauer der monatlichen Schwangerschaft, aus dem Englischen von J. Schwann. Bonn 1839, pag. 357.*

prodeunt. Imo nonnunquam membra foetus in utero videntur separari, quod phaenomenon nomine venit „*Amputationis spontaneae foetus*” 12). Forsan Rabbini hujus phaenomeni mentionem fecerunt, quum dicant „et non suspicandum, num forsan a corpore obturato venerit,” cui scilicet pedes desunt. Certam quidem opinionem proferre non auderem, sed conjecturam propositam tacere nolui.

§ 19.

Ad partum abnormem, sequens quoque pertinet narrationuncula, quae obvenit in *Nidda*, fol. 42 b. „..... Aliquis, qui venit coram Rabba, dixit ei: num mihi licet infantem in Sabbatho eircumcidere? Dixit Rabba ei: omnino! Postquam exierat, dixit Rabba: num quidem cogitandum est virum illum ignorare, eircumcisionem in Sabbatho esse licitam? Seentus est eum et dixit ei: quomodo factum est? Ita factum est — inquit ille — audivi infantem ejulantem (רצין) versus vesperam ante Sabbathum, et non prius natus est quam die Sabbatho (die inse- quente). Dixit Rabba ei: ille infans caput suum jam extra vestibulum fecerat egredi, et (circumcisio in nostro casu) est ergo eircumcisio intempestiva, et ob omnes eircumcisiones intempestivas non violant Sabbathum!”

Vagitus uterinus.

Sine ullo dubio hic sermo est de *Vagitu* qui dicitur uterino, quod phaenomenon nostris diebus saepissime sane observatum, ex rationibus vero theoreticis antea praesertim ansam dedit magnae opinionum divaricationi.

12) Tales observationes communicarunt: Montgomerij in *London. med. and phys. Journal* Aug. 1832; et Schwabe in *Siebold's Journal*, cet. B. XVIII. St. 2 aliique

In citato loco Talmudis R a b b a opinatur, *illum vagitum, tum modo produci, si caput infantis jam haereat extra vestibulum*, ergo jam in ipsa vagina; alfirmat igitur idem cum plurimis hodiernis. Si vagitus uterinus obtinet, ita tantummodo oriri potest; et errant qui statuunt, foetum nonnunquam in ipso Amnio vagire: — spiritum ergo duceret foetus in spatio undique clauso, aërisque accessu prorsus impedito! Vagitus uterinus certe quidem negari nequit; sed cum Cl. Henke 18) eum solummodo fieri posse crederem disruptis jam velamentis, in partu qui non cito absolvitur, et in quo caput infantis ita est collocatum, ut aëri atmosphaerico liber aditus pateat ad laryngem, igitur in situ infantis facie praeviâ

§ 20.

Partus serotinus

Non solum existentia vagitûs uterini dubia movit, sed imo Partum serotinum cognoverunt Rabbini, de quo adhuc hodie lis est inter eruditos. Supra notavimus, ex mente etiam Talmudicorum graviditatem vulgo absolvi intra temporis spatium novem mensium et aliquot dierum: — memorant tamen casum graviditatis, quae multo diutius duravit, in Tractatu *Jevammoth*, fol. 80 b.: »Accidit »R. Tosphoae, ut femina, cujus maritus profectus »erat ad oras maritimas, retardaretur (parere) ad menses dnodecim, et (R. Tosphoah) eam feminam cas- »tam declarabat. (Judicavit R. Tosphoah) nti Rabbi, »qui dixit: potest infans diutius apud matrem manere; »et quia R. Schimeon, filius R. Gamaliëlis, etiam »judicat, morari (in utero) quidem posse (infantem), »R. Tosphoah secundum plurimorum consensum egit."

13) *Handbuch der gerichtlichen Medicin*, Ed. Xa, § 523.

Auctor vero libri de *Natura pueri* partum serotinum in dubium vocat 14): licet ille libri pseudo-Hippocratici de *Diaeta* 15), uti et Aristoteles 16) et Plinius 17) eum non negent. Nonnulli, qui recentiore tempore hac de materia egerunt, illique fidem habent, graviditatem multo diuturniorem quam quidem veteres agnoscunt 18).

Denique hoc loco memorare oportet discussionem quamdam valde confusam de »infante diu morante in vestibulo," qui casus in *Jevammoth*, fol. 71 b. sequentem controversiam excitavit. »A quonam die incipiunt 7 dies »numerari, quibus absolutis infantem circumcidere licet? »num a die illo quo natus est, vel a die illo quo infans a morbo convaluit?" Conclusio est: »dies, quo

*De infante
diu morante
in vestibulo.*

14) »At vero, si quae ultra decem menses, utero gestare »sibi visae sunt (quod jam saepe audivi) esse hoc, quem referam »modo fallunt." (Hipp. *Opp. F. Sect. III. p. 26*). Explicatur, talibus mulieribus menstrua fuisse suppressa, et flatus in utero adfuisse.

15) »Non autem in aequali temporis spatio omnes foetus exoriantur, sed alii citius alii tardius." *Lib. I. pag. 19.*

16) »Reliqua animantia omnia uno modo partum perficiunt, »unus enim omnibus praefixus est partus terminus; soli vero »homini, ex animantium numero multi. Etenim et septimestres »et nonimestres eduntur infantes et ut plurimum decimestres: »quaedam vero undecimo quoque mense pariunt." *Hist. animal. Lib. VII. C. IV.*

17) »Massurius auctor est: L. Papyrium Praetorem, secundo »haerede lege agente, bonorum possessionem, contra eum dedisse, cum mater partum se XIII mensibus diceret tulisse, quoniam nullum certum tempus pariendi statutum videretur." *Hist. Natural. Lib. VII. C. 5.*

18) Conf. H. M. Serinierius. *Spec. med. for. inaug. de partu scrotino. Groningae 1841.*

»convalescit, habetur dies nativitatis." Casus dein proponuntur, in quibus circumcisio possit retardari, quando infans neonatus morbo fuit correptus. Inter hos »R. Scharbia dixit: *V. g. quando* 1) Et jam praeterierant dies septem, antequam ceterum corpus sequeretur. Haec ex antecedentibus patent.

»*infans caput suum extra vestibulum*
 »*fecit egredi* 1). *Sed num ita vivere*
 »*potest? Didicimus enim (Nidda, fol.*
 »*30 a): »si exit in aërem mundi, clau-*
 »*sum aperitur et apertam clauditur;*
 »*si id non accidat, in vita superesse*
 »*non posset, ne horà unà quidem."*
 »*Agitur tamen hic ita: quod morbus*
 »*aegrum nutriet. Sed cujas morbus?*
 »*Si opinaremur morbum infantis, tunc*
 »*tamen debet expectare VII dies* 2).
 »*Sed minime! volumus morbum matris.*
 »*Ea modo valent* 3), *quando non eju-*
 »*laverat; sed quum quidem ejulaverit* 19),
 »*in vita superesse potest."*

Casum illum certe excogitaverunt Rabbini, sed non observaverunt eum: — insuper autem naturae non respondet: caput enim per septem dies jam haesisse in vagina, et reliquum corpus in utero, et nihilominus infantem vivum nasci, — haec sanae doctrinae sunt contraria. Singularis est explicatio, hujus diuturnae morae causam in ipso infante quaerendi; quae quidem opinio ulteriorem refutationem non postulat. Difficultatem partus a morbo quodam matris pendere, alii statuunt: — et nos,

19) Rabbini Gallici in *Tosaphoth* (ad Loc. citat.) loco עָיַל (ejulavit), legunt כְּשֶׁרָה = *adnexus*; sensus ergo tunc est: si ope funiculi umbilicalis utero materno adhuc adhaeret.

rogati quisnam potuerit esse morbus matris, qui talia efficeret? responderemus: fortasse fuit *Trismus uteri*: — iste morbus, semper vehementissimus, quavis periodo partûs oboriri potest, imo si caput jam sit in vagina et fere in exitu; sed talibus in casibus mors infantis extra omne dubium est.

CAPUT IV.

DE INFANTE EX MATRIS VENTRE EXCISO.

§ 1.

*De Legis
Regiae
applicatione
apud Tal-
mudistas.*

Rabbinoſtatuiffe, quod emortuâ matre infans non ſemper pereat, pag. 152 vidimus, et ſimul Talmudicoſ caſum afferentes, quo infans ſe movit, poſtquam mater e vita deceſſerat; hujus rei veritas jam diu ante Rabbinoſ cognita fuit, ita ut Rex Numa Pompiliuſ legem tuliffe dicatur, quae impediret quominuſ infans, adhuc vivuſ in utero matris emortuae, ſimul cum matre ſepeliretur 1). Hanc legem, nomine *Legiſ Regiae* celebratam, ad noſtra tempora omnibuſ populis ex cultiſ fuiſſe receptam, notiffimuſ eſt. Neque Rabbini illam legem ſalutarem ſilentio opprimunt: legimuſ enim in *Eirchin*, fol. 7 a.: »*Dixit R. Nachman: dixit Schemuël: femina, ſi ſedet in ſella et moritur in*

1) Lex illa ita ſonat: »*Mulier. quae. praegnanſ. mortua. ne. humator. antequam. partuſ. ei. excidatur. quei. ſecuſ. faxit. ſpei. animantiſ. cum. graviſa. occiſae. reuſ. eſtod.*» (Marcelluſ, Leg. 2. II. *De mortuo inferendo et de ſepulchro aedificando; Lib. XI. Tit. 3. Digetoſ.*) — Cf. Pliniuſ: *Hiſt. Natural. Lib. VII. C. 9.*

«*Sabbatho, afferunt cultrum et findunt ei abdomen et extrahunt infantem.*» Hanc operationem ex mente Rabbimorum non diu post mortem feminae esse instituendam, exinde patet, quod operationem non remittendam volunt usque ad Sabbathi finem, sed violari sinunt propter rem adeo dubiam Sabbathum, et afferunt cultrum ex loco publico in locum privatum, quod aliter licitum non est. Nam etiamsi *dubium* sit de alicujus vita, violant Sabbathum; et licet hoc in casu major adsit suspicio obitus foetus quam ejus vitae superstitis, findunt tamen abdomen matris et extrahunt foetum et violant Sabbathum. (Cf. *Maïmon. Hilch. Sabbath. C. V. Hal. 15.*). Neque hodie alia profertur doctrina, et auctores unanimi consensu statuunt, ilico post mortem instituendam esse Sectionem caesaream in gravidam certe mortuam.

§ 2.

Nullum itaque superest dubium, quin Rabbini Sectionem Caesaream in gravidas mortuas noverint et instituerint. Multo tamen gravior est quaestio, num in Talmude occurrant vestigia, quibus constat Rabbinos novisse et instituisse *Sectionem caesariam in vivam matrem*? Hanc quaestionem primus movit et confirmavit vir doct. Mansfeld, Medicus Brunsvicensis, in suo opusculo: *Ueber das Alter des Bauch- und Gebärmutter-schnitts an Lebenden; etc. Braunschweig 1824. 8vo. 24 pp.*

*Introductio
quaestionis :
Num Sectio
caesarea in
vivas Tal-
mudistis cog-
nita fuerit?*

Tanta huic rei fuit virorum doctorum sympathia, ut brevi altera exigeretur editio opusculi. Omnes fere historici omnino erant persuasi, quod ex Talmude antiquitas Sectionis caesariae in vivam multo pateret majorem, quam vulgo habebatur. Doct. L. Fulda autem in

diario Cli. von Siebold 2), anni 1826, omnia argumenta doct. Mansfeld refutare conatus est, et quidem tali successu, ut abhinc illo tempore omnes obstetricatores dictam opinionem iterum in dubium vocarent et argumentis Doct. Mansfeld omnem fere fidem abnegare coeperint. — Ad meum argumentum sane in specie pertinet hanc in rem inquirere, ut, si possim, illam dirimam quaestionem, duce veritate neutrique parti addictus

Haec ut fiant, 1) afferam et explicabo loca, in quibus est sermo de infante, qui per hanc viam abnormi natus fuit, et de matre, cui tale quid accidit; et his absolutis, 2) argumenta èt Doct. Mansfeld èt Fuldae indagabo.

§ 3.

*Inquiritur
quid sit:
"exire e
latere."*

Varia jura peculiaria tribuerunt Talmudistae infanti, qui fuit "צא דופן" = "Jotze Dofan, — quod verbotenus ita interpretandum: "qui e latere exit," — sc. e latere matris. Haec verba: "qui e latere exit," frequentissime occurrunt in Talmude; hisque praesertim et fere solis nititur doctrina de Sectione caesarea in vivam apud Talmudistas. Videamus itaque quid voluerint Rabbini hisce verbis.

*"Infans
qui e latere
exit,"
non exit a
loco quo
concepit
mater."*

Hac denominatione Rabbini partum abnormem revera intellexisse, e multis locis abunde patet, v. g. ex Tractatu *Nidda*, fol. 40 a., *Bechoroth*, fol. 19 a. aliisque. In *Nidda*, fol. 40 a. nempe Doctores Mischnici statuerunt: "Qui e latere exit, non sedent propter

1) *Beitrag zur Geschichte des Kaiserschnitts, mit besondere Beziehung auf die Schrift des Herrn Mansfeld; von Dr. L. Fulda in Offenbach, m: A. E.; von Siebold's Journal für Geburtshülfe etc. Bd VI. St. 1. p. 1-33. (Frankfurt a/m 1826).*

«*illum, dies impuritatis et dies puritatis, et non obligantur ob eum ad sacrificium.*» In Gemara hujus Mischnae Rabbini pro sua sententia ita ratiocinantur: «Dixit Lex (*Levit. XV. 2*): «femina quae concepit et peperit «filium», talis mulier debet numerare dies impuritatis «et dies puritatis, quibus absolutis, sacrificium debet «ferre; ergo haec omnia feminae sunt facienda, quae «peperit *e loco* [sic dicunt] *quo concepit*. Sed quando «infans *e latere exiit*, mulier non peperit *e loco* quo «concepit; ergo libera est omnium illorum, quae mulieris «sunt naturaliter parturientis.» — Eandem proferunt opinionem in Tractatu *Kerithoth*, fol. 7 b, ubi agunt Mischnici de feminis, quae non erant obligatae ad ferendum sacrificium; inter quas etiam recipiunt illam, cujus infans «*e latere exiit*.” Ratio hujus sententiae hoc quoque in loco est: «donec peperit *e loco* quo concepit: (ר עד שחלר ממקום שמוציא).

§ 4.

Infans, qui *e latere exit*, per orificium uteri non transit: id elucet, quod ad bestias mundas, ex Mischna in Tractatu *Bechoroth*, fol. 19 a., ubi sequentia leguntur. «*Qui e latere exit et qui post eum venit: R. Tarfon dicit: ambo pascant donec oriatur in iis defectum et edantur a dominis ob eorum defectus.*» R. Akiba dicit: *uterque non est primogenitus; prior (non). quia uterum non aperuit, et alter (non), quia prior ei praecessit*” 3). De foetu humano idem

«*Qui e latere exit,*»
non nascitur
«*Vagina.*»

3) R. Akiba et R. Tarfon aequales erant: floruerunt ultimo dimidio seculi primi p. Chr. et initio Seculi II. Obiit

statuunt in eodem Tractatu fol. 47 b. in *Mischna*: „qui exit e latere, et qui post eum venit, uterque non est primogenitus, nec pro hereditate nec pro sacerdote. »R. Schimeon dicit: prior pro hereditate, et alter pro quinque Selaïm.” Ratio est iterum eadem; quia prior non aperuit uterum, et alter post priorem venit. Ex hisce aperte evictum videtur, voce illa יוצא רופן (*Jotze Dofan*), „qui e latere exit,” Rabbinos infantem designare, qui non e vagina nascitur sed trans latus (רופן) corporis materni, quod certe nullum aliud esse potest quam latus abdominis. Ergo *Jotze Dofan* est infans qui exit e latere abdominis matris.

§ 5.

*Infans exit
e latere ma-
tris quoque
viventis et
dein adhuc
superstitis*

Hac quaestione sublatâ, et posito modo quo ejusmodi infans in lucem prodeat, alteras duas ponemus quaestiones: nempe 1°. Num revera ex Talmude pateat, matrem, cujus infans fuit *Jotze Dofan*, durante illo partu vixisse et illi partui superstitem mansisse? — 2°. Num ipse *Jotze Dofan* vivus nascatur?

Quod ad priorem quaestionem: statuunt Rabbini (uti dictum est ad § 3.) feminam cujus infans fuit *Jotze Dofan*, non obligatam esse ad ferendum sacrificium, nec

R. Akiba Ao 135 p. Chr. — Ex lege Mosca (Exod. III. 12. XXXIV. 19. 20. Num. XVIII. 15. 16.) omnes primogeniti „quicumque uterum apertum” tam inter homines quam inter bruta, Deo erant sacri. Primogeniti humani quinque siccis debebant redimi, quando mensem unum fuerint nati; primogeniti bestiarum mundarum ut sacrificium Deo offerendi erant; et primogeniti immundarum redimendi vel necandi.

eam oportere numerare dies puritatis vel impuritatis 4). Si mater talem partum non supervixisset, talia praecepta Rabbinii non statuissent!

His autem majorem adjungunt fidem illa quae obveniunt in *Bechoroth*, fol. 47 b. (l. c.); si quidem hoc loco loquuntur de *Jotze Dofan*, et de infante qui post eum venit. Mater ergo partui *rov Jotze Dofan* supervixi, et sequente partu enixa est alterum infantem 5).

Hisce omnibus simul sumtis, nemo certe dubitabit, quin prorsus evictum sit e Talmude, mulierem, cujus infans e latere exiit, huic partui, aliquando saltem, supervixisse 6).

§ 6.

Quod ad alteram quaestionem, quae vitam spectat ipsius infantis: Rabbinii, uti diximus, tali infanti abne-
gant jura primogeniti, pro facultate hereditatem acci-
Jotze Do-
fan ipse
quoque vi-
vus nasci-
tur.

4) *Nidda*, 40 a. *Mischna*: «qui e latere exit: non sedent prop-
ter illum dies impuritatis et dies puritatis, et non obligantur ob
»eum ad sacrificium.» — *Kerithoth* 7 a, *Mischna*. «Et cae sunt
»quae non ferunt sacrificium qui e latere exiit.»

5) Dubia, quibus haec interpretatio premitur refutata invenies
sequentibus.

6) *Baal Aruch* vero, *Raschii* aequalis, *Jotze Dofan*
sequenti modo interpretatur: citat 1) locos nonnullos, et dein
ita pergit: «Explicatur: si femina fuerit gravida et mortua sit,
»et infans vivat, finduat feminae abdomen et exit (infans).»
Rem etiam obiter intuenti mox patebit, *Baal Aruch* maxime
errasse, dicentem «feminam cujus abdomen fuit fissum, ante
»operationem jam fuisse mortuam,» id quod mirandum, quia
nonnisi illa loca affert, quae procul omni dubio probant, feminam
etiam post operationem vitam servasse, uti supra probavi.

piendi (*Bechoroth*, 47 a. ; — nonnulli eorum potius stantunt (*Sabbath*, 135 a.), circumcisionem tali infanti *mox* esse instituendam, alii contrariam foveant sententiam. Ex iis jam concludere possumus, aliquando ipsum „Jotze Dofan” vivum nasci; quibus accedunt verba sequentia, quae *Menachoth* (fol. 6 a.) dicuntur: „יצא דופן יכיר שלא: עשה בו מקריבין כקריבין”, „*Qui (homo) e latere exit, testatur, sacrificantes (sacerdotes) non esse uti sacrificanda (bestias),*” — i. e. non licet sacrificare bestiae mundae pullum, qui e latere exierit; sacerdoti vero qui e latere exierit (qui fuit *Jotze Dofan*), licet cultui praeesse. — Et sic igitur affirmare quoque debemus, Talmud nobis praecepta tradidisse, e quibus luce clarius constat *infantem qui e latere exit, vivum nasci posse, et aliquando ita natum esse.*

Hisce quaestionibus itaque sublati, ad alteram quaestionem multo sane graviolem pervenimus. Superest enim in rationem et modum inquirere, quibus infans e latere matris exierit.

§ 7.

Ex iisquae de Talmudis confectione et argumento *De modo quo infans ex latere* antea disserui, satis potest colligi, quare nullibi in

Talmude obveniat descriptio, illustrens nascendi modum infantis *Jotze Dofan*. Loquuntur ubicumque Rabini de *Jotze Dofan*¹, rei omnibus pernotae adinstar; et Compiler Talmudis non praevidit, quod hoc de verbo tantae dein exorirentur lites, quanta exortae sunt quum temporum vicissitudine significatio vera hujus vocis oblivioni completae fuerit tradita. Nobis itaque nil superest nisi confugere ad illos viros, qui aetati confectionis Tal-

nudis propiores fuerunt quam nos sumus. Audiamus ergo commentatores veteriores.

Raschi, cui jure merito maxima fides tribuitur, ad verbum „*Jotze Dofan*” (v. g. in *Nidda*, fol. 40 a.) notat: »Aperiebantur intestina ejus (mulieris) ope *Sam* (סם), et »eduxerunt foetum foras, et sanabatur (femina);” quibus verbis Bartenora quoque hunc locum explicat. In Tractatu *Chulin*, fol. 69 b. 7) Raschi *ר"י* *Sam* quoque addit »cultrum” (כקץ); ergo èt *Sam* èt *cultro* inciderunt abdomen mulieris.

Licet praeclarus Raschi certe haec non dixerit sine jure, nostrum tamen est inquirere num commentatio Raschii cum mente Talmudis conveniat, nec ne? Est igitur quaestio, num ex ipso Talmude aperte pateat, ope illius »*Sam*” operationes fuisse institutas.

In Tractatu *Avodah Sarah*, fol. 28 b. sequentia legimus verba: »Adducere faciunt aures in Sabbatho. »R. Schemuel, filius R. Jehudae docuit: manu quidem

7) In illo loco disputant, num pullus bestiae mundaе cujus una tertia pars trans latus exiit, et alterae duae tertiae partes per vaginam, num talis bestia sancta, tanquam primogenita, sit habenda nec ne? — Videtur casus fictus, et hic modo allatus ut inserviret ad judicandam et illustrandam Mischuam, quae de membris pulli in utero matris dissecatis agit, num illa singula membra sacra sint vel profana. — Potest casus ille obvenisse, quod foetus, v. g. nimis magni voluminis, jam satis profunde in pelvis descenderit, sed tunc ob nimis magnum volumen exire non valebat, ille in re pullum pro parte e latere eduxerunt, et tunc altera pars, foetus volumine ergo diminuto, facilius potuit educi. — Haec non tam absurda essent ex mente scientiae obstetriciae illius temporis: quibus accedunt, quod hic loci modo de pullo bestiarum agitur, dum de humano foetu nullibi tale quid memoratur.

«sed non per *rô Sam*. Quenam est ratio eorum,
 «qui dicant per *rô Sam* quidem sed non per manum?
 «quia illa (manus) facit incisiones.” Illud «*Sam*” dolores
 fere nullos creare, patet ex Tractatu *Baba Kama* (fol.
 85 a.). «Aestimant, quantum homo expendere vellet
 «ut manus, quae ab imperio proscripta, amputaretur vel
 «per *rô Sam* vel gladium?” Explicat Raschi
 ita hunc locum: quantum homo, cujus manus a rege est
 proscripta, vellet expendere, ut manus amputaretur per
rô Sam, quod non dolet, loco gladii. Videmus his ex
 locis, Rabbiniis revera fuisse cognitum medicamentum
 quoddam, quo praeter cultrum in Chirurgia utebantur 7).
 Videtur tamen *Sam* solum non sufficisse: — postquam
 enim per aliquod tempus loco incidendo fuerit impositum,
rô Sam iterum auferebatur et scalpello ceterae partes

8) *Sam* cum atrimento, quocum scripserunt commiscebant Rabi-
 bini (*Sabbath*, 104 b.). Baal Aruch et Raschi illud auripig-
 mentum interpretantur. Benjamin Mussaphia vero scribit in
 Additamentis ad Aruch, שם esse 1° terram Samensem, ejus
 species quaedam valde utilis erat in morbis oculorum; vel 2° me-
 dicamentum, pharmakon, tam bonum quam malum — De vi
 medica Terrae ex insula Samia, Cf. Oribasius, *Medic.*
Collect. Lib. XIII. Litt. F.; Aëtii *Tetrabibl.* I. Sermo II,
Cap. VI Paulus Aegineta: *De re medica* Lib. VII. Litt.
 F. Utebantur veteres hac terrâ pro ulceribus phagelaeicis et ad
 haemorrhagias sistendas, praecipue ex utero. Pollebat virtute
 exsiccante et refrigerante. — In multis quoque locis Talmudicis
Sam significat *Aroma*, *Venenum*, *Toxicon*; sic in *Nidda* (30 b.)
 narrant de שם הנפצא, de veneno quodam quod abortum efficiat,
 et vulgaria sunt verba שם המות et שם החיים = *Pharmakon lethale*
 et *Pharmakon vitale*. — Errat vero Doct. Mansfeld, quando
 voce *Sam* intelligendum censet *instrumentum* quoddam nobis in-
 cognitum (*l. c.* p. 24).

dissecabantur; forsân ut citius absolveretur operatio, vel etiam quia timebant, ne medicamentum in ipsum abdomen intraret ibique noxas crearet.

Vetustiores commentatores de „*Sam*” semper faciunt mentionem; juniores vero de illo medicamento silent, et Maimonides solummodo cultri ope latus matris apertum dicit 9). Omnes Talmudis explicatores et commentatores qui post eum surgebant, uno quasi ore testantur abdomen mulieris fuisse fissum vel (uti Raschi perhibet) ope medicamentorum et scalpelli, vel scalpelli solius (uti volunt Maimonides et Baal Aruch).

Sententia ergo nostra de modo, quo infans e latere matris exierit, fundamentis satis firmis videtur niti, et hinc errare mihi non videor, si statuam, talem infantem ex abdomine matris fuisse eductum duabus methodis; quarum prior eo constitit, quod, partibus externis medicamento quodam (*Sam*) antea dissolutis, subjacentes partes quae supererant, cultro dissecabantur; et altera, quod, omisso hoc remedio, statim scalpelli ope dissecabantur partes.

§ 8.

Superest adhuc dubium, sc. num quidem *uterus* Hicquidam non parit
aperiretur hoc est, num vera fuerit *Gastro-hystenotomia*, Gastro
quâ infans *Jotze Dofan* in lucem prodit? hystenotomia, quâ
Locus sequens Jotze Dofan; eductus.
in *Nidda*, fol. 41 a. et b., hanc in rem aliquam lucem

9) Maimonides ad *Nidda* Cap. V. *Mischna* I. „*Jotze Dofan*: i. e. quando mulier difficulter parit, lumbi feminae finduntur et infans ex eo loco exit.” Ad *Bechoroth*, Cap. II. *Mischna* XI. „*Jotze Dofan*: finduntur hypochondria bestiae, et exit exinde pullus; et faciunt illud uti in femina quae difficulter parit et ad portas mortis pervenit.”

spargit. Legimus ibi: „*Docuerunt Rabbini; mulier, quae per tres dies difficultates ad partum sensit, et infans exit per viam lateris, illa est parturiens fluens; sed R. Schimeon dicit, illa non est parturiens fluens; et sanguis, qui ex hoc loco (ex latere) prodit, est immundus.*” Ratio sapientum est; ut infans exeuns e latere non sit verus infans, neque partus talis sit partus vernus; et infans haemorrhagiam, quae durante partu obtinet, puram reddere non valeat. R. Schimeon autem illum infantem partum habet verum, et ergo contraria sapientum statuit (Raschi). Deinde disputatur de sanguine qui ex latere venit, sc. num mundus sit, nec ne? In discutienda hac re, duae ponuntur Theses, 1) *»sanguis venit ex utero (per vias naturales) et infans per viam lateris exit.*” Hanc autem Thesin praeterimus, et ad alteram transimus, quae ita exponitur: 2) *»Sed dixit R. Joseph: (non est quaestio, quod sanguis e vagina profluat et infans per latus prodeat), sed est (quaestio, de casu) quo et infans et sanguis per viam lateris exeunt; et (nunc) disputant: num uterus loco suo sit immundus, (nec ne)? Unus opinatur, uterus loco suo est immundus; et alter opinatur, uterus loco suo est mundus.*” Haec verba ita sunt interpretanda: nonnulli dicunt, sanguinem ex latere profluentem esse impurum, quia ex utero (partim) venit. et omne quod attigerit uterum vel quod ex utero proveniat, ex nonnullorum opinione est immundum; alii vero contrariam defendunt opinionem. Decisio autem ita est: *sanguis ex latere veniens est immundus; femina e contrario non est polluta ob partum; nam nulla mulier polluta est nisi sanguis veniat per viam pudendorum.*” (Ib. Ib. Vid. Maimon. Hilchoth. Iss. Biah. Cap. X, Hal. 5.).

Hoc ex loco itaque argumentum hauriendum esse creda, quod testatur *uterum* fuisse incisum sectione abdominis illa Rabbinica. Agunt nimirum Rabbini loco allato 1) de utero, et 2) dicunt, sanguinem e latere hoc in casu venientem, esse *immundum*. Ex ipsis verbis expressis igitur patet, uterum ipsum hic fuisse apertum; quomodo enim disputatio exsurgere potuisset, loco citato, de *utero*, «qui loco suo est *immundus*,” nisi id sit verum? Et dein cogitandum est, sanguinis naturam *immundam* insuper probare, quod ille ex *utero* per vulnus foras penetraverat. Hinc statuo, *interdum saltem fuisse rem gastero-hysterotomiam, quâ infans Jotze Dofan nascebatur*.

Regio abdominis, quam incidere solebant Rabbini in instituenda gastero-hysterotomia, cero et ex veritate definiiri nequit. Verbum ריבון autem *latus* significat et parietem: igitur videri posset operatio instituta *sectione laterali*, verum etiam *sectione parietum abdominis* in universum. Omni casu autem nimis temera et definita est sententia doct. Mansfeld, qui statuit, incisionem eo tempore in *Linea alba* fuisse institutam.

Atque haec sufficiant ut probarem veritatem theses, quam sequentibus verbis propono: *Talmudistae, ubi agunt de „Jotze Dofan” (infante ex latere matris exeunte), sufficientia documenta reliquerunt, ut nobis sit persuasum: 1) iis gastro-hysterotomiam in vivas bene fuisse cognitam; — 2) ea operatione aliquando infantem vivum fuisse eductum, — et 3) feminam nonnumquam huic operationi supervixisse.*

*Conclusio ex
praecedenti-
bus*

§ 9.

*Inquiruntur
argumenta
doct. Ful-
dae, qui
gastro-hys-
terotomiam
in vivas cogni-
tionem Tal-
mudicis ab-
neget.* Audiamus hunc et alteram partem, et videamus
quantum aestimanda sint argumenta, quibus doct. Fulda
usus sit, quum gastro-hysterotomiae in vivas mentionem
in Talmude negaverit. Omissis omnibus quae ad rem
ipsam non pertinent, paucis contraham refutationem doc-
trinae doct. Fuldae.

Primum argumentum viri doctissimi illud est, quod
nullibi in Talmude mentio sit factae talis ope-
rationis, dum Talmudici ubicumque enumerare solent
acta, si iis praesto sunt. Concedo: nullibi in toto
Talmude inveniri narrationem de *facta* sectione cae-
sarea in vivam; — sed enarratio facti alicujus tum ali-
quando obtinet, ubi de casu quodam rariore est quaes-
tio 9). Neque mirum; nam tales res rariores indigent
ulteriore confirmatione: — res autem omnibus rei peritis
notae, factis non indigent ut earum fides pateat. Si
itaque in Talmude deberemus negare Sectionem caesa-
ream in vivas, quoniam nullum factum in hoc opere
narratur, sed tantummodo fit mentio de eâ ut de opera-
tione satis vulgari locis saepius supra citatis, — id quod
nemini mirum videri potest, qui cogitet, Talmud non
esse collectionem casuum medicinalium, sed tantummodo
corpus juris medicinae quoque superstructum, — si
(inquam) hoc facere vellem aut deberem, tunc quo-
que cognitionem Embryotomiae in Talmude negare de-
berem, quia non magis facta Embryotomiae Talmud
offert. Num autem quis existentiam omnium istorum

9) V. g. in *Nidda*, 45 a. 32 a. 66 a., *Ketub. fol. 10 b.* et
sic pluries; sed sunt omnes casus rariores qui plerique his locis
modo obveniunt. Hoc testantur ea quae de retentione placentae
dicuntur *Nidda*, fol. 26 b. et de superfoetatione *Ib. fol. 27 a.* cet.

supellectilium negare vellet, quae Rabbinī in Tractatu *Kelim* memorant, quae vero amplā descriptione carent. quare nunc multa horum nobis sunt ignota? Num porro quis omnes illos morbos haberet fictitios, qui in *Gittin*, fol 69 sqq. nominantur? et quidem hac sola ex causa, quod historia morbi vel observatio adnexa non sit? Certe nemo ita aget! Ratio tamen, qua circa *Jotze Dojan* nullum factum in Talmude obveniat, quaerenda videtur sive in ipsius negotii familiaritate, — quod nempe omnibus Rabbinis fuit ita notum, ut necessarium non judicaverit Compiler Talmudis huic denominationi ulteriorem adjungere explicationem, — sive, quod melius videtur, in ipsius rei raritate, quā Talmudistae varii temporis eosdem forsitan casus in mentem habent, ubi de tali partu deque ejus juribus est quaestio. — Qui priorem sententiam defendunt, perhibere possent, Talmudistis statuentibus praeceptum circa aliquam rem, non semper facta adducenda fuisse, ut elucesceret fides fundamentorum, quibus tale praeceptum talisve Lex nititur: — sed si Talmudici praecipunt quid ob casum aliquem rariorem, tunc veritatis stabiliendae causā factum unum alterumve fundamentale adducunt, — uti supra plurimis in locis vidimus, v. g. ubi quaestio erat de Placentae retentione, de partu serotino, cet.

§ 10.

Non minus grave primo intuitu videtur alterum argumentum, quo doct. Mansfeld et Fulda, uterque pro sua thesi, usi sunt. Sed nec unus, nec alter sequentem locum bene intellexisse videtur. Locus, quem volo, est Mischnah supra jam allata, quae obvenit in *Bechoroth*, fol. 47 b., quaeque ita sonat: « Qui exit e latere et qui post eum venit, uterque non est primogenitus (מיצא דופן והבא) »

*Continuatio
judicii-
nis opinio-
num doctt.
Mansfeld
et Fuldae,
quod ad
Mischnam in
Bechor. fol.
47 b.*

» (אחריו שניהן א'נן בכור וכו') *nec pro hereditate nec pro sacerdot.* R. Schimeon dicit: *primus pro haereditate et secundus pro quinque Selaïm* " Ambo viri, jurantes in verba magistri Maimonidis, ex verbis illis » *qui post eum venit* " opinati sunt hoc loco esse sermonem de partu gemellorum, quorum unus per abdomen incisum matris exiit, alter per viam naturalem. Doct. Mansfeld (*l. c.* p. 18.), verba non stricte interpretans, sine ulla ratione ideo locum citatum ita vertit: » *Bei einer Zwillingsgeburt könne weder das erste Kind, welches durch den Wundeschnitt zur Welt gebracht werde, noch das nachherkommende das Recht der Erstgeburt, weder beim Priesteramte noch beim Erben erhalten.* " Ex interpretatione meâ, quae stricte ad textum est facta, luculenter patet Mansfeldii interpretationem esse falsam. Recte ergo jam monuit doct. Fulda, verba » *Bei einer Zwillingsgeburt* " nullibi in textu esse scripta; et summo jure Mansfeldium vituperat, qui Talmudistis absurdam adscribit agendi methodum, quod sc. factâ Sectione caesareâ in partu geminorum, unum infantem modo per vulnus educerent, alterum vero intactum in utero relinquerent, ut is per viam naturalem nasceretur. — Licet ergo jure refutet doctissimum Mansfeld, vir doct. Fulda etiam graviter errat, quum exinde argumentum petat, quod *nemini Talmudistarum fuerit perspicua idea Sc. Cæ. in vivas, quemadmodum commentatores rem adeo confunderent, ut exinde nil redundet ad existentiam probatam hujus operationis.* Conclusio talis autem longissime a veritate distat; siquidem, — ut inter multa unum modo exemplum afferam, — eodem jure negare possemus, Ammonium Lithotomum non ignorasse *Lithotripsiam*,

quae nostris diebus, uti inmerito vulgo credunt, inventa esset; — quoniam omnes commentatores et compilatores medii aevi nostrique temporis usque ad doct. Heurteloup cet. sive rem plane praeteriverunt, sive verba Celsi confuderunt cum vulgari *Lithotomiâ*.

§ 11.

Dixi doctt. Mansfeld et Fulda errasse, quia ^{Maimonidis sententia de Mischna allata, refutatur.} verba Maimonidis sua fecerunt. Videamus itaque primo loco verba ipsius Maïmonidis, quae dein illustrabo, respectu habito *et* ad textum ipsius Talmudis, *et* ad historiam sectionis Caesareae.

Maïmonides Mischnae allatae haec addit: »Quid »de eo (casu) cogitari possit, illud est: quod femina sit »gravidâ duobus infantibus, et finditur ejus latus, et exiit »unus eorum (per latus) et postea secundus exiit, uti vulgo »solet (per vaginam); et mortua est (femina), postquam »exiit secundus. — Sed quod dicunt nonnulli, feminam »vivere postquam findebant ejus latus, et illam iterum »gravidam fieri et parere, horum nescio rationem et est »argumentum valde absurdum."

Haec Maïmonidis verba duplici modo interpretari possumus: Maïmonides dicit, *nonnulli verba Talmudis ad locum citatum ita explicant*, quod statuunt feminam priorem infantem in lucem edidisse per S^m Cam, alterum vero infantem, subsequente graviditate genitum, per vaginam.

2) Sive Maïmonides dicit, — et illa explicatio melius mihi videtur responderè verbis auctoris, — *nonnulli statuunt*, — in universum, respectu non habito ad locum citatum Talmudis, — *feminam vivere* (ה'ח)

aliquando post partum Sectione Caesareâ terminatum, et sequente graviditate edere infantem per vias naturales. Quidquid autem sit, omni casu ex his verbis redundat, ante Maïmonidem (qui floruit seculo XII^o) fuisse nonnullos, — et Talmudistas ita docuisse, audivimus supra, — qui statuerint feminam aliquando partu normali eniti infantem, quae anteriore partu Sectione Caesareâ liberata fuit. Priore casu autem res forsitan magis theoretice, posteriore casu potius de facto est defensa. —

Ut nunc clarius pateat, Talmud (loco citato) revera agere de *secunda* graviditate, et de *secundo* partu, et non de altero infante unius ejusdemque partûs, ipsam Mischnam paullo fusius explicare lubet.

Mischnici quando dicunt והבא אחריו = *qui post eum venit*, aperte tantum loquuntur de quodam infante qui *postea* venit, scilicet altero partu subsequente. Hujus nostrae opinionis fidem facit prior ejusdem Mischnae pars: habemus enim ibi: *Quae abortit molam, plenam aquae, plenam sanguinis, plenum colorum, quae abortitur species piscium, locustarum, reptilium et vermium* והכפלה ליום ארבעים הנא אחריהם בכור לנחלה ולכהן *et quae abortitur die XL^o. (graviditatis), qui post ea venit est primogenitus pro hereditate et pro sacerdote.* His in casibus, et praecipue in ultimo casu, abortûs dierum XL, nemo certe agi videbit de femina, simul cum illo abortu quadraginta dierum, infantem vitalem in lucem proferente! Sic quoque locus praesto est in *Baba Bathra, fol. III b.*, qui ita sanat: qui post abortum *venit, illum esse primogenitum pro hereditate* (constat); *nam ob eum cor ei (patri) dolet* (si forte obeat), *excepto illo (abortu) propter quem cor ei (patri) non*

»dolet 10). Videmus ergo, hoc quoque loco iisdem verbis „*qui post venit*” usos esse Talmudistas, et quidem eodem sensu.

Hisce nunc perpensis, non errare mihi videor si statuam, quaestionem in nostra Mischna ita esse dirigendam: num infanti, quem femina quaedam per vias naturales enixa est, quaeque priore in partu infantem *per latera* peperit, — num tali infanti omnia tribuenda sint jura primogeniti, nec ne? Maïmonidi talis explicatio profecto non placuit, quia ex rationibus certe theoreticis credere non poterat, feminam tali operationi non solum posse supervivere, verum etiam in sequente partu infantem per vias naturales in lucem edere. Statuit quoque »feminam mox post illum suppositum gemellorum partum mori;” quod non solum ex ipsa Mischna non patet, sed cujus rei insuper in toto Talmude exemplum non invenitur.

Haec satis dicta sint, quod attinet ad textum ipsius Talmudis.

Historia artis obstetriciae comprobatur nostram sententiam, feminam Sectioni Caesareae supervivere posse, Maïmonidisque doctrinam esse falsam: — nostra enim aetate plures casus innotuerunt feminarum, quae non solum huic operationi superstites mauserunt, verum etiam exstant in quibus una eademque femina ter, imo quinquies, Sectionem Caesaream passa est. (*Vid. Busch und Moser. l. c. III. p. 92. 93.*)

Altera tamen positio, quam ex Talmude hausimus, feminam scilicet quae Sectioni Caesareae supervixerat, in secundo partu infantem vivum posse parere *per vaginam*, haec certe valde absurda et vana foret, si secun-

10) Sic quoque in *Bechoroth*, in Mischna supra allata, fol 19 a.

dum hodiernas artis nostrae indicationes Sectionis Caesareae in vivas dijudicari deberet. Verumtamen, si in mentem adscribamus indicationes, quibus prioribus seculis post suppositam inventionem Sectionis Caesareae in vivas instituebatur haec operatio, tale quid saepe accidisse non mirum est. Et revera indicationes Sectionis Caesareae in vivas, quas v. c. Rousset, primus Suis Cae summus fautor, posuit, facile ansam dare debebant casibus, hodie vix obtinendis, antea vero frequentibus, feminam naturali partu edidisse foetum, quae jam antea Sectionem Caesaream subierat 11). A tempore enim

11) Franciscus Rousset sequentes posuit indicationes Sectionis Caesareae in vivas, in suo opusculo: *Τατρηγοτόμοτοκία. Seu de partu Caesareo Tractatus. Gallice conscriptus, labore et studio Caspari Bauhini, Medicinae Doctoris et Professoris Latinitate donatus. Recusus in Spachii: Gynaeciorum p. 448 sqq.* »Causae naturalem foetus exclusionem impediētes, hancque incisionem necessarie reddentes plures atque diversae sunt, vel enim in infantem vel in matrem referendae. Ratione quidem infantis, si nimis crassus, magnusve, vel gemini aut plures sint, qui una exitum quaerant, aut si mola carnea sit conjuncta, aut monstrum, aut si situ non convenienti prodeat, ita ut nec sui ipsius, nec aliorum ope in pristinum melioremve situm reduci possit. Vel si mortuus sibi ipsi, uti par esset, auxilio esse non possit, vel tandem, si adeo intumuerit, ut ipsi per viam consuetam exitus non detur. Ratione vero matris, si forte via per quam foetus excludi debet, sit quam oporteat angustior, id quod variis de causis usu venit." »Si forte statim a nativitate vel in sinu vel in collo vel in fundo uteri, aliquod sit obstaculum," et porro »sub hoc etiam intelligimus vitium tale, quod mulieri post nativitatem contingere potest, ut si forte ulcere uteri aut cervicis ejus laborarit, ut hac ratione cicatricem aut callum contraxerit." (In Cap. III. »quae causae partus naturalis ad hujus Sectionis Caesareae necessitatem nos impellant"). — Doct.

Rousseti inde operationis frequentia in vivas ita increvit, ut, testante Scipione Mercurio, suo tempore in Gallia tam generaliter fuerit cognita, quam in Italia Venaesectio in Cephalaeam (Osiander, *Pragmatische Geschichte der Entbindungskunst*, pag. 147). Non rari itaque seriori tempore fuerunt casus, quales in Talmude describuntur 12).

Ex his omnibus allatis, quaeque nemo facile in dubium vocabit, eodem jure statuere auderem, tempore jam Talmudicorum indicationes Sectiones Caesareae in vivas vix alias fuisse, ac illae, quae multa secula serius defendebantur.

§ 12.

Neque cum doct. Fulda tam singulare habeo, in Talmude semper sermonem esse de *producto* partus, nullibi *Aliud argumentum doct. Fuldae refutatur.*

Simon testatur, in ipsa seculi XVIII. priore dimidia parte, indicationes non inulto fuisse meliores; omnes nempe causas, quas auctores ante eum pro illa operatione attulerant, fuisse easdem quas Roussetus jam posuerat. *Mémoires de l'Acad. de Chirurg.* 1753. T. I. p. 648.

12) Ipse Bauhinus in appendice ad opus Rousseti adjunxit casum cognito Nufferi, et narrat: »Eadem enim post chancee τόμοτοξίαν, secundo gemellos enixa est, et post hos »gemellos quatuor alios liberos peperit.” et non sine jure cl. Ed. von Siebold statuisset mihi videtur, illam primam graviditatem fuisse extrauterinam, quia etiam de sectione uteri ibi non fit mentio. Refert quoque Rousset (l. c. p. 451.) in historia II. historiarum ab ipsomet visarum, quod femina de quo illo loco agitur, in secundois nuptiis »rursus concepit et feliciter, »naturali modo, filiam enixa.” Ita etiam in historia III. »dein »biennio post filiolum commode enixa et altero postmodum biennio »filium, cui nomen erat Petro de la Garde peperit,” et in historia V. »post modum rursus gravida reddita, naturali modo »foetum enixa est.”

autem de *femina, cui abdomen fuerit apertum*. Vidimus enim omnibus locis quibus in Talmude partûs negotium illustratur, seniper tribui partem multo magis activam infanti, quam ipsi parturienti. Omnia quae de partu normali et abnormi supra dixi, abunde id probant.

§ 13.

*Tertium argumentum
ejusdem riji-
entor.*

Nullomodo consentire vellem doct^o. Fuldae, Sectionem Caesaream in vivas non respondere menti Rabbino-
rum, quia vitam infantis nihili aestimarent, si cum vita
matris collidat. (Fulda *l. c. p.* 28 *sq.*). Argumentum
hujus thesisi inprimis ex ea Mischna in *Oholoth VIIb.*
petit auctor, ubi "Talmud perforationem infantis vivi ju-
beret, quia foetus in utero nondum est *Nephesch*." Vir
doct. itaque statuit, ideo Sectionem Caesaream in vivas
non respondere menti Talmudicorum, quoniam semper
infantem necaverunt, ubi quaestio fuit de salute sive
matris, sive infantis.

Si autem illas Talmudistarum rationes in memoriam
revocemus, quibus duceantur ad foetum in utero materno
interficiendum, quaeque supra attuli (Vid. p. 143 *sq.*),
quisquis certe mecum consentiet, hanc quaestionem non
ita dijudicandam esse, uti doct. Fulda opinatus est.
Nam si vitam infantis parvi habuissent Rabbini, nonne
tunc jam citius infantem dissecassent in utero, antequam
casus tam desperatus evasisset, ut metus oboriretur
quoque de vitâ ipsius matris? Nonne multi adhuc hodie
sunt, qui tali in casu vitam matris vitae infantis ante-
ponant? Et crederemus ergo ex mente hodiernorum non
esse Sectionem Caesaream in vivas? Et quisnam argu-
mento illo uteretur, quo probaret Gastero-hysterotomiam

in vivas ex mente nostrae aetatis non esse, quia infantem in utero non tanti habent quam infantem natum; quemadmodum omnes fere legislatores hodierni eam mitiori poenâ mulctari velint, quae infantem in utero necaverit, quam quae infantem natum occiderit! Et nunc rogo, num Talmudistae vitam infantis in utero tam parvi habuerint, quam doct. Fulda perhibet? Sunt sane quae contrarium nos doceant. Si enim foetum in utero nihili aestimarent, quare Sabbathum violandum jubent, et pollutioni cadaveris se exposuerunt aliaque praecepta religiosa sibi sacra transgressi sunt Talmudistae, quum applicarent Legem Regiam die Sabbatho, — nisi fuerit solus scopus ut, emortuâ matre, vita foetus servaretur, quam (uti vidimus) tali casu maxime dubiam habuerunt? Et licet hac de vita valdequam dubitassent, nihilominus tamen expressis verbis admonent, feminae mortuae abdomen aperire, ne rei essent necis infantis, quem forsan servare potuissent! Vitam talis foetus (Cf. eund locum) aequiparant vitae dubiae alicujus hominis adulti, qui in Sabbatho subito lapsu lapidum plectebatur. (Vid. *Eirchin*, fol. 7 a. et b.) 13).

13) Neque cum veritate conveniunt, quae Fulda insuper affert ad demonstrandum quam minimi habuerint Rabbini vitam foetus. Dicit, Talmudistas statuisse necem infantis morte non mulctari, nisi vixisset *sa tem unum diem*. Haec nullibi in *Sanhedrin*, fol. 5^o. legitur, — doct. Fulda autem hunc locum affert; — sed in *Mischna*, in Tractatu *Nidda*, fol. 44 a legitur: *„qui necat infantem minus diei, reus est.”* Addit Gemara huic *Mischnae*: *„quia scriptum est: et aliquis qui necat omne Nephesh”* ergo qui necat *Nephesh* mortis est damnandus. Et quum infans, cujus caput in vagina (in exitu) est, *Nephesh* jam habetur, ille quoque capitis erit damnandus, qui infantem, *cujus caput in exitu est*, necat. Ergo hoc etiam argumentum cadat, necesse est.

*Talmudistae
non valde
periculosam
habuerunt
operationem.*

Si porro cogitemus, — uti supra dixi. — quanam indicationes Rabbinos fortasse impulerint ad instituendam Sectionem Caesaream in vivas, num tunc quidem suspirari possumus, illam operationem a Talmudistis tam periculosam fuisse habitam, quam nos hodie eam habemus? Ex differentia enim quae exstat inter indicationes veterum et hodiernorum, prognosis operationis diversa facile explicatur, et faustior debuit esse prognosis veterum; — quae omnia è Mansfeld è Fulda in censum non adscripserunt. Ambo igitur erravisse mihi videntur quum Sectionem Caesaream Rabbinicam judicaverint secundum scientiam hodiernam, quae indicationes hujus operationis tantopere restrinxit.

Aliud argumentum, quo patet Rabbinos tales operationes graves non habuisse lethales, petitur ex iis, quae supra, pag. 43, § 4 narraui (ex Tractatu *Bechoroth*) quaeque ad rem veterinariam pertinent: — eo loco agitur de vaccis et suis; et ex similitudine quam quaesiverunt quoque Rabbinii inter viscera humana et suilla, certe debuerunt opinari aequalem operationis effectum in humanum genus eamque satis tuto institui posse 14).

Neque omnes Rabbinii inter se consenserunt in termino quo infans natus abortivus habetur; quia propter talem infantem signa omnia tristitia non peragenda sunt. (Vid. *Nidda*, fol. 44 b.)

14) Ob similitudinem inter viscera hominis et suis, nonnulli perjuraverunt, si epidemia inter suos grassaretur; timentes, ne ob illam similitudinem talis epidemia humanum genus quoque infestaret. Cf. Tractatus *Taanith*, fol. 21 b.

§ 15.

Ipse autem Fulda tandem Mansfeldio assentitur „Rabbinos quidem aliquam ideam habuisse Sectionis „Caesareae in vivas:” credit vero, hanc ideam phantasiâ illorum virorum esse productam. Omnia vero quae hac de re profert, aperte probant ejus studium, omnibus quae modo praesto erant hypothesibus utendi, ut probaret incognitam fuisse Talmudistis Gastero-hysterotomiam in vivas. Rationes doct. Fuldae cuivis lectori Talmudis imperito, verissimae primo intuitu atque pulcherrimae videntur, et hanc ob causam plures postea ejus opinionem promulgaverunt. Concedo quidem, Rabbinos non raro nimis indulsisse phantasiae, praesertim in parte *Hagadica* Talmudis; in *Halachica* 15) autem parte parciore phantasiae floscoli observantur; et omnium minime praesertim ubi praecepta tulerunt tanti momenti, ac sunt praecepta de juriis infantis *Jotze Dojan*. Si- que ex Sectione Caesarea in mortuas ad instituendam operationem in vivas impulsu fuerint, quaestio sese offert quare in tota *Mischna* de operatione in mortuas nulla exstat mentio, dummodo semel iu *Gemara* memoratur? Praecepta e contrario quae spectant ad ipsum infantem *Jotze Dojan*, per totam *Mischnam* et *Gemaram* sunt dispersa, — ob rationes supra expositas.

§ 16.

Ex omnibus quae de quaestione nostrâ protuli, *Conclusio*, redundat sequens positio: *Revera ex Talmude evictum*

15) In parte *Hagadica* Talmudis agitur de ratiocinationibus, in *Halachica* autem de decisionibus.

est, Sectionem Caesaream in vivas non solum fuisse cognitam Rabbinis, sed eos aliquando quoque hanc instituisse operationem, et quidem, nonnunquam felici eventu èt matri èt infanti.

Minus autem elucet, quomodo post aeram Talmudistarum, posteritas istius auxilii plane fuerit oblita, licet ex hisce temporibus per totum medium aevum e gente Israëlitica tot et tanti exorti fuerint Medici. Nonne vero eadem sors fuit *Versioni in caput*, operationi obstetriciae tempore Hippocratis prae aliis omnibus cognitae et divulgatae; quaeque tamen adeo in oblivionem venit, ut seculo demum proxime praeterlapso quasi de novo debuerit inveniri et excogitari? Forsan etiam fata adversa, quibus per haec eadem secula gens Hebraea continuo plecebatur, et miseriae eam perprimentes, suas quoque hanc in rem contulerunt partes. Quod autem majoris videtur ponderis, invito permagno Hebraeorum Medicorum numero, perpauci tamen inter eos Artem obstetriciam medio aevo excoluerunt: et hinc factum erit, ut inter plura bona consilia, quae in Talmude in usum Obstetricantium continentur, praecepta quoque in oblivionem fuerint deducta, quae ad nostrum argumentum pertinent.

EPILOGUS.

Argumento hujus Dissertationis ad finem perducto, superest judicium universale ferre de iis, quae ad rem gynaecologicam spectantia in Talmude Babylonico obveniunt. In pertractandis singulis argumentis maximam eorum partem, tam ex veterum quam ex hodiernorum scientia, illustravi: nunc autem paucis inquirere oportet, num ex allatis quae in Talmude Babylonico offenduntur, gynaecologicis, ferri possit judicium, utrum hoc respectu Talmudistarum scientia aliorum veterum scientiae postponenda sit, vel anteponenda.

I. Uti mos erat apud omnes gentes antiquas omnesque medii aevi populos, imo adhuc multo serius, — sic etiam Hebraei tempore Talmudicorum in partus negotio *plerumque* Obstetricibus utebantur.

II. Exploratio partium genitalium autem saepe etiam *a viris* instituebatur; qua institutione ab omnibus antiquitatis populis divergebant, inter quos illud nunquam unice feminis erat mandatum.

III. Perpauca de Anatomia partium genitalium muliebrium in Talmude obveniunt, quae praeterea parabolico scribendi modo satis obscura sunt. Illa vero quae occurrunt, satis demonstrant, Talmudistis non parvam

fuisse scientiam harum partium. Imo mentionem faciunt nonnullarum partium, v. c. Hymenis membranae et Clitoridis, quas antecessores lere non memorant, quaeque egregie testantur, illos studio quoque ipsius naturae fuisse deditos.

IV. Non solum omnibus antecessoribus et aequalibus, verum etiam plurimis auctoribus qui tempore multo seriore eandem rem pertractarunt, antecellunt Talmudistae illis notitiis, quas nobis reliquerunt de evolutione nonnullarum embryonis humani partium, in prioribus stadiis graviditatis. Quae talia in Talmude occurrunt, e natura plerumque sunt deprompta, licet nonnulla profecto offendantur, quae observata quidem sunt sed male dijudicata. Ea vero cum omnibus veteribus communia habent, quae docent de conformatione foetus, et de vario tempore, quo haec absolvitur pro differentia sexus; nec a nonnullis discrepant medicis priscis, qui agunt de vitalitate foetus octimestris, de partibus quas sive semen virile, sive semen muliebre in efformandum foetum agit; dum notitiae appendicum foetus valde sunt vagae et obscurae, quo facto se profitentur idea clara harum partium non imbutos. — Placita quae traduntur de animatione foetus, ejus situ, nutritione et vita, pro parte demonstrant Rabbīnorum familiaritatem cum dogmatibus Romanis Graecisque.

V. Nemo certe Rabbīnis observandi diligentiam abnegabit, monstra plurima describentibus, quae ante eos a nullo alio auctore sunt memorata, quorumque magna pars nostra ipsa aetate obvenit. Nihilominus et hac in re Talmud criteria habet sui temporis.

VI. Idem fere valet de iis, quae ad molas in Talmude spectant. Neque in illis desiderantur non-

nulla, Talmudi omnino peculiaria, et a nullo antecessore vel aequali depromta; quae omnia sagacitatem Rabbiorum optime vindicant.

VII. Rabbini opinio fuit communis plurium antiquitatis gentium, quod ad progeniem multiplicem: — hinc subtilis Talmudistarum inquisitio signorum organicorum virginitatis et nubilitatis, cujus maxima pars omnino iis est propria, quaque in re eos a nemine veterum scriptorum superatos crederem. Hic et illic vero aliquae notae occurrunt, quae Graecam praecipue originem arguunt.

VIII. In iis, quae de sterilitatis symptomatibus physicis dicuntur, multa desiderantur quae ab aliis veteribus non omissa sunt.

IX. Multae sententiae sic dictae Hippocraticae et Aristotelicae correctae et amplificatae occurrunt inter illa quae de menstruatione in Talmude dicuntur. Nullus vero Medicus totius antiquitatis symptomata instantium mensium tanta veritate descripsit quam Rabbini; dum pusillam Rabbinicam investigandi methodum optime cognoscas v. g. ex variis coloribus, quos sanguini menstruo tribuunt; qua vero in re jam alii Medici iis pro parte praecesserant.

X. Licet et alii veteres multas theorias formaverint, theoriis Talmudistarum similes de conceptione et graviditate, Rabbini tamen alio modo exponunt suas sententias, multaque in his doctrinis sed non omnia, vera et propria invenies. Inter alia, eorum graviditatis computatio firmis et justis nititur fundamentis.

XI. Non multa de abortu occurrunt, et pauca Talmudistis propria sunt, exceptis forsitan quae de haemorrhagiis et de doloribus praecipiunt. Graecae eruditionis in Talmudicam doctrinam vis patet ex iis, quae de seminis effluxu docent.

XII. Ratione habita ad dignitatem argumenti, per-pauca modo in Talmude de partûs negotio offenduntur. Ex nonnullis quae traduntur, suspicio oriri potest, viros nonnunquam partui normali adstitisse, quo more ab omnibus fere priscis populis divergerent. Hausimus simul ex Talmude certas notitias, omnium forsitan vetustissimas, cujusdam sellae obstetriciae: — dum Talmudicorum qualiscunque doctrina de mechanismo partûs, de modo quo caput exit, et de habitu vario capitis pro sexûs differentia, iis plane est propria: — quibus addenda sunt quae praecipuum de curâ infantis asphyctice nati, de signis nonnullis diagnosticis aperturae uteri, cet. Conveniunt vero cum aliis priscis Medicis qui ante eos vixerunt, in iis quae perhibent de normali situ infantis, de partu difficiliore puellae, cet.

Quae partem artis obstetriciae technicam spectant, valde sunt vaga et succincta; quorum fidem testantur ea quae de Embryulcia et Extractione foetûs occurrunt; sed ratione habita ad argumentum Talmudis illud vix mirum. In his ergo multis aliis veteribus postponendi sunt. Propriis vero observationibus Talmudistae casum *primum*(?) vagitûs uterini memorant, casus retentionis diuturnae placentae, uti et infantis morti matris superviventis; dum inter omnes veteres primi fuerunt qui commemorent versionem spontaneam et etiam partum siccum. Quia vero infantem etiam vivum in utero dissecarunt, neque de ullo consilio patet, quo retentionem placentae curarent, nonnullis aliis priscorum iterum sunt postponendi. Neque Talmudistis solis propria sunt quae leguntur de situ perverso infantis, de partu serotino, de sectione caesarea in mortuas, cet.

XIII. Denique Rabbini revera Sectionem Caesaream in vivas cognoverunt et forsitan instituerunt; quod auxilium nulli alii Medico totius antiquitatis fuit cognitum, et per multa secula obstetricatoribus latuit.

Ex his omnibus denique redundat:

1) Multa quae ad Gynaecologiam et Artem obstetriciam faciunt, in Talmude Babylonico offenduntur peregrinam testantia originem.

2) Plura etiam quae summi sunt momenti, vel desiderantur, vel ab aliis Medicis veteribus melius exposita sunt.

3) In universum vero, omnibus rite perpensis, debemus, concedere Rabbini fuisse observandi ingenium praeclarum; simulque confiteri, eos opportunitate quae praesto erat, bene fuisse fructos, observataque saepissime optime dijudicasse.

4) Laudes summas merentur Rabbini, inter quos plures exstiterunt Naturae scrutatores, contemplatores et observatores sagacissimi, Naturae sua jura tribuentes, et pro aetate qua vixerunt in multis autecellentes aliis Medicis

T A N T U M.



CORRIGENDA.

Pag. 3. versus	24. Jeremja	lege: Jeremjah
— 4. ———	15. descriptinē	— descriptionem
— 9. ———	14. erim	— enim
— 15. in annot. v. 10.	generatioum	— generationum
— 33. ——— v. 5.	oto	— toto.
— 68. ———	21. adde verbis: tradunt Talmudici, verba:	
	(in Nidda, fol. 25 a.).	
— 66. versus	1. mihi docuit	lege: me docuit.
— 81. ———	8. הוהוהו	— הוהוהו
— 98. in margine	quorum	— quarum
— 114. versus	16. sublata sunt	— sublati sunt.
— 138. ann 29) v. 4.	Erechielis	— Ezechiëlis.
— ——— —	7. cenahanaeorum	— Cenahanaeorum.
— 165. versus	7. supervixi	— supervixit
— 173. in margine ad § 10.	Continuatio iudicii- nis opinionum	
	lege: Continuatio iudicii opinionum.	

Cetera ignoret L. B.